



116120 I

116121



Mag. St. Dr.

Fr. H. *[illegible]*



116120 -

116121

I



1779

Felia H. Wrenn  


Fr. Symph. Maulwurf.



TRACTATUS  
THEOLOGICUS

DOGMATICO-HISTORICO-CRITICO-  
SCHOLASTICUS.

D E  
GRATIA SALVATORIS,  
JUSTIFICATIONE IMPII, ET  
MERITO IUSTI.

JUXTA MENTEM  
S. THOMÆ ANGELICI  
DOCTORIS

PER  
R. A. P. S. T. PRÆSENTATUM  
ALBERTUM KRECZMAN

*Regentem Studij Generalis Grodnensis,  
Ufibus Scholarum Thomisticarum*

ACCOMMODATUS.



---

VILNÆ  
TYPIS S. R. MAJESTATIS PENES ACADEM:  
*Anno Domini 1779.*

Dublet 21488 all. 43. I. 5. L. 4. 8/6

**L**egi Tractatum Theologicum Historico-Critico-Dogmaticum de Gratia ex probato Rvndi Patris Magistri Caroli Renati Billuart opere redactum in compendium. In quo nihil Fidei aut bonis moribus contrarium offendi; quin potius Systemmati, quod vocant Thomisticum, omnia continenter & accuratè inhærere notavi. Quare prelo dignum censeo, ac Professoribus æquè ac Studentibus perutile, ac gratum fore existimo. Datt: Vilnæ ex Colleg: Academico ad Divor: Joannis Baptistæ & Evangelistæ ædes. Annò Dni 1779. Die 1ma Julii.

JACOBUS ELERT

*S. Theologiæ ac SS. Canonum  
Doctor, Professor Procancellarius  
Academiae & Universitatis  
Vilnensis.*

---

I M P R I M A T U R

Datt Vilnæ in Cancellaria Consistoriali Anno Dni 1779. Die 6. Mensis Julii.

PETRUS SAMSON TOCZYŁOWSKI

*Primicerius Prælatus Cathedral:  
& Offic: Gener: Vilnen:*

116 121

mpp.



I





## DISSERTATIO PRÆAMBULA

### DE VARIIS ERRORIBUS CIRCA GRATIAM.

---

*Circa gratiam fuerunt errores extreme oppositi. Quidam negarunt gratiam, ut salvarent liberum hominis arbitrium; & hi fuerunt Pelagiani & semi-Pelagiani; Alii negabant liberum arbitrium, ut adstruerent gratiam; quales sunt Lutherani, Calvinistæ, & Jansenistæ.*

---

#### ARTICULUS I.

##### *De Pelagianismo.*



Ommunis Theologorum sensus est, primum Pelagianismi parentem esse Origenem III. Ecclesiæ sæculo viventem; unde S. Hyeron. E.

pisct. ad Ctesiphontem vocat Pelagia iis-  
 mum doctrinæ Origenis *ramusculum*. Re-  
 censentur etiam inter hujus hæresis Fau-  
 tores primos, Theodorus Mopsvestenus,  
 & Ruffinus (sive Syrus sive Aquile-  
 jensis natione) à quo Pelagius, & Cæ-  
 lestius dicuntur errore imbuti.

§ I mus.

*Synopsis historica Pelagianismi.*

**P**elagius natione Brito sive Anglus,  
 sive Scotus aut Hibernus, Mona-  
 chus eò genere Monachatus, cujus  
 Professores in propria domo morantur,  
 erat vir ingenii acuti, versuti & facun-  
 di, pietatem exterius præferens, sed  
 intus *Liguritor*, cupediosus, & obsonio-  
 rum condimentis maximè addictus.

Suæ hæreseos nactus est Pelagius as-  
 sertores fervidos Cælestium, à quo eti-  
 am sectarii ejus Cælestiani sunt appella-  
 ti, & Julianum Patriâ & Episcopatu  
 Eclanensem, qui Pelagianismi à Zozimo  
 damnati apertè defensionem suscepit.  
 Hi tres fuere præcipui Architecti Pela-  
 gianismi.

Suos errores disseminare cæpit Pela-  
 gius circa annum 405. per discipulos  
 & mulierculas. Romæ degens edidit  
 tres libros de Trinitate & Commenta-



ria in Epis: Pauli, in quibus non agnoscit traductionem peccati originalis, nisi imitatione. Scripsit duas Epistolas, primam annô 405. in qua videtur constituere gratiam in solo arbitrio; alteram annô 408. in qua præter liberum arbitrium aliquam gratiam admittit. Gothi Italiam vastantibus, secessit Româ in Siciliam cum suo Achate Cælestio, ineunte annô 409. annô 411. in Affricam ambo appulerunt, ubi nempe Carthagine anno 412. Cælestius cum apertius negaret peccatum originale, in Synodo ibidem congregata anathemate percussus, urbe pulsus in Asiam se transtulit; Pelagius in Palestinam; ubi sub protectione Joannis Jerosolim: Epis: audacius errores disseminavit.

Anno 415. instigantibus duobus Episcopis Gallis Lazaro & Erôte in Palestinam appulsis Synodus Diospolitana congregata est contra Pelagium, in qua Episcopos utendo æquivocationibus decepit. Anno tamen 416. instante Orosio Hispano è Palestina reduce, cum literis Erotis & Lazari à Synodo Carthagenensi in Affrica damnatus est Pelagius una cum Cælestio. Idem eodem anno præstitit Synodus Millevitana sexaginta unius Episcoporum. Anno 417. Innocentius I. congregato Conciliô er-

rorem damnavit, ac Africana duo Concilia sua Authoritate firmavit.

His commotus Pelagius ad dolos confugit, ut Zozimum Innocentii Successorem deciperet scriptis literis Apologeticis per Cælestium; at Zozimus fraude detecta diem dixit Cælestio, ut Synodo, quam coegerat, se sisteret; verum male sibi conscius aufugit à Synodo & examine, non tamen à condemnationis sententia, quam in utrumquè pronuntiavit Zozimus. Scripsit insuper Zozimus universis Episcopis Epistolam *Tractatoriam* dictam, in qua Acta omnia adversus Pelagium approbat, cui omnes Episcopi subscripserunt, exceptis novemdecim, inter quos eminebat Julianus Eclanensis, qui exemplo in Ecclesia in audito appellaverunt ad Concilium generale. Hinc factum, ut Pelagiani Româ, Constantinopoli, Epheso, Palestinâ & fermè undequaq; expulsi à piis Imperatoribus Honorio, Valentiniano, Theodosio juniore, Nestorianis se junxerint, cum quibus una damnati fuerunt in Concilio Oecumenico Ephesino anno 431. à quo tempore dilabi cæperunt ac penitus decrescere.



§ 2dus.

*Varii status hæresis Pelagianæ.*

**P**Almaris error Pelagii in hoc situs fuit, quod diceret hominem habere à DEO tantum possibilitatem, seu facultatem boni agendi, à seipso autem solo ejus usum, voluntatem & actionem, seu quod idem est, posse bene agere à DEO, bene actu agere à seipso; sicquæ quod bene viveret magis sibi, quam DEO debere, quia ex necessitate gratiæ ad bene operandum contendebat tolli liberum arbitrium. Alter ejus error primo affinis, quod peccatum originale soli Adæ nocuerat, & ad posteros non transfret nisi imitatione, sicquæ quod liberum arbitrium esset in illis æquæ sanum, & potens, ac fuerat in Adam innocente: tum quia nè si liberum arbitrium fauciatum agnovisset, coactus fuisset admittere necessitatem gratiæ medicinalis; tum quia dicebat non posse stare libertatem sine æquali facilitate ad bonum & malum; ita ut prætextus servandæ libertatis fuerit illi causa, cur negaverit necessitatem gratiæ, & peccatum originale.

Ab hoc duplici errore nunquam recessit Pelagius, in aliis autem minus constans

stans, quandoq; aliquid gratiæ concessit, prout necesse existimabat ad subterfugienda Catholicorum argumenta. Unde plures status hujus hæresis distinguuntur. Primus status fuit, in quo Pelagius nullum interioris gratiæ auxilium agnovit, sed dixit liberum arbitrium ad benè vivendum & mandata servanda sufficere; supponendo tamen mandatorum cognitionem sive per lumen naturale, si sint naturalia, sive per legem & doctrinam exteriorem, quo ad mandata alia. Nam Epist. ad Demetriadem anno 413. data totus est in demonstrando hominem per legem & doctrinam instructum posse observare Divina mandata, quam assertionem Pelagii Synodus Palestina damnavit, quod utrumque contigit circa initium serpentis erroris. Hinc

*Collig.* Non ergò, ut multi volunt, ab hoc primo statu exclusit Pelagius legem & doctrinam, nisi fortè quod non statim ea nomine gratiæ insigniverit, quod tamen paulò post fecit. Secundus status fuit, in quo Pelagius præter liberum arbitrium, legem & doctrinam exteriorem, admisit aliquam gratiam interiorem, scilicet internas illuminationes, quibus intellectus illustratus cognosceret, quæ



quæ ipsi sint agenda, iisque ad ea moveretur obiectivè. His internis illustrationibus adjunxit exempla Christi & remissionem peccatorum.

Tertius status fuit, in quo Pelagius Catholicorum argumentis pressus videtur admisisse aliquid gratiæ interioris voluntatem afficientis, non quæ sit absolute necessaria, sed utilis tantum ad bonum opus faciendum, neq; gratuito collata, sed naturæ meritis debita.

§ 3<sup>tius</sup>.

*Quid gratiæ tandem admiserit  
Pelagius?*

**P**Ræmittendum hic breviter, quod infra latius expendetur, gratiam interioriorem aliam esse habitualement, quâ justi sumus, Filii adoptivi DEI, &c. aliam actualem qua movemur ad bonum: & hæc duplex est, una pertinens ad intellectum, & est interior mentis illuminatio; altera ad voluntatem, & est DEI motio, qua voluntas excitatur & inclinatur ad opus pietatis. *Suppono* imo: Pelagium non negasse concursum simultaneum, hic enim cum sit generalis & indifferens & quodam modo naturæ omni agenti debitus, non pertinet ad questionem

tionem de auxiliis; nec de illo negato Concilia & Augustinus Pelagium reprehenderunt.

*Suppono* 2do ut certum Pelagianos admisisse gratias actuales, morales, exteriores, scilicet legem, doctrinam, & exempla Christi. Quæstio est, utrum *imo* admiserint gratiam habitualement. 2do gratias actuales interiores ex parte intellectûs, 3tia gratias actuales interiores ex parte voluntatis.

Dico imo Pelagiani admiserunt gratiam habitualement, sed non quomodo admittenda est. Contra Suaren & Tournely.

*Prop.* 1ma pars: Quamvis Pelagiani non usurpaverint hanc vocem *Gratia habitualis*, admiserunt tamen præcipuos characteres & effectus ejusdem: Er: Prob: A: Pelagius in Coment. in cap. 5. Epist. ad Rom: agnoscit *peccata dimitti abundantia donationis Spiritus S. ac justitiam per baptismum donari*. Apud S. Aug. lib. de gratia Christi cap. 38. Pelagius asserit: *Nos instaurari per gratiam Christi, & in meliorem hominem renasci*. Et lib. 1. contra Julianum cap. 6. Pelagiani docent: parvulos esse baptizandos, non tantum ut sint justi, Filii Sancti, hære-



hæredes & cohæredes ac membra Christi, *sed* & Templum & organa Spiritûs S. Julianus apud eundem S. Aug. lib. 1. operis imperfecti cap. 52. *Hanc gratiam locupletem spiritualibus donis credimus, quæ multis opima muneribus, ac reverenda virtutibus pro infirmitatum generibus, & humanorum statuum diversitatibus, una tam remediorum collatrice quam munerum virtute medicatur; Atqui efficere homines justos, sanctos, filios DEI adoptivos, hæredes, cohæredes Christi, instaurare, habere annexa dona, virtutes, remedia &c. sunt præcipui characteres & effectus gratiæ habitualis ergo. Hinc idem Julianus apud S. Aug. loc. mox citato ait: Nos igitur (Pelagii sectatores) in tantum gratiam baptismatis omnibus utilem ætatibus confitemur, ut cunctos, qui illam non necessariam etiam parvulis putant, æterno feriamus anathemate. Quid clarius?*

*Colliges ex dictis contra eruditissimum Thomasinum Oratorii JESU Presbyterum, præcipuam concertationem Augustinum inter & Pelagianos non fuisse de gratia habituali, sed actuali; amo. Gratia, de qua S. Aug. contra Pelagium, est necessaria ad singulos actus pietatis;*  
ut

ut continuo urget S. Doctor; atqui talis non est gratia habitualis; cum ante illam eliciantur actus fidei, spei & alii, quibus disponitur peccator ad gratiam habitualement. 2do. Gratia ab Augustino propugnata, ea est, quæ justis aliquando non conceditur lib. 2. de peccatorum meritis c. 19. Item in qua perseverantes à non perseverantibus distinguuntur, lib. de dono persever. Item qua Deus corda hominum indeclinabiliter in bonum convertit, & quæ de nolentibus facit volentes; ut passim docet, atqui hæc non gratiæ habituali sed actuali competunt Er.

Dixi *sed non quomodo admittenda*, quia dicebant illam dari meritis naturæ, & valere tantum ad ornatum animæ, instaurationem naturæ, & ad remissionem peccatorum præteritorum, non ad cavenda futura, nec juvare ad vincendas tentationes, & ad operandum supernaturaliter, ut legimus apud S. Aug. Hær. 88. & lib. de natura & gratia cap. 34. Unde S. Doctor cap. 30. de gratia Christi: *Istam quippè gratiam*, inquit, *qua justificamur*, (certè habitualis) --- *in Pelagii & Calestii scriptis, quacunque legere potui, nusquam eos inveni,*  
quem-



*quemadmodum confitenda est, confiteri.*

Dico 2do. Pelagiani in secundo statu suæ hæreseos admiserunt gratias actuales interiores ex parte intellectûs, scilicet internas mentis illustrationes. Contra Lessium.

*Prob. ex S. Aug. lib. de gratia Christi cap. 24. ubi sic contra Pelagianos concludit. Legant ergo, Pelagiani, & intelligant, intueantur atq; fateantur non lege & doctrina insonante forinsecus (ecce gratiam moralem externam) sed interna atquè occulta mirabili ac ineffabili potestate operari DEUM in cordibus hominum, non solum veras revelationes (en gratiam moralem internam) sed etiam bonas voluntates, ecce gratiam internam Physicam efficientem. Ergo manifestum est in altero statu Pelagianos tantum errasse circa gratiam bonæ voluntatis efficientem & Physicam.*

*Confirm. S. Aug. eodem lib. cap. 9. & 10. observat in verbis Pelagii gratias morales duplicis generis, scilicet legem & doctrinam exterius propositam, & revelationem sapientiæ, qualis facta fuit Paulo, quæ indubiè fuit interna, docetq; neutram sufficere ad adstruendam veram gratiam Christi: Unde infert cap.*

12. requiri gratiam non solum qua faci-  
enda novimus, sed etiam qua cognita  
faciamus.

Dico 3tio. Pelagiani admittebant gra-  
tiam possibilitatis sive quæ dat posse,  
in quo autem reponerent eam, an in  
sola lege & doctrina, sub quibus conti-  
nentur aliæ gratiæ morales ex parte in-  
tellektûs, an in aliquo ampliori adjuto-  
rio, incertum est?

*Prob prima pars.* ex S. Aug. lib. de  
gratia Christi cap. 3, 4. & 5. & alibi,  
ubi docet Pelagium hæc tria distinxisse  
possibilitatem, voluntatem seu voli-  
tionem & actum; solam vero possibili-  
tatem adjuvari à DEO, non alia duo.

Idem S. Doctor cap. 47. totam gra-  
tiæ controversiam ad hoc unum redu-  
cit, ut Pelagius præter auxilium possibi-  
litis, quod admittebat, admitteret eti-  
am voluntatis & actionis auxilium, sic  
concludit, si sicut primum ita & secun-  
dum admittet Pelagius, *nihil de adjuto-  
rio DEI, quantum arbitror, inter nos  
controversiæ relinquetur.*

*Observandum hic amo* in locis citatis,  
gratiam possibilitatis, de qua hic est ser-  
mo, non esse eandem cum illa, quam  
Pelagius alibi admittit ad facilius agere,  
&



& ut datam meritis nostris; siquidem gratia possibilitatis, quam hic admittit Pelagius semper adest, antequàm operemur, ideoq; antequàm mereamur, & datur nobis, quia posse nostrum est *invalidum* & *infirmum*, ut patet ex S. Aug. lib. cit. de gratia Christi cap. 3.

*Observandum 2do* (& est 2da pars concl.) incertum esse, an istud auxilium possibilitatis in solis gratiis moralibus, quæ intelliguntur per legem & doctrinam, reposuerit, an in aliquo ampliori auxilio afficiente physicè voluntatem? Istud dubium oritur ex verbis S. Aug. lib. de gratia cap. 5. *Quodcunquè legimus, vel audimus Divinæ gratiæ adiutorium confiteri, sive in lege, & doctrina, sive ubilibet constituat. Cap. 14. Venire posse ad Deum in natura ponit Pelagius, vel etiam, ut modo dicere cæpit in gratia, qualemlibet eam sentiat.* Ex quo manifestum est, non constituisse Augustino, quid intelligeret Pelagius per auxilium possibilitatis. Gravior difficultas, utrum tandem Pelagiani, in ultimo suæ hæreseos statu admiserint gratiam voluntatis & actionis? Obstat videntur mox dicta ex S. Aug. Svadent è contra alia ejusdem S. Doctoris testimonia.

monia. Quare ad contrariarum opinionum conciliationem.

Dico 4to. Probabilius est Pelagianos variis Catholicorum argumentis & Ecclesiæ condemnationibus ubiq; agitados tandem admisisse gratiam operis & voluntatis, quæ facit benè velle & benè operari; sed falsis suis interpretamentis vim ejus evacuasse, quod nempè contendere-*rent 1mo.* eam non esse absolute necessariam ad benè volendum & agendum, sed tantum ad facilius & perfectius. *2do.* eam non dari gratis, sed bonæ voluntatis meritis retribui. Unde diverso sensu dici potest eos admisisse & non admisisse hanc gratiam.

Conclusio patet ex S. Aug. lib. cit. de gratia cap. 23. fatetur Pelagium tandem admisisse: *magnum adjutorium Divinæ gratiæ, ut cor nostrum, ubi voluerit ipse declinet; sed tam magnum adjutorium* (inquit in sensu Pelagii) *tunc meremur, cum sine illo adjutorio, nonnisi de libertate arbitrii ad Dominum currimus.* Nota quod hunc lib. de gratia Christi S. August. scripsit anno 418. post exortam hæresim annis circiter 13. Idem habet de Verbis Apostoli cap. 12. *Jam verò dicunt, adjutorium esse gratiam*



*am DEI ad facilius operandum.* Clarus testatur lib. de gratia & libero arbitrio cap. 14. scripto sex annis post librum de gratia Christi, ubi tradit Pelagianos admisisse gratiam, quâ lex impletur, quâ natura liberatur, quâ peccatum non dominatur, perquam tandem benè operamur, quæ est ipsissima gratia operationis & efficax; quamvis in hoc errarent, quod vellent eam dari meritis bonæ voluntatis, & ad facilius tantum. Tandem S. Aug. lib. de dono persever. quem anno 429. exaravit errores Pelagianorum ad tria capita reducit cap. 2. quorum nullum negat gratiam operationis & voluntatis. Primi capitis error: gratiam DEI secundum merita dari; 2di capitis error: hominem absquè peccatis vivere posse in hoc corpore; 3tii capitis error: non nasci hominem obnoxium peccato primi hominis.

Igitur ex S. Aug. evidenter habemus Pelagianos ultra gratiam moralem, & gratiam possibilitatis, quæ dat posse, admisisse tandem gratiam, qua DEUS cor inclinatur, lex impleatur &c. hoc est gratiam efficacem voluntatis & actionis. Sed quia volebant eam dari meritò priorum operum bonæ voluntatis, ideoq;  
ea

ea priora opera bona fieri sine illa gratia; item quod ad subsequētia opera non esset absolutè necessaria, sed tantum ut facilius & perfectius fierent; hinc fit, quod continuo repetat Aug. in lib. de gratia Christi Pelagianos docere *solam possibilitatem adjuvari*, intelligendo nempe possibilitatem ad ista priora opera bonæ voluntatis gratiæ meritoria; *non verò voluntatem & actionem*, intelligendo voluntatem & actionem præviam, quæ merebatur gratiam ad opera sequentia facilius peragenda. Hinc etiam ibidem sæpè repetit Pelagianos negasse necessitatem gratiæ Christi, quia cum eam admitterent ad facilius tantum & perfectius agendum, hoc ipso necessitatem ejus negabant. Et hæc est solutio objectionis, quam depromunt ex sæpe lib. laudato de gratia Christi, qui volunt Pelagianos nunquam admisisse gratiam voluntatis & actionis.

§ 4tus.

*Confectaria præcedentium.*

**E**X hucusq; disputatis colliges 1mo. Pelagianos in ultimo statu suæ hæreseos ad Semi-Pelagianismum declinasse, cum hoc tamen discrimine; quod  
Semi



Semi-Pelagiani vellent tantum initium bonæ voluntatis seu fidei quaecumq; (quod nolebant donari titulô operis boni) esse à nobis, opera verò bona esse à gratia Domini intuitu bonæ voluntatis initialis collata. Sed Pelagiani contendebant, etiam bona opera esse à nobis, eaque esse meritoria gratiæ, quæ tamen nonnisi ad melius & facilius operandum esset utilis, non omninò necessaria.

*Collig. 2do.* tres fuisse præcipuè errores, quibus Pelagiani pertinaciter adhæsere; *primus*, nullum peccatum ab Adamo ad postero traduci. Concedebant tamen pueris utiliter conferri baptismum, non ut à peccato mudentur, sed ut gratiâ per eum collatâ hæredes fierent regni cælestis. *Secundus* error fuit, gratiam dari secundum merita. *Tertius*, homines benè utendo libero arbitriô, ad tantam perfectionem pervenire, ut omne peccatum etiam collectivè vitare possent, nec ad hoc indigerent gratiæ auxiliô.

Ad hos tres errores, à quibus nunquam recesserunt Pelagiani reducuntur alii minus præcipui, verg. concupiscentiam non esse malam, quia juxta illos est proprietas naturæ; morbos & misérias non esse peccati originalis pænas; Adamum

etſi non peccaſſet, perinde moriturum fuiſſe, parvulos ſine baptiſmo morientes habere quandam beatitudinem, non tamen cæleſtis Regni; idem de adultis infidelibus, qui legem naturalem ſervâſſent.

*Collig. 3tio.* Gratiam controverſam inter Aug. & Pelagianos fuiſſe gratiam actualem bonæ voluntatis & actionis, neceſſariam ad ſingulos actus pietatis gratis, non ex naturæ meritis collatam: quia Pelagiani amiſerunt gratiam habitualement, gratiam poſſibilitatis, gratias morales ex parte intellectûs; imo probabilius ſaltem poſt Concilia contra illos coacta gratiam voluntatis & actionis, ſed non gratuitam, nec omnino neceſſariam.

*Collig. 4to.* Hanc gratiam voluntatis & actionis neceſſariam, quam Aug. propugnâvit adverſus Pelagianos, non fuiſſe gratiam indifferentem & exſpectantem conſenſum noſtrum, ut ſit efficax, ſed per ſe & vi ſua talem fuiſſe. *Patet 1mo.* Quia Auguſtinus totus & perpetuus fuit, ut defenderet gratiam, quæ facit, ut faciamus, efficiendo de nolentibus volentes &c huiusmodi autem gratia non eſt indifferens, & exſpectans conſenſum noſtrum, ut ſit efficax, cum  
illum



illum efficiat. Ergo per se &c 2do Pelagiani & Semi-Pelagiani recusabant admittere gratiam, quam defendebat Augustinus quia criminabantur per eam tolli libertatem, fatalem induci necessitatem &c. atqui hæc contra gratiam indifferentem, oblatam omnibus, & ex consensu voluntatis efficacem non objecissent E. Dixi simpliciter *gratiam per se efficacem*, ut abstraherem à modo, quo hæc ejus efficacia explicatur sive per motiones morales, sive per delectationem, sive per actus indeliberatos, sive per multiplicationem auxiliorum, sive per DEI decretum immediatè, sive tandem per motionem fluentem seu præmotionem Physicam; magis enim intendit Augustinus defendere necessitatem gratiæ, quæ consensum nostrum non expectaret, sed illum ex omnipotentissima DEI voluntate efficeret, quàm hujus efficaciæ modum inquirere.

Cùm ea quæ in his duobus § diximus petantur ex operibus S. Augustini adversus Pelagianos, & hi more Novatorum diversa temporibus diversis censuerunt, opportunum duxi hic annotare ordinem & tempus, quo S. Doctor opera sua contra dictos hæreticos edidit. Igitur.

S. Aug. anno 412. scripsit contra Pelagianos tres libros de peccatorum meritis & remissionibus. Eodem anno lib. de Spiritu & litera.

Anno 415. Librum de natura & gratia.

Anno 417. Sermonem secundum de verbis Apostoli post jam damnatum Pelagianismum ab Innocentio I. Eodem anno librum de gestis Pelagii.

Anno 418. Duas Epistolas ad Sixtum Presbyterum, qui postea fuit S. Pontifex, quarum præcipua est 105. Eodem, librum de gratia Christi. Circa id tempus, libros de nuptiis & concupiscentia.

Anno 420. quatuor libros ad Bonifacium.

Anno 421. Enchiridion ad Laurentium, & sex libros adversus Julianum.

Anno 424. librum de gratia & libero arbitrio.

Anno 425. lib. de correptione & gratia.

Anno 428. Opus imperfectum contra Julianum, quo tempore libris retractationum incumberebat. Eodem anno lib. de hæresibus.

Anno 429. Libros de prædestinatione



ne Sanctorum, & de dono perseverantiæ adversus Semi-Pelagianos. Obiit Aug. die 28. Augusti anno 430.

S. Augustino annumerandus S. Hieronimus, qui primus contra Pelagianos in aciem prodiit, anno 411. contra illos scripsit Epist. ad Marcellinum, quæ est 82. alteram 67. anno 422. ad Ctesiphontem; anno 415. Dialogum inter Atticum & Critobulum; anno 419. Epistolas ad Alibium & Augustinum. Impugnat etiam hanc hæresim in præfationibus ad libros quatuor in Jeremiam.

---

## ARTICULUS II.

### *De Semi-Pelagianismo*

#### § I. mus.

#### *Synopsis historica Semi-Pelagianismi.*

CUM Florus Monasterii Adrumentini Monachus quatuor circiter annis post scriptam Epistolam 107. ad suum Monasterium detulisset alteram ejusdem S. Aug. Epist. 105. ex ea conturbati sunt nonnulli Monachi, quod crederent ex doctrina Augustini everti liberum arbitrium; qua de causa S. Antistes scripsit librum de gratia & libero arbi-

arbitrio; quô non obstante, quidam non valentes intelligere concordiam libertatis cum gratia, dixerunt secundum doctrinam Augustini neminem esse corripiendum, si præcepta non servaret; sed orandum, ut servet; ad quam consequentiam confutandam scripsit Augustinus librum de correp. & gratia. Hoc librô delato Massiliam ita commoti sunt quidam ejusdem urbis Presbiteri alioquin conspiciui, ut in apertam hæresim eruperint. Et hi propriè dicti sunt Semi-Pelagiani, quia in aliquibus à Pelagio recedentes, in aliquibus ei adhærebant. Admittebant contra Pelagium peccatum originale, & necessitatem gratiæ ad opera salutis, at eam cum ipso negabant ad initium salutis & ad perseverantiam. Et circa hæc duo vertebatur tota eorum hæresis, quæ ad tria capita reduci potest.

*Primò* Docebant, prædestinationem sive ad gratiam, sive ad gloriam non esse gratuitam, sed DEUM æquali affectu omnes homines tam reprobos, quàm prædestinatos prosequi, & omnibus æqualiter gratiam & gloriam offerre; ita ut illi gratiam habeant, qui ex se illi consentiunt, & gloriam qui in accepta gratia



tia ex se perseverant. DEUM autem ab æterno ad gratiam prædestinâsse, quos prævidit esse consensuros, & in ea ex se perseveraturos. Et cum premerentur exemplô parvulorum, quorum aliqui sine proprio merito prædestinantur ad baptismum, & ad regnum; alii sine proprio demerito ad mortem; respondebant: DEUM uti præscientia futurorum conditionerum, quæ nunc appellatur scientia media, & tales prædestinare ad vitam vel mortem, quales futuros illos in annis majoribus, si ad adultam ætatem conservarentur, scientia Divina præviderit. Ita refert Prosper in Epist. ad S. Aug.

2do. Quamvis admitterent necessitatem gratiæ ad opera salutis, illam tamen denegabant ad initium salutis. Illud autem initium reponebant, in quodam credulitatis affectu, in petitione, desiderio salutis, vel etiam in ipso consensu gratiæ oblatae. Hæc enim non annumerabant inter opera salutis, sicut, inquebant, desiderare aut petere medicum, se credere medico non sunt opera sanitatis.

3tio. Circa perseverantiam idem docebant, quod circa initium salutis, ad eam nempe non requiri gratiam, sed esse

ex

ex nobis. Quia perseverantiam non reponerant in aliquo actu, quo perseverare vellet justus (hic enim actus est perfectæ virtutis, & opus salutis, quale illi fieri volebant sine adiutorio gratiæ) sed in eo reponerant, ut quis cooperanti Deo suum consensum constanter præberet. Unde initium salutis & perseverantia juxta Semi-Pelagianos in eo coincidebat, quod cum primo Deo incipimus consentire, sit initium salutis, cum verò in illo consensu jam præstito usque ad finem vitæ permanemus, sit perseverantia.

Authores Semi-Pelagianismi fuerunt Casianus Collator appellatus: Faustus Epis Rhégiensis; Genadius Presbyter Massiliensis, quos tamen multi ab hæresi formali vindicant, quia eorum error tunc ab Ecclesia nondum fuit proscriptus. Quid mirum Faustum & Cassianum, qui cultu Sanctorum in provinciis suis decorantur errasse, si ipse S. Augustinus Ecclesiæ Lumen ante Episcopatum fuit in eodem errore, qui tandem factus est Semi-Pelagianorum, ut ipse testatur lib. de Prædest. SS. cap. 3. sed ab eo revocatus illo Apostoli dicto: *Quid habes. quod non accepisti? &c.*



§ 2<sup>us</sup>.

*An & qualem gratiam Semi-Pelagiani  
admisserint ad initium fidei & salutis?*

**Q**uæstio hæc intricatissima est, cum enim Semi-Pelagiani, ut observat S. Prosper cap. 5. contra Collat. sibi contradicerent, & modò loquerentur ut Catholici, modò ut Pelagiani, imò pleriq; faterentur, nihil se invenire, quod placeret, sed tantum displicere Augustini modum, quo gratiam explicat, difficile est devenire præcisè, quid senserint.

Certum videtur Semi-Pelagianos ad initium fidei admisisse gratias illustrantes intellectum, atq; moraliter & objectivè moventes voluntatem, etiam interiores; quia dicebant omnes vocari ad fidem, ut fatètur Prosper Epist. ad S. Augustinum. Quæstio remanet, utrùm admisserint ad initium fidei gratiam prævenientem voluntatem, ipsam intus afficientem, indifferentem tamen, sic ut voluntas posset illi dissentire vel consentire? Jansenius lib. 8. de hæ. Pelagiana c. 6. contendit, Semi-Pelagianos veram admisisse gratiam interiorem prævenientem ad initium fidei, sed indifferentem & suspensam,

penſam, atq; in hoc ſenſu fuiſſe hæreticos, quod vellent voluntatem illi poſſe reſiſtere, vel obtemperare, quæ eſt 4ta ejus propoſitio damnata. Hac damnatione non obſtante plures Theologi Catholici tenent ſententiam quoad primam partem argumentis non contemnendis. Altera ſententia negat generaliter Semi-Pelagianos unquàm admifſiſſe gratiam anteriorem prævenientem ad fidei initium. Sic omnes gratiæ efficaciſ per ſe, impugnatores.

P. Goudin diſtingvit inter Semi-Pelagianos, dicens eos diverſimodè intellexiſſe initium fidei & ſalutis; Quidam illud reponerant in actibus formatis, ſcilicet in ipſo actu fidei, vel petitione gratiæ & ſalutis, quos tamen actus præambulos non reputabant opera ſalutis, ſicut deſiderare medicum &c. non ſunt opera curationis & ſanitatis. Quidam à Pelagio magis recedentes per initium fidei ſeu ſalutis non intelligebant actum formatum fidei, aut aliquem alium bonum præambulum, ſed illud initium ita extenuabant, ut ad qualecunquè initium bonæ voluntatis, hoc eſt, ad conſenſum & acceptationem gratiæ oblatae tandem reducerent. Nam oblatam opem Medici



ci acceptare, est veluti seipsum credere ipsi, quod in rebus Divinis fidei nomine accipi aliquo modò potest. Ita colligitur ex Hilario & Prospero in Epistolis ad S. Augustinum.

Hac distinctione positâ, notandum, gratiam posse considerari dupliciter, *amò*: ut oblatam; *adò*: ut collatam voluntati. Item gratiam actualem, qualiscunq; sit, non posse recipi in voluntate, nisi in ea aliquem motum, seu affectum causet; est enim gratia actualis, motio.

*Dico amò*: Probabilius est, nullum Semi-Pelagianorum admisisse ad initium fidei necessitatem gratiæ prævenientis, indifferentis, reipsa collatæ voluntati.

*Prob.* Gratia actualis interior collata voluntati ad initium fidei, quantumvis supponatur indifferens & pendula ab arbitrio, repugnat capitali errori Semi-Pelagianorum E. *Prob. Ant.* Capitalis error Semi-Pelagianorum erat, quod initium fidei & salutis esset ex nobis & non ex DEO; & quod collatio gratiæ salutem operantis non præcederet, sed sequeretur obedientiam nostram, juxta illud Fausti lib. 2, de grat. & lib. arb. cap. 9. *Nisi fuerit obedientiæ præmissa devotio, gratiæ vilescit oblatio*; atqui, si  
admi-

admisissent ad initium fidei, & ante consensum voluntatis, gratiam interiorē qualemcunq; collatam intrinsecē voluntati, jam initium fidei non esset ex nobis, sed ex DEO & gratia, non sequeretur obedientiam nostram, sed obedientia gratiam E. *Prob. Min.* Gratia actualis interior qualiscunq; sit, collata intus voluntati eam movet, & aliquid in ea operatur, scilicet pios motus & affectus; cum enim sit motio DEI, non est motio moventis sine motione mobilis; atqui illi pii motus & affectus, sunt initia conversionis & salutis, E.

*Dico. 2do.* Semi-Pelagiani saltem ii, qui initium fidei reponebant in sola acceptance seu consensu gratiæ, non in actibus formatis initialibus & præambulis, ad illos actus formatos admisserunt gratiam cooperativam, quæ ut oblata præveniret omnem voluntatis consensum, sequeretur autem ut collata, quatenus nempe à DEO offerebatur, antequam homo quidquam ex parte sua poneret, ut tamen reipsa cum eo cooperaretur ad illos initiales actus, ejus consensum & determinationem expectabat, non ipsa dabat.

*Prob. ex Prospero testante* non omnes



mnes Semi-Pelagianos docuisse hominem per solam facultatem naturalem posse *quarere, petere, pulsare*, sed hanc fuisse propriam quorundam sententiam à Pelagio non recedentium: *Quidam horum à Pelagianis semitis non declinant &c.* Ergo alii à Pelagio remotiores etiam ad illos initiales actus gratiam auxiliantem requirunt, seu requirebant, gratiam, dico, non quæ voluntatem ad actus hos determinaret; alioquin non fuisset subdita voluntati, sed quam voluntas sibi subjiceret, sicq; exigebant ad initium fidei, gratiam, quæ ut oblata prior esset ipso consensu voluntatis, posterior verò ut collata & intrinsecè recepta. Hinc de illis ait Prosper in Epist. ad Aug. *Nec considerant se gratiam Dei, quam comitem non præviā volunt humanorum meritorum, etiam illis voluntatibus subdere, quas ab ea secundum suam phantasiam non negant esse præventas.* Ubi vides, Semi-Pelagianos, admittere gratiam simul & prævenientem omnes actus & concomitantem omnia merita, & voluntati tamen subditam; quæ omnia non possunt competere gratiæ, nisi in sensu conclusionis, ita ut oblata sit præveniens, conferenda subdita voluntati, adeoq;  
eam

eam consequens, cooperans iis tandem, qui ex se ipsis volunt agere illos actus initiales, quibus ulteriorem gratiam ad perfectiores actus merentur.

*Obijc: contra 1<sup>am</sup> Concl.* Illud Aug. de Prædest. Sanct. cap. 1. *Pervenerunt isti Fratres, ut præveniri voluntates hominum Dei gratiâ fateantur, atq; ad nulum opus bonum vel incipiendum vel perficiendum sibi quemq; sufficere posse consentiant: E.* gratiam interiorem prævenientem admiserunt. *Confirmatur:* Non majores vires arrogabant homini lapso ad resurgendum; quam innocenti ad standum; sed pro statu innocentis admittebant prævenientem gratiam intrinsecè collatam, nempe auxilium sine quo E.

*R. ad primum,* ex illo quidem apertè probari conclusionem secundam, non verò negari primam, Sensus enim est; quod Semi-Pelagiani admitterent necessitatem gratiæ cooperantis nedum ad actus perfectos, sed etiam ad initiales & præambulos, eamq; gratiam prævenire voluntates nostras, non ut collatam, sed ut oblatam, non quæ voluntatem sibi subjiceret, sed quæ voluntati subjiceretur, cujus nempe expectabat consensum, non quem



quem dabat. S. enim Aug. loquitur ad sensum Prosperi, à quo id audiêrat.

*Ad Confirm:* Per auxilium *sine quo*, intelligi gratiam cooperantem, nec necesse est, ut intelligatur per illud gratia præveniens, nisi ut oblata; alias jam pertineret ad auxilium *quo*.

*Obj. contra secundam Concl:* Semi-Pelagiani initium fidei uti petere, quærere, pulsare solis naturæ viribus tribuebant. E. ad illos actus gratiæ cooperantis necessitatem non agnoscebant.

*R. D. Ant.* Quidam Pelagio viciniore &c. *C. Ant.* Omnes *N.* Fatemur eos, qui in his actibus præambulis initium fidei reponebant, adscripsisse illos actus solis naturæ viribus seclusa gratiâ cooperante; At cum urgerentur, quidam à Pelagio remotiores concedebant nullum opus bonum Divinæ gratiæ esse subtrahendum, idquæ solum humano arbitrio reservabant, quod Divinæ gratiæ ex se consentiret vel dissentiret, vellet vel non vellet obedire; & hi, in hoc consensu & obedientia reponebant initium fidei.

*Inst.* Semi-Pelagiani minùs gratiæ ad mittebant ad illos actus initiales, quàm ad perfectos; atqui ad perfectos non ad-  
mitte-

mittebant nili cooperantem gratiam; nunquam enim præoperantem propriè ad-miserunt E.

*R. D. Maj.* Quidam Pelagio vicini-  
res *C. Maj.* à Pelagio remotiores *N.* Hi  
enim cum in iis actibus non reponerent  
initium fidei, & ad omne opus bonum  
gratiam requirerent, ad illos actus uti ad  
perfectiores gratiæ cooperantis necessita-  
tem agnoscebant.

*Repones:* Pleriquè Theologi Catholici  
tùm ad initium fidei, tum ad cætera pi-  
etatis opera non aliam actualem grati-  
am requirunt, quàm moralem præveni-  
entem & excitantem, & Physicam coo-  
perantem; E. si hæc fuit Semi-Pelagia-  
norum sententia, vel non fuerunt in hoc  
hæretici, vel illi Theologi cum istis fo-  
rent hæretici, quorum neutrum est ad-  
mittendum.

*R. N. Conseq.* Quia Theologi memo-  
rati admittunt consensum hominis esse  
â DEO, & voluntates nostras præveni-  
ri, non solum per gratias morales illu-  
strantes intellectum, sed etiam per pios  
affectus voluntati impressos, sicq; refe-  
runt initium salutis ad DEUM. Et quam-  
vis ex modo, quo explicant efficaciam  
gratiæ inferamus, eos aliquod salutis ini-  
tium



tium DEO subtrahere, tamen ex sua sententia sequi negant. Ideo &c. Ex his.

*Collig. 1mo:* Initium salutis aliqui Pelagio proximi reponebant in actibus aliquibus formatis, ut in actu credendi, desiderandi, petendi; alii convicti, omne opus bonum esse à DEO, illud initium restringebant ad consensum gratiæ, quam DEUS cuiquæ offerebat actûs boni cooperativam, & ex illo qualicunq; initio, & in eo perseverantia repetebant discretionem electorum à reprobis, & cur uni præ alio daretur gratia & in fine gloria. Ad hanc doctrinam, ponebant in DEO scientiam futurorum conditionatorum, quæ nunc dicitur scientia media.

*Collig. 2da.* Non errabant Semi-Pelagiani, quod dicerent DEUM velle omnium salutem, & omnibus gratiam offerre; ita enim tenet major & sanior pars Theologorum. Item nec quod dicerent, talem esse gratiam, cui posset resistere vel obtemperare voluntas, sic enim Catholicè tenendum juxta definitionem Concilii Trid: & decreta Summorum Pontificum. Hæc ergò fuit ultima hujus hæresis statio; sic nostrum esse gratiæ consentire vel dissentire, ut in iis, qui consentiunt, consensus ille non sit à gratia,

C

dse

sed à nobis; atq; hōc sensū initium salutis subtrahebant gratiæ, & reservabant libero arbitrio.

---

### ARTICULUS III

*De Bajanismo & Jansenismo.*

**B**Ajus Belga natus Melini anno 1513. Doctorali laureâ Lovanii insignitus 1550. ad Concilium Trid. à Philippo II. Hispaniarum Regē missus anno 1563 multa scripsit, in pluribus erroneè. Anno 1567. S. Pius V. Bulla: *Ex omnibus &c.* septuaginta sex propositiones damnavit, tacito nomine Baji; tūm nè indē Bajus exasperaretur; tūm quia non omnes propositiones sunt Baji, etsi vulgò dicantur Bajanæ. Doctores Lovanienses obedientiam sponponderunt, ac Bajus post aliquas instantias propositiones ejuravit.

Anno 1579. cū nonnulli has propositiones propugnare pergerent, Gregorius XIII. Constitutione *Provisionis nostræ* Bullam Pianam confirmavit, & denū propositiones damnavit, & Bajus ipse: *damno*, inquit, *secundū Bullæ intentionem (propositiones)* & sicut Bulla damnat.



mnat. Fertur Cardinalem Toletum ea occasione dixisse, & sæpius iterâsse: *magis humilem Michæele Bajo, ac doctiorem vidi neminem.* Tandem cùm occasione Libri Jansenii, quidam plures propositiones iterum defenderent, quæ erant Bajanæ, Urbanus VIII. Bulla *In eminenti*, anno 1641. confirmavit Pianam, & Gregorianam Constitutionem.

Jan'enius anno 1585. apud Batavos nascitur, Ultrajecti & Lovanii studiis ac literis excultus, Parisios profectus Collegii Bajonensis Primarius instituitur. Post duodecim annos Lovanium redux Collegio S. Pulcheriæ præficitur; anno 1617. laureâ doctorali donatur. Anno 1630. Professor Regius instituitur. Ann. 1635. Episcopus Iprensis consecratur; anno 1638. sexta Maji peste extingvitur.

Plura scripsit, inter quæ illud famosum opus, quod intitulavit *Augustinus*, quia gloriabatur se in eo veram & puram Augustini doctrinam attigisse. Huic operi per 20. annos insudavit, eiquè moriens ultimam manum adhibuit, subjiciens illud judicio Romanæ Ecclesiæ.

A Capellano suo, cui illud legaverat typis furtivis mandatum, statim ac lucem aspexit, prohibitum fuit ab Urbano

VIII. anno 1641. 1<sup>mo</sup>: quia contra Pauli V. decretum tractabat de auxiliis gratiæ; 2<sup>do</sup>: quia continebat plures propositiones damnatas à Pio V. & Gregorio XIII.

Anno 1649. delatæ sunt ad examen Facultatis Theologicæ septem propositiones, à quibus, duabus ultimis rescissis, remanserunt quinque; famosæ.

*Prima: aliqua Dei præcepta hominibus justis volentibus & conantibus, secundum præsentem, quas habent, vires, sunt impossibilia.*


*Secunda: Interiori gratiæ in statu naturæ lapsæ nunquam resistitur. Tertia ad merendum & demerendum in statu naturæ lapsæ, non requiritur in homine libertas à necessitate, sed sufficit libertas à coactione. Quarta: Semi-Pelagiani admittebant prævenientis gratiæ interioris necessitatem, ad singulos actus etiam ad initium fidei, & in hoc erant hæretici, quod vellent eam gratiam talem esse, cui posset humana voluntas resistere vel obtemperare. Quinta: Semi-Pelagianum est dicere, Christum pro omnibus hominibus omnino, mortuum esse & sanguinem fuisse.*

Ab Episcopis Galliæ 85. contradicentibus



tibus 11. anno 1651. propositiones Romanæ missæ. Innocentius X. Congregationibus institutis, illas revocat ad examen. In prima Congregatione Summus Pontifex palàm declaravit, se nolle ullum præjudicium inferre doctrinæ S. Augustini & Thomæ. Post celebratas duorum annorum spatiò, triginta sex congregationes, in quibus Jansenii causa omni diligentia discussa est, Pontifex die 31. Maji anno 1653. edidit Constitutionem *Cum occasione &c.* in qua quinque propositiones speciali censurâ condemnat.


Primam declarat *temerariam, impiam, blasphemam, anathemate damnatam & hæreticam, & uti talem damnat.* Secundam, *ut hæreticam.* Tertiam, item *ut hæreticam.* Quartam, *falsam & hæreticam.* Quintam, *falsam, temerariam, scandalosam; & intellectam eo sensu, ut Christus pro salute solum Prædestinatorum mortuus sit, impiam, blasphemam, contumeliosam, Divinæ pietati derogantem, & hæreticam declarat.* Sic causa Jansenii fuit finita, sed non Jansenistarum turbæ, quæ videantur apud Autores. Infra subjiciemus systemata Jansenii.



## DISSERTATIO II.

*De Variis Naturæ humanæ  
statibus.*

Status, est *conditio homini conveniens cum quadam firmitate & immobilitate.* Sumitur hic pro conditione & modo stabili, quo se habet natura humana in ordine ad ultimum finem. Quintuplex distinguitur. Primus status naturæ puræ. Secundus status naturæ integræ. Tertius justitiæ originalis. Quartus naturæ lapsæ. Quintus naturæ reparatæ.



## ARTICULUS I.

*Explicantur quinque status naturæ humanæ.*

**S**tatus naturæ puræ importat naturam cum suis principiis intrinsecè constituentibus, & iis, quæ ex illis sequuntur. Hinc.

*1mo.* Homo in natura pura conditus foret sine peccato, sine gratia sanctificante, sine virtutibus infusis, sine auxiliis gratiæ supernaturalis, quæ hæc illi non debentur ex ejus principiis.

*2do.*



2do: Foret obnoxius fami, siti cruci-  
anti, labori, morbis & morti.

3tio. Obnoxius foret ignorantiae, quia  
ob phantasmata intellectûs facile à verò  
deviare posset; & concupiscentiae, quia  
sæpè appetitus sensitivus ferretur in bo-  
num sensibile contra dictamen rationis.

4to. Finis ultimus seu beatitudo obje-  
ctiva hominis in hoc statu foret DEUS,  
ut Author naturalis. Beatitudo formalis  
foret perfecta conjunctio cum ipso, illum  
cognoscendo abstractivè seu per affectus,  
& constanter ei adhærendo per amorem.

5to. Ad obtinendum hunc finem per  
observantiam præceptorum naturalium  
& victoriam concupiscentiae, darentur  
auxilia ordinis naturalis, sufficientia o-  
mnibus, efficacia quibusdam.

*Status naturæ integræ.*

Hic consistit in perfecta subjectione  
corporis ad animam, & appetitûs sensi-  
tivi ad rationem; proindè importat im-  
munitatem ab ignorantia, concupiscentia,  
morte, passionibus naturam alterantibus.  
In ea naturæ integritate creatus fuit A-  
dam, non autem in natura pura ut visum  
fuit quibusdam tempore S. Thomæ 1.  
p. q. 95. a. 1. in 2. dist. 29. q. 1. In ea,  
inquam, integritate, quantum ad immor-  
tali-

talitatem constat Gen. 2. & Sap. 2. Rom. 5. Quantum ad immunitatem à concupiscentia Gen. 3. Et ideo Apost: vocat concupiscentiam peccatum, quia de peccato orta est, ut definivit Trident.

Donum integritatis situm erat in quodam vigore, quo homo corpus & appetitum sensitivum, ita sub Dominio continebat, ut nihil in eis contra voluntatem accideret. Quantum ad defectum senectutis, contra quem hic vigor nihil poterat, aderat lignum vitæ, cujus proprius effectus erat, vim vegetativam à simili langvore præservare.

*Status justitiæ originalis.*

Quia status naturæ integræ & status justitiæ originalis in Adamo fuerunt adunati, sæpè à Patribus & Theologis confunduntur. Hunc felicissimum statum, qui per Antonomasiā vocatur status innocentiae, S. Thomas eleganter describit opusc. 2. cap. 185, eumq; constituit in perfecta subiectione rationis ad DEUM, appetitûs sensitivi ad rationem, & corporis ad animam, quæ duo ultima sequebantur ad primum.

Hinc sequitur *1mo*. Adamum immunitem fuisse à fame &c. ut supra. *2do*. Quod habuerit omnes virtutes infusas, quia  
hæ



hæ sequuntur ad gratiam sanctificantem. 3tio. habuisse plenitudinem scientiæ rerum naturalium & supernaturalium, quantum exigebat dignitas capitis hominum.

*Adverte:* Gratia primi status (innocentiæ) dicitur gratia naturæ, non quod naturæ deberetur, sed quia data est naturæ in ejus institutione, & cum natura & ratione naturæ personis communicanda, tanquam dos naturæ, ex singulari beneficio Creatoris illi collata; eadem ratione dicitur justitia originalis, & gratia Creatoris. Gratia verò hujus status non potest dici gratia naturæ, nequè justitia originalis, quia primò per se personam respicit sanandam, & ratione personæ naturam; neq; datur & accipitur cum natura, sed per actus proprios, nempe per fidem, bona opera, & Sacramentorum susceptionem, & vocatur gratia Salvatoris.

*Status naturæ lapsæ.*

In hoc statu natura humana per peccatum Adæ spoliata fuit gratia sanctificante, virtutibus ei annexis & donò integritatis, & aliis donis, quæ habuit in statu justitiæ originalis. Insuper in naturalibus fuit vulnerata, & quatuor ejus sunt vulnera nempe ignorantia in intellectu

lectu, malitia in voluntate, concupiscencia in appetitu concupiscibili, infirmitas in irascibili. Hujus miseri status juxta SS. Patres typum habemus Luc. 10. in parabola hominis, qui descendens, *ab Jerusalem in Jericho incidit in latrones. Homo quidam*, Adam sed genus humanum, *descendebat ab Jerusalem in Jericho*, exulabat è Paradiso seu loco pacis, in miseras & defectus hujus mortalitatis; *incidit in latrones*, peccatum subjecit hominem potestati dæmonum; *qui despoliaverunt eum*, per peccatum fuit gratuitis donis spoliatus; *plagis impositis abierunt*, & vulneratus in naturalibus; *semi-vivò relicto*, quia anima manente immortalis, corpus factum est mortale; vel quia libertas arbitrii fuit per peccatum imminuta, non omnino autem extincta.

*Status naturæ reparatæ.*

Hic status variis nominibus exprimitur in Scriptura Luc. 1. 1. Tim. 2. Joan. 8. *redemptio* & *liberatio*, scilicet à captivitate diaboli & peccati. Ephes. 2. *Resuscitatio, vivificatio*; 2. Petr. 2. *Sanatio*; 2. Cor. 5. *Reconciliatio, & renovatio*. Convenit hic status cum statu innocentiae in hoc, quod uterq; tendat ad eundem terminum, nempe beatitudinem  
super-




supernaturalem, & quod in utroq; principium meriti sit gratia sanctificans, eadem quoad substantiam.

Sed longè pluribus titulis differunt. *Amò: ex parte finis: Finis remotus, cujus gratia status innocentiae, fuit manifestatio liberalitatis Divinae; statûs naturæ reparatae manifestatio misericordiae. Finis cujus gratia proximus statûs innocentis fuit imago DEI Creatoris homini imprimenda; naturæ reparatae imago Christi Redemptoris, in quantum conditio permittit, imprimenda juxta id Rom: quos prædestinavit conformes fieri imagini Filii sui. Finis cui innocentiae erat ipse homo exornandus & glorificandus; naturæ reparatae est ipse Christus, ad cujus gloriam omnia hujus statûs referuntur.*

Ex parte causæ efficientis differunt, quamvis utriusq; DEUS sit causa efficiens, diverso tamen modo; est enim causa efficiens statûs innocentiae immediate; statûs autem naturæ reparatae per Christum, ita ut Christus sit causa moralis reparationis, quam sua passione nobis promeruit. & causa efficiens Physica, principalis quidem ratione Divinitatis, instrumentalis ratione humanitatis. Hinc causa

sa gratiæ in statu innocentiae erat naturæ extrinseca, in statu reparationis est ipsi intrinseca, nimirum Verbum Caro factum, & proinde fædus DEUM inter & hominem est æternum & indissolubile ratione unionis hypostaticæ; *sponsabo te mihi in sempiternum* &c. Osee 2.

Circa hos igitur status occurrunt tres difficultates, magna contentione agitatæ; *Prima*: Utrum status naturæ puræ sit possibilis? *Secunda*: Utrum homo in statu naturæ lapsæ habeat minores vires ad bonum, quàm habuisset in statu puræ? *Tertia*: an homo innocentiae indiguerit auxilio quo seu, quod idem est, efficaci ad faciendum bonum & perseverandum in eo? Igitur.



## ARTICULUS II.

*Utrum status naturæ puræ fuerit possibilis?*

**H**Unc statum nunquàm extitisse jam diximus, & S. Aug. totus fuit, ut ejus existentiam in Adamo impugnet adversus Pelagianos. Quæstio igitur est de possibilitate.

Jansenius Tom. 2. tribus libris contendit esse absolute impossibilem statum naturæ



turæ puræ, & justitiam originalem cum dono integritatis fuisse naturalem in Adamo, non solum hoc sensu, quod illi cum natura collata sit (non tamen sic quod sit humanæ naturæ proprietas) sed hoc sensu, quod rationi, æquitati, & ordini providentiæ ita sit consentanea, ut homo non potuerit sine illa creari, absq; læsione bonitatis, justitiæ & sapientiæ Divinæ, & recti ordinis providentiæ. Jansenio præiverant Lutherus in cap. 3. Gen. Calvinus lib. 2. Instit. c. 15. & Bajus. Communis sententia est, statum naturæ esse simpliciter possibilem,

*Dico:* Fuit simpliciter possibile DEO creare hominem in statu naturæ puræ, scilicet sine peccato, sine gratia, sine dono integritatis, obnoxium morti, ignorantiae, & concupiscentiæ. Contra Jansenistas; ex parte contra Estium & alios quosdam, qui donum integritatis excludentes concupiscentiam defendunt, pro illo statu.

*Prob:* Status naturæ puræ explicatus in Concl: nequè ex parte hominis, neq; ex parte DEI repugnat; quidquid dicat Jansenius; Ergo. *Prob. una pars Ant.* Nequè gratia sanctificans, neq; donum integritatis & immortalitatis sunt debita natu-

naturæ humanæ secundum se spectatæ, sed merè gratuitò collata. *Conseq. patet.* quia donum gratuitum potest concedi vel negari. *Prob. Ant.* Gratia propriè dicta est ordinis supernaturalis, & præstat effectus supernaturales. Pariter donum integritatis & immortalitatis non est naturæ debitum; siquidem nullum est debitum; ut homo eximatur à defectibus naturam consequentibus, ut patet in potentia peccandi, quæ in Adamo innocente ligata non fuit, etsi Deus eam ligare potuisset, si voluisset; atqui ignorantia, concupiscentia, passibilitas, mortalitas consequuntur ex principiis humanæ naturæ, ut docet S. Thom. . . . cont. gent. cap. 52. & nos diximus supra. Unde S. Aug. lib. 4. cont. Julianum cap. 16. loquens de concupiscentia: *Gratia Dei inquit, ibi magna erat, ubi terrenum & animale corpus bestialem libidinem non habebat.* Ergo. Insuper homo creatus in puris naturalibus, haberet omnia, quæ ipsi competunt naturaliter. Nam in ordine Physico homo constituitur corpore & anima rationali cum suis proprietatibus & potentiis; In ordine morali exigit habere liberum arbitrium, suum finem, & media illi proportionata  
cogno-



cognoscere, atq; per ea finem posse assequi; atqui hæc omnia haberet in statu naturæ puræ. De principiis & libero arbitrio nulla difficultas; de cæteris probatur. Finis proximus hominis in statu naturæ puræ foret bonum honestum, finis ultimus DEUS ut Author naturæ; media ad illum finem consequendum actus morales boni per auxilia ordinis naturalis; hæc autem omnia, cum naturam non transcendant, cognosceret; nec deessent illi auxilia præfata, quibus per bonos actus morales hunc suum finem ultimum assequi posset, hoc enim Divinam decet providentiam, & in exemplo status elevationis &c. patet.

*Ex his spontè fluit secunda pars, scilicet statum naturæ puræ non repugnare ex parte DEI. Si enim gratia supernaturalis, donum integritatis & immortalitatis non sunt debita naturæ humanæ, hæc dona DEUS illi denegare potuit, absq; læsione suæ justitiæ, bonitatis & sapientiæ, sicut illi denegaret, & de facto Adamo denegavit donum impeccabilitatis. Ergo.*

*Confirm. Autoritate S. Augustini lib. 1. Retract. cap. 9. Ad miseriam, inquit, iustæ damnationis pertinet ignorantia & difficultas --- quævis etiam si essent hominis*

*minis primordia naturalia, nec sic culpandus Deus, sed laudandus esset. Et morti proximus libr. de dono persever. cap. 11. Etiam si verum esset ignorantiam & difficultatem, sine quibus nullus homo nascitur, primordia, non supplicia esse naturæ, vincerentur tamen Manichæi, idest non propterea naturæ Author esset culpandus. Cum autem alii defectus minus repugnent, à fortiori potuit homo creari cum illis. Augustinum sequitur S. Thomas in 2. d: 31. q. 1. a. 2. Et 4. cont. gent. c. 52.*

*Obj. amo: Homo non potest condi in eo statu, in quo non posset diligere Deum super omnia amore casto & gratuito; quia absq; tali amore non potest obtineri beatitudo etiam naturalis; atqui in statu naturæ puræ homo non posset diligere &c. Ergo.*

*R. D. Maj. Amore tam naturali quam supernaturali C. in quo non posset &c. amore supernaturali, posset autem amore naturali N. Maj. dist. Min. N. Conseq. In hoc statu diligeret homo Deum super omnia amore naturali, ad quem suffecisset virtus naturæ, adjuncta auxiliis ordinis naturalis, quæ non deessent pro illo statu, ut jam diximus. Amor enim sequitur*



quitur cognitionem boni, unde Divina bonitas cognita discursu naturali, ut fons totius esse naturalis, fundat naturalem DEI amorem. Vid. S. Thom. 1. 2. q. 109. a. 3. & 2. 2. q. 26. a. 3. & in cap. 13. 1. Cor. Lect. 4. Vide etiam Gonet. Disp. 6. a. 2. § 1. ubi retundit vanos clamores Jansenistarum.

*Dices.* Amor castus & gratuitus DEI super omnia est præcipuum opus gratiæ, nec nisi à DEO est, ut dicit S. Aug. lib. 5. cont. Julian. c. 3. Ergo.

*R. D. Ant.* opus gratiæ naturalis (si est amor naturalis) *C.* gratiæ omnino supernaturalis *N. Ant.* *Imò* juxta dicta; Amorem naturalem DEI fore etiam à DEO in statu naturæ puræ per auxilia ordinis naturalis. *2do* Augustinum loqui de homine in hoc statu corrupto, qui ut infra dicetur non potest sine gratia Christi efficaciter DEUM diligere super omnia.

*Instabis Imò:* Homo in statu naturæ puræ non posset servare omnia præcepta DEI; Ergò nec ipsum diligere super omnia amore saltem efficaci. *Prob. Ant.* Homo in statu naturæ puræ non haberet majores vires naturales, quàm in hoc statu naturæ lapsæ; in quo naturalia man-

D

ferunt

serunt integra; atqui in hoc statu naturæ lapsæ non potest sine auxilio gratiæ servare omnia DEI præcepta etiam naturalia. Ergo &c.

*R. N. Ant. ad prob. D. Maj.* Non haberet majores vires entitativè & intrinsecè, quàm in hoc statu naturæ lapsæ. *Transfeat.* Non haberet majores vires, nec minora impedimenta bonæ actionis. *N.* Esto igitur, vires naturales entitativè, & quoad substantiam non esse immutatas in hoc statu naturæ lapsæ; attamen ex peccati corruptione plurima saltem provenerunt impedimenta ad bonum virtutis etiam naturalis, quæ non fuissent in statu naturæ puræ. Undè in præsentī statu vires sunt minùs habiles ad servandā præcepta etiam naturalia, propter quod indiget gratiā Salvatoris seu sanante.

*Instab. 2do.* Homo in statu naturæ puræ secundùm nos non haberet partem inferiorem perfectè subordinatam superiori, & pateretur rebellionem adversus spiritum; atqui ob illam continuam rebellionem, quæ præceps ruit in peccatum, non posset servare omnia mandata. Ergo.

*R. D. Min.* Non posset ex solis viribus naturæ servare *C. Min.* viribus ut adju-



adjutis auxiliô ordinis naturalis concessio à Deo ut Authore naturali *N. Min. & Conseq.* Datô in statu naturæ puræ fore rebellionem carnis, adeflent tamen auxilia ad eam vincendam, omnibus quidem sufficientia; præordinatis efficacia. Et licet ista forent specialia & indebita singulis individuis, forent tamen debita naturæ pro aliquibus, nè in vanum naturam condidisset Deus ad finem, quem nullum ejus individuum consequeretur.

*Obj. 2do:* Homo pro statu naturæ puræ in termino non foret perfectè beatus beatitudine naturali; quia non foret beatus quoad corpus; cum resurrectio corporum pro illo statu non foret, utpotè supernaturalis. E.

*R.* Quidam concedunt in hoc statu non fuisse futuram resurrectionem; ideoq; hominem privatum iri aliqua accidentaria beatitudine, sicut Sancti sunt modo beati ante resurrectionem. Alii concedunt resurrectionem corporum, utpotè quæ supernaturalis solùm est quoad modum tantum, non terminum, cum nec admisceat aliquid gratiæ, nec elevet naturam supra conditionem suam, non repugnaret in statu naturæ. Alii dicunt: quod justus non moreretur, non quod

donô immortalitatis donaretur; sed quia illum transferret DEUS in locum beatitudinis ad hoc destinatum. Hæ omnes sententiæ sunt probabiles; secunda præ aliis placet.

*Petes: 1.* In hoc statu an esset locus remissioni peccatorum?

*R. affirm.* Sive per externam condonationem, sive per aliquam qualitatem naturalem infusam, sive aliô, quem voluisset DEUS modô. Quod si pertinaciter contendas remissionem peccati non posse fieri sine gratiæ infusione, nihil aliud probas, quàm quod homo peccando transiret à statu naturæ puræ, ad statum naturæ lapsæ, & pœnitendo ad statum naturæ reparatæ, sicq; statum naturæ puræ non fore stabilem, non tamen impossibilem. Plura Vid. apud Auth.

*Petes 2do:* Utrùm homo in statu naturæ lapsæ nondùm reparatæ minores vires habeat ad bonum morale, quàm habuisset in statu naturæ puræ? Hæc est altera difficultas. Multa hic supponuntur, quæ pertinent ad quæstionem de peccato originali. Ad quæstionem varii variè respondent.

*R.* Vires naturales hominis ad bonum morale ordinis naturalis, in statu naturæ lapsæ



lapsæ, nondum reparatæ, non sunt imminutæ intrinsecè, & quoad entitatem; probabilius tamen esse minus habiles ad bonum morale extrinsecè, & ex appositione impedimenti, quod non fuisset in natura pura, atq; hoc sensu posse dici minores, quàm fuissent in natura pura. *Utraquè pars deducitur ex variis locis S. Thomæ, imprimis hac in parte q. 85. a. 10. Et in 2. d. 39. q. 1. a. 1. ad 3. & alibi.*

*Ratio primæ partis:* Vires naturales hominis ad bonum morale ordinis naturalis, scilicet intellectus, voluntas, & appetitus sensitivus sunt proprietates uniformiter manantes ab essentia; consequenter sicut essentia non admittit plus aut minus, sic nec vires præsertim intellectus & voluntas, qui cum sint spirituales, sunt incorruptibiles.

*Secunda pars:* Est conformior modo loquendi SS. Patrum & Theologorum: qui dicunt per peccatum originale non solum fuisse spoliatum, gratuitis, sed etiam vulneratum in naturalibus. Adamum peccando secundum corpus & animam in deterius fuisse mutatum, & liberum arbitrium esse viribus attenuatum.

## ARTICULUS III.

*Utrum tam Adamo quàm Angelis necessaria fuerit gratia per se efficax ad perseverandum?*

**R**Es hic nobis est cum Jansenio & Theologis Augustinianis. Hi quamvis in hoc statu admittant necessitatem gratiæ per se efficacis, contendunt tamen ex S. Aug. lib. de Correp. & gratia cap. 10. 11. & 12. eâ Adamum & Angelum non indiguisse ad perseverandum, sed sola gratiâ indifferenti, & versatili, pendente à nutu liberi arbitrii, qualem Molinistæ admittunt pro præsentis statu. Thomistæ propugnant necessitatem gratiæ efficacis pro utroque statu, cum hoc discrimine, quod in primo statu esset gratia sanitatis, in secundo medicinalis, seu ut d: Aug: *illa sit latior, ista potentior.*

*Dico:* Juxta S. August. Gratia per se efficax fuit Adamo & Angelis necessaria ad perseverandum. Cùm hic de mente S. Augustini agatur.

*Prob. Concl.* Ex clarissimis S. Aug. testimoniis. Palmare habetur lib. 12. de Civit. Dei cap. 9. ubi ex professo S.  
Præ-



Præsul quærit id, quod nunc agimus, unde nempe processerit bona voluntas Angelorum, quâ aliis cadentibus, illi steterunt: *An Sancti Angeli, quem habent creatorem naturæ, eundem habeant bonæ voluntatis (illius nempe volitionis, quâ perseveraverunt) Auctorem per Spiritum S. in eis charitate diffusa?* Quid huic quæstioni respondere possunt adversarii? Utrosquè Angelos bonos & malos habuisse gratiam versatilem, bonos suò consensû fecisse efficacem, malos dissensu inefficacem, eaque de causa illos stetisse in accepta iustitia, hos cecidisse. Non sic S. August: *Si utriquè boni æqualiter creati sunt, istis mala voluntate cadentibus, illi AMPLIUS aduti ad eandem beatitudinis plenitudinem, unde se nunquam casuros certissimi fierent, pervenerunt.*

*Respondent* uno: Augustinum per *ly amplius aduti*, non intelligere adjutorium viæ, quo perseverarunt, & pervenerunt ad beatitudinem, sed de adjutorio Patriæ, loqui quod est vel lumen gloriæ vel certitudo de perpetuitate beatitudinis.

*Sed contra:* Beatitudo est terminus amplioris adjutorii in phrasi S. Augustini. Ergo beatitudo non est amplius adjutorium. Si dicerem de duobus Romam pergenti-

gentibus, unum amplius adjutum Romam pervenisse, alterum in via stetisse; quis per hoc adjutorium intelligeret adventum in urbem, & nonne potius equum seu rhedam, vel aliud medium, quo alter fuit privatus. *Sed.*

*Dicunt S. D. lib. de Correp. & gratia cap. 12. vocat beatitudinem adjutorium. R. Aliud est dicere beatitudinem adjutorium, quò quis continuo est beatus; aliud beatitudinem esse adjutorium quo pervenitur ad beatitudinem. Nec obstat, quod August. remittat Lectorem ad librum præcedentem, ubi dicit Angelos certam suæ sempiternæ felicitatis scientiam recepisse. Id enim non negamus, sed negamus hanc scientiam esse amplius adjutorium, quo adjuti pervenerunt ad beatitudinem, ut hic d: Aug. cum hanc scientiam nonnisi adepta beatitudine acceperint.*

*Respondent 2do: Augustinum intellexisse amplius adjutorium intra lineam auxilii sufficientis & versatilis, non autem efficax.*

*Contra: Aug. intellexit amplius adjutorium, quod esset certa causa, cur ii præ aliis ad DEUM se coconverterent & perseverarent, de hoc enim erat quæstio; sed*  
quale-



qualecunq; auxilium versatile non potest esse causa certa bonæ voluntatis. Insuper sequeretur juxta resp. Angelos perseverantes seipsos fecisse meliores, quàm à DEO sint facti, quod est contra principium Augustini.

*Nec dicas cum P. Henno.* Augustin: hoc dictum retractasse in lib. de correptione & gratia. Nam P. Berti ejusdem opinionis; arbitratur P. Henno ita sentire *nulla ductum ratione*, & merito: *imo*: quavis quinque aut sex libros priores de Civitate DEI Augustinus composuerit ante librum de Correptione & gratia, probabilius est tamen reliquos post ipsum, & sub vitæ circa annum 429. fuisse scriptos, ut observat coquæus in Præf. ad hos libros, & probat Rivius lib. 3. cap. 13. § 4. *2dò*: Augustinus nec in libris Retractionum, nec alibi hujus retractationis meminit.

Tandem placet in medium afferre conclusionem S. Aug. in dicto cap. quæ est responsio ad quæstionem propositam: *Ad S. Angeli, quem habent &c.* ut supra sic concludit: *Confitendum est igitur cum debita laude Creatoris non ad solos sanctos homines pertinere, verum etiam de S. Angelis posse dici, quod charitas Dei diffusa*

*sa sit in eis, per Spiritum S. qui datus est eis. Vides DEUM, desiniente Auguftino, bonam voluntatem operatum esse in Angelis per effusionem alicujus novæ charitatis actualis; sicut operatur in Viris Sanctis. Subsumo: atqui gratia per quam DEUS operatur in Viris Sanctis bonam voluntatem non est merè sufficiens & versatilis, sed per se efficax; non est auxilium sine quo, sed quo, ut totis nervis contendit Berti cum Thomistis contra Molinistas E.*

Adverte hucusq; dicta spontè fluere ex illo principio, quod S. Doctor loco citato de Civit. DEI ab initio statuit: *Non potuerunt, inquit, facere seipsos meliores, quàm eos (Angelos) ille (Creator) fecerat, quò nemo quidquam melius facit, profectò & bonam voluntatem, quæ meliores essent, nisi operante adjutorio Creatoris habere non potuerunt. Innumera ferè sunt, quæ hic ex S. Doct. possent adferri, quæ videantur in Aut. Pauca addam.*

S. Doctor in Enchyridio cap. 106. *Homo, inquit, in Paradiso ad se occidendum relinquendo justitiam idoneus erat per voluntatem, ut autem ab eo teneretur via justitiæ, parum erat velle, nisi ille, qui*  
eum




*eum fecerat, adjuvaret. Ex quo evidenter sequitur, Adamum præter originalem justitiam & gratiam versatilem, seu auxilium sine quo, quod & sufficiens dicitur, quod habuit, & quod si defuisset, nunquam sua culpâ cecidisset, indiguisset alterò efficaci adjutoriò ad bonum seu auxilio quo. Videatur S. Aug. Serm. 11. de Verbis Apos. cap. 2. lib. 14. de Civit. DEI cap. 27. Lib. 11. de Gen. ad lit. cap. 4. Tandem lib. 1. Retract. cap. 9. ponit generale exemplum, quod currit etiam pro statu innocentiae. Cum omnia bona, inquit, & magna & media & minima à Deo sint, sequitur, quod etiam ex Deo sit bonus usus liberi arbitrii, qui in magnis numeratur bonis.*

Huic generali principio possunt addi alia, quæ ex illo sequuntur. Primum supra adductum. Secundum est huic finitimum: non posse hominem homini esse meliorem, quam DEUS homini sit. Ita in Enar. in Psal. 58. Tertium: neminem habere à seipso in ordine super naturali, de quo in semetipso possit gloriari, & quo ab aliis se discernat, de dono Persev. cap. 13. quod principium etiam ad Angelos extendit lib. 11. de Civit. DEI cap. 9. atqui in systemate AA. unus  
Ange-

Angelus habet à se, quo possit gloriari, nempe consensum, & bonum usum arbitrii, quem non habet alter. Forte gratia versatilis bonum à malo discernet? Nequaquam: *Gratia enim, quæ est communis bonis & malis non discernit bonos à malis*, inquit S. D. de nuptiis & concupis c. 3. & lib. de Predest. cap. 5.

Quartum principium: Creatura innocens debebat petere à DEO donum perseverantiæ, & eâ obtentâ gratias agere. 14. de Civ: DEI cap. 17. Quintum Aug. principium est inscrutabilitas hujus quæstionis: cur unus gratiæ consentiat, non alter? de dono Persev. c. 9. & 12. de spir. & lit. c. 33. & alibi.



#### ARTICULUS IV.

*Objectiones solvuntur.*

**A**D germanam explicationem doctrinæ S. Aug. & celebris distinctionis, adjutorii quo, & sine quo, prænotandum quid Augustinus intelligat nomine adjutorii sine quo, an ipsam justitiam originalem, an aliquod donum supernaturale superadditum habituale, non conveniunt Theologi; sed quidquid sit, non pertinet ad præsens institutum; cum  
de



de solo adjutorio *quo* agatur. Id tantum notandum, illud donum habituale, alias adjutorium *sine quo* congruè vocari à Theologis auxilium sufficiens, quia per auxilium sufficiens redditur homo potens ad operandum bonum supernaturale, quò etiam nomine vocantur in natura lapsa quædam gratiæ actuales. Auxilium *quo* ab omnibus intelligitur auxilium actuale efficax. Porro Thomistæ ut ostendant necessitatem auxilii efficacis non fuisse ab Augustino negatam pro statu innocentie lib. de Correp. & gratia.

*Observant*: Non omne auxilium efficax esse ejusdem conditionis & virtutis: Aliud est movens tantum & applicans potentiam ad agendum; Aliud non solum movens & applicans, sed sanans & roborans. Primum dicunt necessarium fuisse Adamo & Angelis ratione dependentie à Deo in agendo, non secundum; quia eorum natura cum esset sana & integra, non egebat auxiliò medicinali & sanativò, quali nunc indiget natura nostra infirma & vulnerata, cui proinde necessarium est auxilium movens & applicans, quod simul est sanans & roborans. Augustinum verò cum à statu nature innocentis excludit auxilium *quo* & effi-

cax,

cax, loqui de auxilio fanante & roborante, non de adjuvante simpliciter & applicante, quod aperte colligunt ex ejus verbis cap. 11. ubi ait; *Ille Adam, non opus habebat eo adjutoriô, quod implorant isti* ( Sancti in hac vita ) *cùm dicunt: Video aliam legem in membris meis &c.*  
 ---- *Ille verò nulla tali rixâ à seipso adversus seipsum tentatus atquè turbatus in illo beatitudinis loco sua secum pace fruebatur.* Alterum dicendi modum adducit Author ex P. Antonio Goudin, qui cum priore coincidit,

*Obj. 1mò: S. August. cap. 10. 11. 12. de Correp. & gratia pluries dicit: datum esse Adamo adjutorium perseverantiæ, non quò fieret ut perseveraret, sed sine quo per liberum arbitrium perseverare non posset; justis autem prædestinatis in hoc statu dari adjutorium, quò perseverant. E.*

*R. Id à nemine negari. Indubium enim est Adamo non fuisse concessum adjutorium quo perseveraret, alioquin perseverasset, sed nihil pro Adversariis; non enim quærimus, an Adam habuerit istud adjutorium, sed an illò indiguerit.*

*Instant 1mò: S. Augustini est dictum gratiam Adami fuisse minorem sed lætiores,*



orem, gratiam Christi esse tristiores, sed fortiores.

*Responderi* potest S. D. loqui de gratia perseverantiæ, quæ de facto concessa fuit Adamo, non de illa qua indigebat. Sed dato Augustinum contulisse gratiam Christi, cum gratia Adami, non quam habuit, sed quam habuisset, si perseverasset, & qua illi opus erat ad perseverandum, non sequitur gratiam Adami fuisse versatilem & non efficacem; quia inter gratias efficaces sunt aliæ aliis potentiores, eæ scilicet, quæ ad plures, nobiliores & difficiliore effectus edendos ordinantur. Quis enim dubitat gratiam, quæ prostravit Saulum furentem fuisse potentior, quàm quæ convertit latronem in cruce sua crimina expiantem. Porro gratia Christi ordinatur ad plures & difficiliore effectus, nempe ad sananda vulnera naturæ, ad vincendam rebellem concupiscentiam &c. quàm gratia Adami, in quo erat natura sana, ideò hæc minor sed lætior, ista tristior sed potentior.

*Instant. 2do:* S. Aug. totis tribus capitibus præfatis asserit: *Tale fuisse adjutorium datum, quod desereret cum vellet, & in quo permaneret, si vellet --- Deum suam gratiam dimisisse libero Adami arbitrio*

*bitrio --- perseverare in ejus fuisse arbitrio relictum &c.* atqui hæc apertè significant gratiam versatilem. E.

R. N. Min. Ex duplici ratione 1<sup>mo</sup>. quia Augustinus similes loquendi formas usurpat loquens, de gratia hujus statûs, ex quibus tamen colligi non potest, hujus statûs gratiam agnovisse versatilem, & exclusisse efficacem. Sic lib. ad simplicianum: *Si Esau voluisset cucurrisset.* Sic lib. 12. de Civit. DEI cap. 6. *Si eadem tentatione ambo tententur, & unus ei cedat, alter idem quod fuerat perseveret, quid aliud apparet, nisi unum voluisse, alterum noluisse à castitate deficere.* Hoc modo loquendi solum ostendit causam immediatam boni operis, & perseverantiæ, scilicet liberum consensum arbitrii, salvo semper jure primæ Causæ, à qua causa secunda habet, ut velit & faciat, ut ipsemet August. apertè declarat lib. 1. Retrac. cap. 10. ubi cum Pelagiani similibus loquendi formulis à se usurpatis vg. *hominas posse benè agere, si velint*, abuterentur, monet se hos dixisse absq; præjudicio gratiæ, quâ DEUS operatur in hominibus: *Verum est enim omnino omnes homines hoc posse, si velint, sed preparatur voluntas à Domino.* 2<sup>do</sup>:

Id



Id etsi facta paritas non probaret, evincerent formales textus & principia in probatione allata.

*Instant 3tio: S. Aug. dicit: Angelos Sanctos cadentibus aliis per liberum arbitrium, per idem liberum arbitrium alios stetisse; atqui mali Angeli ceciderunt per liberum arbitrium sine novo gratiæ beneficio; Ergo si per idem liberum arbitrium steterunt boni, steterunt sine novo gratiæ beneficio.*

*R. D. Maj. S. Angeli steterunt per idem liberum arbitrium, per quod mali ceciderunt, per idem identitate virium ex donis habitualibus quoad actum primum C. Quia omnes Angeli tam boni quam mali in sua creatione fuerunt gratiâ sanctificante & virtutibus infusis donati. Per idem identitate adjutorii actualis, & quoad actum secundum N. Maj. Invictè enim probavimus ex S. Aug: Angelos beatos amplius fuisse adjutos. Insuper ad Min: certum est Angelos bonos stetisse per gratiam saltem (in gratiam AA.) sufficientem, malos non cecidisse per gratiam. Sicut ergo August: dicens *per liberum arbitrium*, non excludit juxta AA. sufficientem, ita juxta nos, non excludit efficacem.*

E

Obj.

*Obj. 2do.* S. Aug: in fine cap: 12. ponit casum, quo Adam perseverare voluisset, & dicit in eo casu non defuturum illi fuisse adjutorium DEI *sine quo* perseverare non posset, defuturum tamen fuisse, quò DEUS operaretur ut vellet; E, apertè censet Adamum non indiguissè auxilio quo, seu efficaci ad perseverandum.

*R. 1mo.* Hanc interpretationem textûs directè contradicere Apostolo dicenti DEUM operari in nobis *velle & perficere.*  
*2do D. Consequens:* Ergo Augustinus censet Adamum non indiguissè auxiliò quo seu efficaci sanante & roborante C. simpliciter movente & applicante N. *Vel quod idem est.* Non indiguissè auxiliò speciali secundum providentiam extra ordinariam movente ad aliquid excedens vires C. auxiliò communi ex providentia ordinaria collato secundum conditionem virium. N. De primo enim totis illis capitibus unicè loquitur & quærit Augustinus: Utrum scilicet necessarium fuerit Adamo auxilium, *quod implorant Sancti in hac vita &c.* Utrum autem fuerit Adamo necessarium alterum commune auxilium secundum consuetam providentiam & conditionem virium simpliciter movens & applicans, non quidem hic asserit




ferit Augustinus, sed supponit & alibi docet, ut vidimus.

*Collig: 1<sup>mo</sup>.* S. Aug: necessitatem auxilii, quò creata voluntas ad bonum inclinabiliter inclinatur, repetit non solum ex infirmitate naturæ lapsæ, verum etiam ex dependentia creaturæ à Deo. Ex utroque capite necessarium est illud auxilium creaturæ rationali in statu naturæ lapsæ, ex secundo, in statu innocentie.

*Collig: 2<sup>do</sup>.* Nos distingvere inter adjutoria utriusq; statûs, non solum ratione titulorum, quod natura innocens unico titulò indigeret auxiliò efficaci ob subordinationem & dependentiam scilicet; natura verò lapsa duplici titulò, illò nempe & præterea titulò infirmitatis, ut putant AA. sed distingvimus ipsa adjutoria ratione sui, quatenus unum est specialius & potentius alterò. Hinc.

*Collig: 3<sup>tiò</sup>.* Quod non omnis gratia est sanativa ex se, quia est ex se efficax, sed ad hoc requiritur fortior & specialior virtus. Unde gratia primi status fuisset per se efficax respectu naturæ sanæ, non verò respectu naturæ infirmæ, nisi virtute superaddita. *Plura vide apud Auth: tum hic tum de scientia media, Antonium Gou-*


*din Tract: de gratia q. 2. art: 5. & fusius  
Tract: de Prædest: q. 2. a. 4.*



## DISSERTATIO II.

### *De necessitate gratiæ.*

Cum Author Capitulorum, quæ ad tempus, quo celebrabantur Congregationes de Auxiliis sub Clemente VIII. & Paulo V. Pontificibus, Cælestino Papæ adscribebantur cap: 12. definiat: *Gratiæ operi & dignationi nihil penitus esse detrahendum*, meritò hic de gratiæ necessitate tractandum. Sed in memoriam reducenda, quæ ab initio contra Pelagianos & Semi-Pelagianos sunt disputata. Igitur.



## ARTICULUS I.

### *Quid intelligitur gratiæ nomine?*

*amo.* **G**ENERALI nomine gratiæ ea omnia comprehenduntur, quæ ex mera DEI benignitate, non ex meritis nostris nobis sunt concessa, sic ipsum vivere, velle nostrum &c. gratiæ dicuntur. Hæc & similia etsi dicantur gra-



gratiæ, non tamen possunt dici auxilia gratiæ, quia auxilium supponit eum, qui adjuvatur, & ejusdem potentias, quas adjuvat. Hinc.

2dò. Gratia propriè Scripturæ & Ecclesiæ sensû accipitur pro dono gratuito sive habituali sive actuali naturæ superaddito. Utraq; ad duplicem ordinem spectat, naturalem nempè & supernaturalem. Naturalis gratia, quæ movet ad bonum intra sphaeram naturalium, ut cùm DEUS alicui infundat lumen scientiæ naturalis, aut moveat specialiter ad rerum naturalium cognitionem. Supernaturalis, quæ vel habitû, vel motione adjuvat ad ea, quæ excedunt vires naturæ, ut dùm DEUS infundit alicui habitum fidei vel charitatis, aut movet ad alterutrum actum.

3tiò. Verùm quia gratia propriè elevat naturam, gratia præcisè sistens in bono naturali, minùs propriè dicitur gratia. Unde in rigore dicitur gratia vel habitus supernaturalis infusus, ut gratia sanctificans, & virtutes infusæ; vel motio supernaturalis, quâ nos movet DEUS ut primus Motor in ordine gratiæ ad actus supernaturales; vel etiam est DEI operatio, quâ res naturales dirigit ad salutem nostram.

4<sup>to</sup>. Gratia sumpta pro motione supernaturali est duplex, moralis & physica. Moralis fit per ostensionem boni, quandoquæ adjuncta infusione luminis ad illud percipiendum, & pertinet ad causam finalem. Physica fit per influxum effectivè & intrinsecè reducentem potentiam ad actum, proinde pertinet ad causam efficientem. DEUM utroq; modo movere voluntates docet S. Thom: 1. p. q. 105. a. 5. & alibi.

5<sup>to</sup>. Motio physica quandoq; est mera applicatio potentiae & virtutis praeexistens, ut cum DEUS movet voluntatem justi ad actus v.g. charitatis. Quandoq; licet sit applicatio potentiae, non est tamen applicatio virtutis; quia non praeexistit, sed eam secum adfert per modum transeuntis, ut dum DEUS voluntatem peccatoris movet ad actum attritionis vel contritionis.

6<sup>to</sup>. Motio illa physica, quæ est mera applicatio potentiae & virtutis praeexistens duplex est; una generalis, quâ DEUS ut primus & universalis Motor applicat potentias secundum exigentiam & modum earum ad actus sibi proportionatos. Altera est specialis, qua quandoq; mentem hominis applicat ad cogitanda vel vole-



volenda, quæ licet non excedant ejus vires, tamen secundum consuetum cursum & subiecti dispositionem, homo ea non cogitaret nec vellet, & hoc tam in naturalibus, quam in supernaturalibus, ut dum hominem justum subito movet sine prævia dispositione ad aliquid supernaturale cogitandum aut volendum, qua motione sic movetur homo, ut non se moveat, sicut dum movetur ad primam volitionem finis. Hæc autem motio specialis potest dici propriissimè auxilium gratiæ.

7mò. De altera motione generali, quâ DEUS ut primus Motor universalis in ordine naturæ & gratiæ applicat potentiam & virtutem præexistentem secundum ejus exigentiam, & consuetum rerum cursum, ad actus ipsi proportionatos, primo aspectu non videtur pertinere propriè ad auxilium speciale gratiæ, quia non datur gratuito sed ex connaturali quadam exigentia; sicut enim supposita collatione virtutis naturalis illi debetur motio, seu concursus generalis ipsam præmovens ad actum proprium, vg igni ad comburendum, ita; quod sine miraculo non possit illi denegari; sic quamvis justo data sit gratis virtus elevans ad bonum supernaturale, ea tamen supposita debetur quodam

dam modo juxta leges communis providentiæ, motio generalis illam applicans ad actus ipsi proportionatos. Attamen illa motio generalis si consideretur respectivè ad naturam secundum se, dicenda est motio generalis, & non auxilium speciale. Sed si ista motio consideretur respectivè ad hominem, cui datur, præ alio; tunc respectu hujus hominis potest & debet dici speciale auxilium gratiæ; quia quamvis natura non totaliter corrupta, exigat quandoq; moveri in bonum, non tamen hic homo præ altero exigit, ut hic & nunc potius, quàm alter moveatur in bonum. Unde quòd moveatur in bonum, à quo alter deficit, & à quo ipse deficere poterat, est ex auxilio speciali gratiæ, idest gratis collato. Hanc doctrinam tradit S. Thom: q. 24. de Verit: a. 14. Hicquè quàm maximè præ oculis habenda est ad enodandas difficultates alioquin intricatissimas hic tractandas; utpote quæ tollit æquivocationes & ambiguitates, ob quas multi deluduntur.



## ARTICULUS II.

*Utrum homo lapsus veritates supernaturales seu quæ sunt fidei, possit absque speciali gratia cognoscere & amplecti?*

**N**ihil omnino gratiæ esse subtrahendum innuimus supra. Hoc namque principium omnes admittunt, sed diversimodè explicant. Pelagiani dicebant DEUM esse Authorem omnis boni operis, quatenus dedit facultatem bene agendi. Semi-Pelagiani omnia opera bona in DEUM referebant, sed aliquod initium bonæ voluntatis & perseverantiæ libero arbitrio reservabant. Molina initium & progressum boni operis DEO simultaneè concurrenti tribuit, sed partialiter, nostrumque consensum minus ad DEUM referre videtur. Jansenistæ & Theologi Augustiniani totum bonum opus etiam bonum usum gratiæ in hoc præsentī statu DEO tribuunt; at in statu innocentiae bonum usum gratiæ libero arbitrio referunt. Unde Thomistæ Duce S. Doctore 1. p. q. 103. a. 3. & in hac q. a. 1. & seq; & alibi, sic illud principium explicant, quod DEUS non solum dedit homi-

ni & conservat virtutes benè agendi, sed etiam eas movet & applicat ad agendum. His enim duobus continetur, quidquid est entis & boni in opere. Igitur.

*Dico:* Homo non potest credere veritates naturales ex motivo supernaturali Divinæ revelationis sine gratia interna eaque speciali tam ex parte intellectûs quàm voluntatis. *Recollige dicta Dissert: 1. §. 3.* Concl: est *1mo* contra Pelagium, qui in primis statibus suæ hæreseos requirebat solum ad assensum fidei revelationem externam. *2dò.* Contra quosdam Theologos, qui dicunt hominem lapsum posse assentiri assensu naturali veritatibus revelatis & supernaturalibus, ex motivo Divinæ revelationis, & cùm edoctus fuerit requiri fidem seu assensum supernaturalem, posse illum optare & petere, sicq: faciendo viribus naturæ, quod in se est, se ad supernaturalia disponere, eaq: infallibiliter consequi, non quidem merito illarum actionum naturalium, sed ex pacto inter DEUM & Christum inito, quo *facienti ex viribus naturæ quod in se est gratia semper datur.* Hujus pacti intelligentia infra patebit, ubi ex professo de eo agemus.

*Prob: 1mo ex Scrip: Math: 11. Nemo novit*



novit Filium, nisi Pater, neq; Patrem quis novit, nisi Filius, & cui voluerit Filius revelare. Cap: 16. Caro & sanguis non revelavit tibi. (Divinitatem Christi) sed Pater meus. Idem habetur Ephes: 2. Et ne quis dicat hæc accipienda de revelatione externa. Apost: ad Ephes: 1. orat, ut Deus det illis Spiritum sapientiæ, & revelationis in agnitione ejus; illuminatos oculos cordis eorum, ut sciant, quæ sit spes vocationis ejus. Act: 16. Deus aperuit cor Lydiæ attendere his, quæ à Paulo dicebantur. Simile habetur 1. Thess: 1. 1. Cor: 3. Rom: 11. atqui, dare spiritum intelligentiæ, illuminare oculos cordis, aperire cor, Evangelium nuntiare non sermone tantum, sed in virtute & Spiritu S. &c. quæ his textibus continentur, proculdubio, non solum externam revelationem, sed gratiam internam dicunt. Unde concil: Arausicanum 2 Can: 5. Si quis augmentum, ita etiam initium fidei, ipsumq; credulitatis affectum - - - non per gratiæ donum, idest per inspirationem Spiritus S. corrigentem voluntatem nostram ab infidelitate ad fidem, ab impietate ad pietatem, sed naturaliter nobis inesse dicit, Apostolicis dogmatibus adversarius probatur. Idem habetur Can: 6. & Trid: Sess: 6. can: 3.

Prob:

*Prob: ex S. Aug:* Gratiae vindice, qui ante Episcopatum aliter senserat cap: 3. de Prædest: S. se retractat, maximè convictus hoc Apostoli testimoniò: *Quis te discernit? Quid habes, quod non accepisti? Si autem accepisti, quid gloriaris, quasi non acceperis?* Quo præcipuè testimoniò, inquit, etiam ipse convictus sum, cùm similiter errarem, putans fidem, quâ in Deum credimus, non esse donum Dei, sed in nobis esse à nobis.

*Suffragatur ratio:* Actus fidei, quo assensum præbemus veritatibus supernaturalibus ex motivo Divinæ revelationis, est supernaturalis. E. intellectus non potest illum elicere nisi adjutus supernaturali auxiliò. *Ant: prob:* Objectum hujus actus est supernaturale; atqui objectum supernaturale quæ tale non potest attingi nisi ab actu supernaturali. *Maj: patet:* Objectum quod nempè veritas revelata est in se quid supernaturale, similiter objectum quo, nempè Divina revelatio.

*Prob: secunda pars,* scilicet gratiam supernaturalem ex parte voluntatis requiri: quia ad hoc requiritur pia voluntatis motio, quæ efficaciter moveat ad assensum potentiam intellectivam; atqui voluntas non potest sine auxilio supernaturali movere



vere efficaciter ad actum supernaturalem, qualis est assensus veritatibus fidei ex motivo Divinæ revelationis. Ergo.

*Prob: Maj.* In hoc differunt veritates naturales à supernaturalibus, quòd naturales possint vel ex seipsis, vel ratione mediè esse evidentes, sicq; convincunt intellectum, & assensum extorquent; at veritates supernaturales neq; ex seipsis, neq; ratione revelationis sunt evidentes, proindè non convincunt intellectum, nec assensum obtinent, nisi ad hunc specialiter à DEO moveatur, juxta illud Joan: 6. *Nemo potest venire ad me, nisi Pater, qui misit me traxerit cum:* Ergo.

*Obj: amo.* Sola ratio naturalis sufficit ad ea firmiter credenda, quæ per naturale lumen fide digna censentur; atqui solo lumine naturali possumus convinci mysteria fidei esse fide digna, dum nempe sufficientibus argumentis & evidentiâ signorum, eorum credibilitas ostenditur E.

*R. D. Maj.* Ad credenda fide innixa evidentiæ signorum soli C. Hæc enim fides est humana. Fide innixa motivo supernaturali Divinæ revelationis, qualem asserunt Theologi, contra quos disputamus. N. Hæc enim est fides Divina & supernaturalis, ad quam proindè requiritur auxilium supernaturale. *In-*

*Instab: 1mò.* Dæmones credunt Jacobi  
2. credunt autem sine gratia; atqui credunt ex motivo revelationis E.

*R. N. Min:* Sed credunt coacti evidentiâ signorum, non supernaturali.

*Instab: 2dò.* Juxta S. Aug: de dono persever: c. 14. Inest infidelibus quædam naturalis credendi facultas, si eis fides congruè proponatur: reddens enim rationem, cur Tyrii credidissent, si Christi mira signa vidissent, non assignat auxilium supernaturale sed lumen naturale: *Apparet, inquit, habere quosdam in ipso ingenio, divinum naturaliter munus intelligentiæ, quò moveatur ad fidem, si congrua suis mentibus, vel audiant verba vel signa conspiciant* E.

*R. D. Ant.* Et hæc congruitas sufficit  
*N. secus C. Ant.* Augustinus his verbis nihil aliud significat, quàm quòd quædam signa magis congruant quibusdam, quàm aliis, quod nemo negat, ut patet ex Evangelio & Act: Apost: ex multis eadem signa videntibus, verba salutis audientibus alii crediderunt, alii in infidelitate permanferunt. Augustinus non dicit id sufficere, ut quis fidem amplectatur, imò expresse negat subjungens: *Audiunt enim hæc & faciunt, quibus datum est. Non autem faciunt, sive audiant, sive non audiant,*



*audiant, quibus datum non est. Undè lib: 10. Confes: cap: 6. d. nisi Deus altius miseretur, omnia forinsecus testimonia surdis loquuntur.* Dispositio ergo ad credendum non est naturæ facultas, sed gratia cordis & aures spirituales juxta illud Proph: *Dabo eis cor cognoscendi me, & aures audientes.*

*Instab: 3tiò.* Actus fidei potest fieri ob malum finem vg. ob vanam gloriam, ut d. S. Aug: lib: de cathechizandis rudibus cap: 27. atqui ad talem actum fidei non requiritur gratia supernaturalis E.

*Respondent,* quidam hanc fidem esse humanam. Attamen si supponatur actum elici ex motivo Divinæ revelationis, & simul referri ad vanam gloriam, erit ex parte supernaturalis. R. Hunc actum fidei, ex parte, qua est supernaturalis & in esse physico esse à gratia speciali; non quatenus est malus, & in esse morali; explicatur hoc exemplo consecrantis ob vanam gloriam, ubi actio consecrativa in esse physico est bona ex auxilio speciali, non ut relata in malum finem.

*Obj: 2dò.* Id, ad quod tenetur homo, debet esse in ejus potestate; atqui infidelis, cui proponitur Evangelium sufficienter, tenetur credere E.

R. D.

*R, D. Maj.* Id, ad quod homo tenetur, debet esse in ejus potestate cum Divino auxilio *C.* secluso Divino auxilio *N.* *Ad multa enim tenetur homo*, inquit *S. Th:* 2. 2. q. 2. a. 5. ad 1. *quæ non potest sine gratia reparante, sicut ad diligendum Deum & proximum; similiter ad credendum articulis fidei, sed tamen hoc potest cum auxilio gratiæ, quod nulli deest sine sua culpa.* Ex his.

*Collig:* Homo lapsus supposita prædicatione seu revelatione externa, potest cum solo prævio concursu generali, supra explicato art: 1. sine speciali gratiæ superaddita cognoscere & amplecti veritates supernaturales assensû imperfecto, ex alio motivo humano. *Prima pars patet ex Rom: 10. Quomodo credent ei, quem non audierunt? Quomodo audient sine prædicante?* Insuper supernaturale, cum nullam habeat connexionem cum naturæ operibus, non cadit sub sensus, nec per se, nec per aliud. *E.* præmittenda revelatio externa.

*Patet etiam 2da pars.* Quia verum supernaturale prout subest motivo humano & naturali, licet entitativè sit supernaturale, in ratione tamen objecti formaliter non est supernaturale, quia objectum in ratione objecti formaliter constituitur  
per



per motivum, sub quo attingitur; Ergo supposita revelatione externa potest ex motivo humano propriis viribus credi. Id clarè patet in hæreticis, qui fide humana credunt quædam mysteria fidei, non ex motivo supernaturali Divinæ revelationis, alias omnia crederent, & haberent fidem supernaturalem; hæc enim cum unius mysterii dissensu stare non potest, sed vel ex proprio iudicio, vel quia sibi hanc fidem honorificam aut utilem existimant.

*Petes.* Utrum homo lapsus possit absque gratia cognoscere veritates naturales?

*Nota.* Hic non quæritur de veritatibus naturalibus, quæ pro hoc statu captum nostrum superant, vel quia sunt sensibus imperviæ, vel quia sunt purè spirituales, purè substantiæ, ut Angeli, vel quia non habent connexionem cum principiis naturaliter notis, ut sunt cogitationes cordium, futura contingentia.

*R. Amò.* Homo lapsus sine gratia speciali naturæ superaddita, sed cum solo concursu generali prævio, qui tamen aliquò sensû debet dici specialis & gratuitus, potest cognoscere quasdam veritates naturales. *S. Th.* hic q. 109. a. 10. *Ratio*

*1<sup>ma</sup> partis.* Quia intellectus noster pro  
F hoc

hoc statu habet vim veri cognoscitivam, scilicet lumen, quod licet sit per peccatum aliquo modò obscuratum, non est tamen penitus extinctum. E. potest ex se aliquam veritatem cognoscere. *Ratio 2dæ partis:* quia omnes motus reducuntur in primum movens simpliciter, quod est DEUS. *Ratio 3tiæ partis.* Cùm homo in cognoscendo sit defectibilis, quòd ille potius moveatur ad verum, quàm alter, qui ab eo deficit, & à quo ipse deficere poterat; id ipsi non debetur, sed est ex speciali providentia, & hoc sensu potest dici motio specialis & gratia specialis. Vide art: præc.

*R. 2do.* Homo lapsus absq; gratia speciali superaddita non potest potentia saltem morali cognoscere sive collectivè sive divisivè omnes veritates naturales, tam speculativas, quàm speculativò practicas, multominus practicè-practicas.

*Dixi. potentia saltem morali.* Duplex enim distingvitur potentia, physica scilicet, quæ habet ex se debitam proportionem cum objecto, abstrahendo ab impedimentis illud attingendi. Et moralis, quæ præter debitam cum objecto proportionem, nullis impedimentis irretitur, aut retardatur, nè in actum exeat. *Dixi speculativo-*



*lativo-præcticas*, quæ quamvis spectent praxim, ad actum tamen non movent, ut sunt principia generalia Syndereseos; & axiomata moralia; bonum faciendum, DEUS est colendus &c. Dixi *præctice-præcticas*, quæ movent in particulari ad actum, ut parentes hic & nunc sunt honorandi.

*Ratio primæ partis.* Intellectus humanus est per peccatum læsus & infirmus; cognoscere autem omnes veritates naturales collectivè est opus intellectûs sani & integri, cum sit actus excellentissimus. E. Vid: S. Thom: 4. cont: gent: cap: 52. & hic art: 2. ad 3. *Ratio 2dæ partis.* Voluntas, quia est vulnerata, non potest absq; gratia speciali, quodcunq; opus bonum morale facere, ut infra dicetur. E. similiter intellectus vulneratus non potest absq; speciali gratia quodcunq; verum cognoscere.

*Collig:* Gratiam, quam necessariam dicimus ad omnium veritatum naturalium cognitionem esse entitativè naturalem, quia cognitio, ad quam datur, est entitativè naturalis; esse autem supernaturalem quoad modum, quia datur ex speciali benevolentia, supra cursum communem providentiæ, viresque naturæ. De veritati-

bus practice-practicis infra, cū enim has veritates semper sequatur actus bonus, eadem est ratio de illis ac de operatione boni.

### ARTICULUS III.

*Utrum homo lapsus possit facere vel velle aliquod bonum absquē gratia?*

**B**ONUM supernaturale non posse fieri absq; auxilio supernaturali. tum ex ima Dissert: & art: præc: tum ex terminis patet. Hoc ipsō enim, quod supernaturale est, naturæ vires superat, consequenter indiget auxiliō superadditō viribus naturæ. Quæstio itaque est de bono morali ordinis naturalis, circa quem triplex difficultas examinanda; prima, an sine gratia sanctificante & charitate possit fieri aliquod bonum opus morale? Secunda, an sine fide? 3tia an sine gratia speciali?

+ *Dico.* Potest fieri in hoc statu bonum opus morale sine gratia sanctificante; proinde non omnia peccatorum opera sunt peccata; Similiter homo sine gratia fidei potest aliquod opus bonum moraliter facere; unde non omnia infidelium opera sunt



sunt peccata. Utraq; pars est definita.

*Prob: una pars; imo. Ex Concil: Constantiensi Sess: 15 adversus Vicleffum & Hus iste articulus damnatur: Ex principiis fidei est per se notum, quod quidquid homo in peccato mortali fecerit peccat mortaliter. Hoc ipsum Concil: Triden: contra Luth: & Calv: Sess: 6. can: 7. & can: 8. & Sess: 14, can: 4. & can: 5. definit: A Summis Pontificibus S. Pio V. Gregorio XIII. Urbano VIII. & Clemente XI. quorum tres primi damnârunt propositiones in Bajo: omne, quod agit peccator, aut servus peccati, est peccatum. Est 35. In omnibus actibus suis peccator servit dominanti cupiditati. Est 40. Clemens similes assertiones damnavit in Quesnello, à num: 44. ad 59. Conclusionem firmat Authoritas etiam S. Thomæ præsertim q. 2. de malo a 5. ubi ad 2. decretoriè resolvit: esse simpliciter falsum quod omnis actus, qui est ex voluntate non informata charitate sit demeritorius &c. hoc probat duplici argumento primum: Consulendum est peccatoribus, ut bonum agant; imò ipsa Scriptura hortatur peccatores ad conversionem & bona opera Ezech: 18. Dan: 4. &c. atqui Scriptura non hortatur ad peccatum, nec quispiam consilio ad peccatum*

catum est inducendus. *Secundum*: Opera, quæ disponunt ad justificationem non sunt peccata; per hæc enim homo magis removetur à justificatione; atqui in adultis peccatoribus gratiam sanctificantem præcedunt opera, quæ ipsos ad justificationem disponunt, ut actus fidei, spei, timoris, doloris &c. quos recenset Trid: Sess: 6. cap: 6. Hæc autem opera sunt bona non solum bonitate morali, sed etiam supernaturali; tum quia sunt dispositiones ad gratiam sanctificantem; tum quia eliciuntur à principio supernaturali, puta habitu fidei, spei, vel actuali auxilio gratiæ: ergo. *Secunda pars est contra Jansenium, & Bajum, cujus propositio 25. Omnia infidelium opera sunt peccata & Philosophorum virtutes sunt vitia*, est damnata à Summis Pontif: Et patet ex principiis jam positis. Nam Scriptura hortatur infideles ad bona opera. Sic Daniel. cap: 4. alloquens Nabuchodonosor: *Consilium meum placeat tibi, & peccata tua elemosynis redime*. Item Scriptura quædam infidelium facta laudat, & ea à DEO fuisse muneribus ditata. Sic Exodi 1. laudat benignitatem obstetricum Ægyptiarum, quæ noluerunt pueros hebræorum interficere: *Deus eis benè fecit*. Josue 2. & 6. hospi-



hospitalitas Rahab laudatur & compensatur. Item Ezech: 29. Accedit auctoritas S. Augustini, in qua errorem suum fundare conantur Jansenistæ, hic enim Epist: 130. laudat temperantiam Polemonis, quam gratiæ DEI adscribit; si autem esset peccatum &c. Similiter lib: 4. cont: Julian. cap: 3. ex quo AA. argumenta sumunt, agnoscit in infidelibus quasdam veras virtutes, ut volebat Julianus, sed contendit, eas esse à DEO, & non à solo arbitrio: *Ex quo colligitur, etiam ipsa bona opera, quæ faciunt infideles, non ipsorum esse, sed illius, qui bene utitur malis E.*

*Si dicas:* Actiones infidelium non esse quidem malas ex defectu, sed defectu relationis in DEUM. R. Opus ex objecto bonum, quod propter intrinsecam bonitatem eligitur, sufficienter referri in DEUM, ut non sit peccatum. Propter opus nempe tale vg. quod infidelis ex naturali pietate honorat parentes &c. non meretur pœnam, nec sit deterior, quod contingere foret necesse, si opus esset peccaminosum.

*Obj: 1mò.* Contra 1mam partem: Prov: 15. dicitur: *Victimæ impiorum abominabiles Domino.* Math: 7. *Non potest arbor mala bonos fructus facere E.* R.

*R.* Victimæ impiorum esse abominabiles Domino, non præcisè quia offeruntur, sed quia offeruntur ex malo fine, quæ illa erant sacrificia judæorum, qui contemptis præceptis legis, & cultu interno, totam suam religionem reponebant in ritibus externis, quos ex vana gloria scrupulosè observabant. Ad 2dum: Peccatorem non esse arborem malam ex omni parte; bonum enim rationis non est in eo totaliter extinctum. Item potest retinere fidem & spem, ex quibus principiis potest agere, & tunc non agit ut arbor mala, sed ut bona.

*Igitur D. Ant:* Arbor mala quæ mala est, & agit ex malitia non potest bonos fructus facere *C.* agens non quæ mala &c. *N.*

*Obj. 2dò.* Cont: 2dam partem. *S. Aug:* lib: 3. contra Julianum toto cap: 8. aperte docet & probat imò nullum opus sine fide esse bonum. 2dò. Omnia opera infidelium esse peccata, & Philosophorum virtutes esse vitia *E.*

*R. ad primum.* Sensus August: est, quod nullum opus sine fide est completè bonum, & conducens ad vitam æternam. Quò sensû intelligimus *S.* Scripturam dum *Ezech: 2.* præcepta antiquæ legis dicun-



dicuntur *non bona*; non quod essent mala, sed quia non erant perfecta, nec hominem ad perfectionem legis Evangelicæ perducebant, juxta illud ad Hæbr: 7. *Nihil ad perfectum adduxit lex.*

*Ad secundum:* Omnia infidelium opera ab Augustino dici peccata: *imo*: quatenus sunt infidelium ut talium, seu ut fiunt ob prævum finem. Ita S. Thom: 2. 2. q. 23. a. 7. ad 1. S. Aug: explicat. Ita etiam Estius in Augustini doctrinâ versatissimus in 2. dist: 41. §. 2. qui addit ab Aug: dictum omnia infidelium opera esse peccata sumendo *omnia* prout significat, quod ut plurimum & sæpè accidit, quò sensû dicitur Gen: 5. *Cuncta cogitatio cordis intenta est ad malum omni tempore*, idest pro majori & maxima parte. Certum enim est, quod cogitatio Noe non erat intenta ad malum.

Attamen quia ipse Augustinus agnoscebat infideles aliquando agere ex bono, censet nihilominus hæc eorum opera esse peccata, sumendo peccatum latò sensû, juxta quem omne id dicitur peccatum, quod à fine deficit, & cui deest plenitudo suæ perfectionis, quia opera bona infidelibus non proderant ad vitam æternam. Julianus prædicabat esse veras virtutes,

iis constitutos fuisse perfectè justos, iis effugere æternam damnationem ( vid: Dissert: 1. §. 4. ) non valere tamen ad regnum consequendum. Hinc Augustinus in his arguit ipsum falsitatis. *1mò*; negat, quæ tantopere Julianus laudabat, in antiquis Romanis fuisse vera bona opera & veras virtutes, quia plerumq; ex pravo finè agebant, & sic falsum esse eos abundasse virtutibus. *2dò* ostendit absurdum esse veram perfectamq; justitiam constitui sine fide per dilectionem operante. *3tiò*. quod si iis virtutibus constituerentur infideles, simpliciter & perfectè justì, non solum valerent ad fugiendam damnationem æternam, sed etiàm ad acquirendum Regnum cæleste; sicquè Julianum sibi contradicere.

*Instab: 1mò*. Homo in omni actu agit propter suum ultimum finem; atqui finis hominis infidelis est malus; est enim aversus à Deo, & conversus ad bonum commutabile, ut ad ultimum finem. E. infidelis in omni actu suo agit ob pravam finem.

*R. 1mò*. Argumentum multum probare, quia probat omnia opera peccatoris esse peccata, utpotè aversi à Deo, quod negat Jansenius.

*2dò*.



*2dò D. Maj.* Agit propter ultimum finem in communi, qui est beatitudo ut sic *C. Maj:* determinatum ad aliquod particulare, quod sit verum vel apparens bonum *N. D. Min:* Finis ultimus hominis infidelis in communi est malus *N.* ut determinatus ad aliquod apparens bonum *C. Min: N. Conseq;*

*Instab: 2dò:* Nullum est opus bonum, si non referatur ad DEUM propter se dilectum; atqui id fieri non potest sine fide. *E.*

*R. D. Maj:* Si non referatur ad DEUM relatione actuali vel virtuali explicite *N. Maj.* relatione virtuali implicite *C.* Ad hanc autem non requiritur fides, sed sufficit, quod opus sit ex objecto honestum, nulla prava circumstantiâ vitiatum, & quod operans agit illud motus honestate, sic enim refertur implicite in DEUM, illius honestatis Authorem, finem & consummatorem.

*Instab: 3tio. ex illo 1. ad Tit: 1. Coinquinatis autem & infidelibus nihil est mundum, sed coinquinata sunt eorum mens & conscientia. E.*

*R. 1mò.* Multum probare, quia & peccator coinquinatus est. *2dò.* Non hic agi de actionibus in textu, sed de rebus. Arguit enim Apostolus judæorum superstitionem.

tionem, qui putabant esse immundum ex se, aliquod genus ciborum, à quo si abstinerent, peccarent ex superstitione; si uterentur, peccarent ex conscientia erronea, & sic nihil erat ipsis mundum, sed utrimque peccabant.

*Petes.* Utrum homo lapsus possit facere aliquod bonum morale sine speciali gratia actuali?

*Suppono:* Nullum bonum supernaturale conducent ad salutem posse fieri sine gratia supernaturali medicinali, quæ datur per Christum ut patet ex terminis. Quæstio ergo est de bono morali ordinis naturalis.

*R.* Homo lapsus cum solo concursu generali (prævio) sine aliquo alio superaddito auxilio potest facere aliquod opus bonum morale naturalis ordinis; iste tamen concursus generalis debet & potest dici aliquo modo speciale auxilium gratiæ, ut 1. 2. & hoc 3. art: hujus Dissert: dictum est. Dixi *prævio* hoc est determinante & efficiente, ut homo potius bonum, quam malum faciat, & quidem hic homo præ alio, ut distingvatur sensus Thomistarum à sensu Molinistarum, qui docent sufficere generalem concursum indifferentem, quem voluntas suò nutû determinet ad bonum.

*Ra-*



*Ratio 1<sup>ma</sup> partis.* Natura humana per peccatum non est totaliter corrupta, ut scilicet toto bonô naturæ privetur. Ergo potest per virtutem relictam sub concursu DEI generali aliquod bonum opus morale facile facere; sicut homo infirmus potest per seipsum aliquem motum habere, sed non potest perfectè moveri, nisi sanetur.

*Ratio 2<sup>a</sup> explicatio secundæ partis.* Auxilium gratiæ specialis latius sumptæ secundum quod scilicet habet locum in bonis operibus ordinis naturalis duo importat, sicut gratia in ordine supernaturali; 1<sup>um</sup> quod gratis detur & non ex debito, alioquin non esset gratia; 2<sup>um</sup>: quod non detur omnibus, sed aliquibus ex speciali benevolentia. Generalis DEI motio consideratur 1<sup>mo</sup>: respectivè ad naturam secundum se, 2<sup>do</sup>: respectivè ad hoc vel illud individuum. Considerata respectivè ad naturam non debet dici auxilium speciale; considerata verò respectivè ad individuum, cui præ altero datur, debet dici auxilium speciale & gratuitum, ut art: 1. dixi.

Inde habemus verè dictum esse à Conciliis & Patribus præsertim Augustino, quæcunq; bona fiunt, sive ab infidelibus  
sive

sivè à fidelibus, sivè à peccatoribus sivè à justis tam magna, quàm parva, tam supernaturalia, quàm naturalia, esse dona DEI, atq; ejus auxiliò speciali & gratuito referenda; consequenter necessitatem orationis & gratiarum actionis in his omnibus habere locum, & de omnibus verè posse dici: *Quid habes, quod non accepisti?*

*Petes:* Quomodo hæc propositio: *liberum hominis arbitrium sine gratia & adjutorio Dei nonnisi ad peccandum valet*, damnata sit in Bajo: & hæc: *nemo habet de suo nisi peccatum & mendacium* sit asserta à Concil: Arausicano Can: 22. cùm videatur utriusq; idem sensus.

*R. Nego.* Eundem esse sensum. Magis latè patet propositio Concilii quàm Baji. Sensus igitur propositionis Concilii est, neminem habere de suo, sic nimirum, ut nullatenus acceperit à DEO, ne quidem primo motore, nisi peccatum & mendacium, quod est verum; illud enim dicitur habere de suo, quod ei sic proprium est, ac à se habet, ut nullo modo habeat à DEO. Et ideo titulus canonis laudati est: *De his, quæ hominum sunt propria.* Propositio autem Baji minus latè patet, maxime in sensu Baji, non solum quia nomine gratiæ simpliciter & propriè dictæ intel-  
ligi-



ligitur gratia supernaturalis data per Christum; sed maximè quia Bajus per gratiam intelligebat gratiam sanctificantem, & charitatem. Contendebat enim omnia opera sine gratia sanctificante & charitate facta esse peccata. Sensus ergo Bajanae propositionis est: liberum arbitrium sine gratia propriè dicta, imo sine gratia sanctificante & charitate nonnisi ad peccandum valet, quod falsum esse demonstravimus.

---

#### ARTICULUS IV.

*Utrum homo possit diligere Deum super omnia ex solis naturalibus sine gratia?*

**S**uppono ante omnia cum S. Thoma hic a. 3. ad 1. & 2. 2. q. 26. a. 3. & in Caput 13. 1. Cor: lect. 4. & alibi contra Bajum & Jansenium distinctionem duplicis amoris naturalis scilicet & supernaturalis. Quæstio hic de amore DEI naturali; nam ad amorem DEI supernaturalem requiri auxilium gratiæ supernaturalis nemo dubitat. Quæstio est de amore DEI naturali deliberato, perfecto & efficaci. Porro amor efficax duplex est, amor efficax affectivè tantum, est simplex  
actus

actus voluntatis, quô homo se & omnia refert in DEUM, ut finem ultimum, cum proposito illi per omnia placendi, & removendi omnia, quæ ipsi displicent, quod est DEUM super omnia appretiativè amare; & amor efficax effectivè non est actus singularis, sed est executio dicti propositi, seu actualis observantia mandatorum naturalium; si omnium, dicitur effectivus simpliciter; si aliquorum tantum, dicitur effectivus secundùm quid.

De inefficaci amore hic non est quæstio, càm enim bonum naturæ non sit penitus extinctum, tali amore diligere DEUM potest homo lapsus cum solo concursu generali, qui tamen sit specialis respectu individui.

Amor efficax effectivè saltem simpliciter, sine speciali gratiæ auxilio esse non potest, quia complectitur totius legis observantiam, ad quam requiritur specialis gratia, ut infra patebit. Finaliter itaq; nunc est quæstio de amore DEI ut Authoris naturæ efficaci affectivè, hoc est, de illo simplici actu voluntatis, quô DEUM distinctè cognitum amat appretiativè super omnia.

*Dico.* Homo lapsus non potest solis naturæ viribus sine gratia reparantè diligere



ligere DEUM super omnia dilectione affectivè efficaci.

*Prob: ex S. August: Epist: 107. Liberum, inquit arbitrium ad diligendum Deum, primi peccati granditate perdidimus.. Sermone 15. de Verbis Apost: Deus non amatur nisi de Deo, & pluries alibi. Est expressa mens S. Thomæ hic q. 109. a. 30. Homo in statu naturæ integræ non indigebat dono gratiæ superadditæ naturalibus donis ad diligendum Deum naturaliter super omnia, licet auxiliò Dei ad hoc cum moventis indigeret, sed in statu naturæ corruptæ indiget homo etiam ad hoc auxiliò gratiæ naturam sanantis. Rationem dat, quia potentia infirma, corrupta & curvata in bonum proprium, contrarium Divino non potest exercere erga DEUM actum præstantissimum potentiæ sanæ, nisi sanetur; porro voluntas hominis lapsi est talis, & amare DEUM super omnia amore efficaci affectivè est actus præstantissimus potentiæ sanæ, continet enim virtualiter totius legis naturalis impletionem. Hinc Concil: II. Arausic: canone 25. sic definit contra Pelag: Credere debemus, quod per peccatum primi hominis ita inclinatum & attenuatum fuerit liberum arbitrium, ut nullus postea diligere Deum,*  
G *sicut*

*sicut oportuit, aut operari propter Deum, quod bonum est, possit, nisi eum gratia misericordiae praevenierit. Nec te moveat clausula sicut oportuit. Quia 1<sup>mò</sup>: qui casto & sincero amore diligit DEUM ut Authorem naturæ super omnia, eum diligit, sicut oportet in eo ordine. Hæc ergo clausula excludit à viribus naturæ amorem DEI affectivè efficacem, & relinquit illis aliquos actus inefficaces, ut in prænot: dictum, quibus non amatur DEUS, sicut oportet. 2<sup>dò</sup> quia Concilium repetit impotentiam amandi DEUM sine gratia non ex supernaturalitate actus, sed ex infirmitate naturæ per peccatum. Ergo loquitur etiam de amore naturali, quia impotentia ex supernaturalitate actûs jam erat ante peccatum. 3<sup>tio</sup>. Concil: Trid: Sess: 6. can: 3. explicans hanc particulam. *Sicut oportet, subdit: ut justificationis gratia conferatur. Si quis, definit, sine praevenientis S. Spiritus operatione, atq: ejus adjutorio hominem credere, sperare, diligere aut panitere, posse sicut oportet, ut ei justificationis gratia conferatur; anathema sit.* Atqui fieri non potest, ut diligenti DEUM super omnia ut Authorem naturæ justificationis gratia non conferatur; alioquin quo iret iste homo, si in hoc statu dile-*



dilectionis moreretur? Non in vitam æternam, quæ non datur nisi justificatis per gratiam; Non in damnationem æternam; quis enim credet DEUM diligentes se ex toto corde & super omnia æternis addicere suppliciis? Vel ergo fingenda cum Pelagianis beatitudo naturalis media inter regnum cæleste & damnationem, quod reprobaturum est ab Ecclesia. Vel admittendum, sic diligenti DEUM ex toto corde conferri gratiam justificationis, proindeq; diligere DEUM prout oportet. Insuper ex principiis Molinæ, quocum res nobis est; facienti quod in se est ex viribus naturæ, DEUS non denegat gratiam; ille autem faceret, quod in se est, & quidem adjutus gratia reparante. Ergo consequeretur gratiam, justificationis.

*Obj: 1mò. S. Thom: in 2. d. 33. q. 2. a. 4. ad 5. agnoscit in pueris sine baptismo decedentibus, aliquem DEI amorem. Item in dæmonibus 1. p. q. 60. a. 5. ad 5. atqui hic amor non est à gratia reparante. E.*

*R. S. Thom: loqui de amore innato, aut elicitò necessario, quò quis se amando, necessario amat id, à quo dependet in esse & conservari, non de amore libero & amicabili. Aut si loquatur de amore libero in infantibus, intelligendus de amore*

imperfecto, scilicet de quadam complacentia circa DEUM, ut principium boni naturalis.

*Dices.* Intellectus hominis lapsi potest propriis viribus apprehendere, & judicare DEUM ut summum bonum, & supra omnia amabilem; atqui amor sequitur iudicium. E. potest naturaliter amare DEUM super omnia.

*R. amò. D. Maj:* Judicare iudicio speculativo & in communi C. iudicio practico & movente ad actum N. Amor autem sequitur iudicium practicum, undè illud Poetæ *meliora probo, deteriora sequor.* 2dò, N. *Conseq:* Quia homo magis est vulneratus in voluntate, per quam peccatur, quàm in intellectu.

*Inflab:* Potest homo lapsus naturalibus viribus sic amare aliquod bonum particulare puta castitatem, patriam, amicum, ut etiàm vitam fundat pro ipso: Ergo à fortiori summum bonum.

*R. amò:* Si pure virtutis particularis motivo se gesserit, & non motivo famæ & gloriæ,tribuendum est speciali DEI auxilio; unde Aug: bona gentilium opera inter dona DEI reputat. *R. 2dò. N. Cons:* Quia plus est DEUM amare super omnia quàm diligere honestatem alicujus virtutis



tis supra vitam; ad primum enim requiritur, quod homo non unam virtutem, sed omnes super omnia sensibilia diligat, & quod habeat appetitum rectum ex omni parte, & circa omne appetibile; at quod quis sit ita affectus erga unam virtutem, ut vitam fundat pro ea, non sequitur, quod ita sit bene affectus circa omnes.

*Oppones:* Gratia illa, quam requirimus in homine lapso ad diligendum DEUM super omnia, an est naturalis vel supernaturalis? Non naturalis, alias non esset sanativa & gratia Christi: non supernaturalis, quia alias non esset dilectio DEI ut Authoris naturæ.

*R.* Per se, & attenta ratione objecti directi esse naturalis ordinis, quia dilectio DEI ut Authoris naturæ est entitativè naturalis, sicut ipsum objectum; sed per accidens ratione elevationis ad ordinem supernaturalem est supernaturalis. *Amò:* quia ut loquitur S. Thom: hic debet esse gratia reparans & sanans corruptionem peccati, scilicet averfionem à DEO; non potest sanare averfionem à DEO ut Authore naturali; quin simul sanet averfionem à DEO ut Authore supernaturali; ad conversionem autem ad DEUM ut Autho-

rem

rem supernaturalem requiritur gratia supernaturalis juxta illud Rom: 7. *Quis me liberabit? Gratia Dei per Jesum Christum.* 2dò, Amor DEI ut Authoris naturalis super omnia importat voluntatem implendi totam legem naturalem; lex naturalis præcipit obedire cuivis superiori præcipienti; & DEUS ut Author supernaturalis præcipit quædam supernaturalia; Ergo amor DEI ut Authoris naturalis indirectè includit voluntatem adimplendi præcepta supernaturalia, ut non displiceat DEO, ut Authori naturali; atqui ad hujusmodi voluntatem requiritur gratia supernaturalis, Ergo.

Ex hac ultima ratione videtur sequi, quod homo etiã justificatus indigeat gratia supernaturali ad diligendum DEUM ut Authorem naturæ. Nec tamen inde inferas omnem DEI amorem esse supernaturalem, nullum purè naturalem, quia gratia supernaturalis, quam requirimus ad amorem DEI ut Authoris naturæ, non se habet ut principium elicativum illius, sed ut removens ejus impedimenta, & quæ displicerent DEO ut Authori naturæ, sicq; non impedit, quin sit actus merè naturalis, cujus nempe principium elicativum & objectum directum & primarium sunt quid naturale.

AR-



## ARTICULUS V.

*Utrum homo lapsus possit sine gratia speciali omnia legis naturalis praecepta implere?*

**Q**uidam dicunt, hanc quæstionem procedere abstrahendo à praecepto dilectionis, de qua mox dictum.

Pro intelligentia.

*Nota.* Præcepta legis posse dupliciter impleri, scilicet quantum ad substantiam, & quantum ad modum. Quoad substantiam: quando actus, qui præceptus est, totus quidem fit, non tamen eò modò, quò intendit legislator, sicut qui elemosynam facit, non ex charitate &c. sed aliquo alio fine vel malo, vel impertinente ad hoc opus. Quoad modum, quando actus fit ex charitate & fructuosè ad salutem.

*Suppono.* Nullum præceptum sive naturale sive supernaturale posse impleri quoad modum, ut fiat ex charitate & meritoriè ad vitam æternam sine gratia supernaturali, quia iste modus est supernaturalis, actusq; præceptorum etiam naturalium elevat ad ordinem supernaturalem. Nec præceptum supernaturale etiam quoad substantiam in quovis statu potest imple-

impleri sine gratia supernaturali, ut patet ex terminis. Porro in omni statu ad observantiam alicujus præcepti opus est auxilio generali Dñi moventis, quia nulum est in homine bonum, quod non sit à Deo movente.

Supereſt quæſtio: utrum præter hanc generalem motionem requiratur in hoc ſtatu aliqua alia gratia ſuperaddita ad impletionem totius legis naturalis?

*Dico.* Homo lapsus non poteſt ſine gratia ſanante adimplere totam legem naturalem.

*Prob:* Concil: Milevitanum can: 5. & Cæleſtinus Papa Epist: ad Episcopos Galliae cap: 10. damnant Pelagianos, quia dicebant, quod ſi gratia non daretur, non quidem facile, ſed tamen abſolutè poſſemus ſine illa ſervare Divina mandata. Concil: Arauſicanum II. can: 25. deſinit: quod per peccatum primi hominis ita inclinatum & attenuatum fuerit liberum arbitrium, ut nullus poſtea -- operari propter Deum, quod bonum eſt, poſſit; niſi gratia eum Divinae miſericordiae prævenierit. S. Aug: Serm: 5. in Pſalmum 118. *Mandatis ejus rectis atq; arduis, humana non contemperaretur infirmitas, niſi præveniens ejus adjuvaret charitas.* Serm: 148. de temp: cap:



5. *Hæc decem præcepta nemo implet viribus suis, nisi adjutus gratiâ Dei, & alibi sæpius. Unde lib: de Hæresibus hæresi 88. loquens de Pelagianis: Hi Dei gratia, tantum inimici sunt, ut sine hac credant hominem posse facere omnia Divina mandata.*

*Resp: AA.* Hæc debere intelligi de præceptis supernaturalibus, vel de observatione naturalium quoad modum supernaturalem & fructuosum ad vitam æternam.

*Contra 1mò.* Pelagiani non negabant gratiam requiri pro impletionem præceptorum supernaturalium, aut naturalium quoadmodum supernaturalem; cum id implicet in terminis. Quin imo fatebantur bona opera facta sine gratia esse sterilia ad regnum cælorum. *2dò.* Concilia & Patres repetunt in potentiam adimplendi mandata sine gratia ex infirmitate naturæ per peccatum vulneratæ; impotentia autem petita ex supernaturalitate sive præcepti sive modi, est independens à peccato.

*Obj: 1mò.* Apost: Rom: 2. d. Præcepta naturæ adimpleri absq; gratia: *gentes quæ legem non habent, naturaliter ea, quæ legis sunt, faciunt.* Ergo.

*R.* Juxta S. Augustinum & S. Thomam hæc verba intelliguntur de gentilibus

bus conversis ad fidem & operantibus ex gratia.

*Dices.* Atqui Apostoli dictum non potest intelligi de operantibus ex gratia. *Prob:* *Subs:* To naturaliter ab Apostolo usurpatum excludit gratiam.

*R. D. Ant:* To naturaliter, prout idem sonat ac ex viribus naturæ C. prout opponitur legi Mosaicæ, ita, ut sensus sit, gentes, quæ legem scriptam non habent, ea, quæ legis sunt faciunt naturaliter, idest sine lege Moyfis, & cum sola Christi gratia *N.*

*Instab:* S. Chrysostomus Hom: 5. in Epist: ad Rom: interpretatur de gentibus infidelibus, & dicit esse admiratione dignos, quod nec lege ipsis opus fuerit, & tamen omnia, quæ legis erant, præstiterint. Ergo.

*R. 1mò. N.* S. Chrysostomum loqui de infidelibus gentilibus. Præmittit enim in eadem homilia, quod *Apostolus intelligat Græcos non Idololatrias, sed Deum colentes &c.* postea nominat Melchisedech, Job, Ninivitas, Cornelium; at hi fuerunt fideles. 2dò. gratis dato: sensus est, quod quædam legis opera faciant propriis viribus, sed non omnia,

*Oppones.* Observatio totius legis naturalis



ralis non superat naturæ vires, dicitur enim lex naturalis, quæ est proportionata viribus naturæ. Ergo.

R. D. Ant: Non superat vires naturæ sanæ C. naturæ infirmæ & corruptæ N. Ant:

Obj: 2dò. Deut: 30. legitur: *Mandatum hoc, quod ego præcipio tibi hodiè non est supra te, nec procul positum,*

R. Sensus est horum verborum, quod DEI mandatum non sit supra te quantum ad cognitionem, quia manifestabatur per legem Moyfi. Patet ex contextu. Si contendas id esse intelligendum quoad executionem, sensus erit: Mandatum non est supra te mediante gratiâ, quæ nulli deest. Unde supra dicitur: *Circumcidet Dominus Deus cor tuum - : ut diligas Dominum Deum tuum,* En gratiæ promissionem. Ex quo. - -

Collig: 1mò. Ad observanda mandata naturalia gratiam necessariam esse contra Pelagianos. 2dò. Contra Jansenium: Per gratiam, quæ nulli denegatur, omnia mandata & singula observatu possibile esse. 3tiò. Contra Lutherum & Calvinum dari homini à Deo gratiam ad servanda mandata, proinde Christus fideles non exemit ab observatione legis sed observanti-  
am

am faciliorem reddidit per abundantiam gratiæ. 4<sup>to</sup>. Hanc gratiam requisitam in homine lapso ad observantiam totius legis ratione objecti esse naturalem; per acci- dens & ratione elevationis ad altiorem statum supernaturalem, ut dict: art: præc: in Oppon: 5<sup>to</sup>. Ad diu & semper servandam legem totam, non sufficit secundum providentiam ordinariam gratia actualis, sed requiritur habitualis, quia ad hoc necesse est, quod homo sit firmiter dispositus circa omnia præcepta, qualis non est, nisi sit firmiter benè dispositus circa finem scilicet DEUM, quod præstat gratia habitualis. Potest tamen DEUS absolutè per continuas gratias actuales firmare voluntatem hominis circa observantiam omnium præceptorum, quam tamen observantiam præsertim dilectionis DEI super omnia comitatur gratia sanctificans. 6<sup>to</sup>. Etiam homini iusto habenti gratiam habitualement videtur necessaria gratia actualis specialis, ad diu & semper servandam legem; quia licet gratia habitualis sanet mentem tollendo aversionem à DEO, det- què posse per virtutes infusas, non tamen rebellionem appetitûs sensitivi ad rationem sive contra rationem, ex qua exurgit maxima difficultas pro observatione totius



totius legis, ad quam superandam necessaria est gratia actualis specialis.

## ARTICULUS VI.

*Utrum homo justus possit sine speciali privilegio vitare omnia peccata venialia?*

*Dico:* **H**omo justus cum ordinariis gratiae auxiliis sine speciali privilegio potest vitare singula peccata venialia non tamen diu omnia.

*Prima pars est certa:* quia si homo non posset vitare singula peccata venialia sine speciali privilegio, quod nec datur, nec offertur, ista peccata non haberent rationem voluntarii, nec peccati; aut homo obligaretur ad impossibile, quod dici non potest. Ergo.

*Prob: 2da pars, ex Scriptura 3. Reg: 8. Non est homo, qui non peccet Eccl: 7. Non est homo justus in terra: -- & non peccet. Jacobi 3. In multis offendimus omnes & alibi. Concilium Milevit: can: 7. Quicumque dixerit in oratione Dominica ideo dicere Sanctos: dimitte nobis debita nostra, ut non pro seipsis hoc dicant --- sed pro aliis qui sunt in populo peccatores --- Anathema sit. Ubi perstringitur evasio*  
Pela-

Pelagianorum, qui dicebant iustos se profiteri peccatores, non rei veritate, sed causâ humilitatis, aut quia sunt pars populi, qui est in peccato. Trid: Sess: 6. can: 23. *Si quis hominem semel iustificatum dixerit - - - posse in tota vita peccata omnia etiam venialia vitare, nisi ex speciali privilegio, quemadmodum de B. Virgine tenet Ecclesia, anathema sit.* Augustinus totus est in asserenda hac veritate contra Pelagianos præsertim lib: 2. de peccatorum meritis, & lib: de natura & gratia, ubi cap: 36. dicit: *Excepta S. Virgine MARIA de qua propter honorem Domini, nullam prorsus cum de peccatis agitur haberi volo questionem - - Si omnes illos Sanctos & Sanctas, cum hic viverent, congregare possemus, & interrogare, utrum essent sine peccato? Quid fuisse responsuros putamus - - Nonne una voce clamassent? Si dixerimus, quia peccatum non habemus, nos ipsos decipimus, & veritas in nobis non est.*

*Suffragatur ratio.* Quamvis gratia sanctificans sanet hominem quantum ad mentem, remanet tamen corruptio appetitus sensitivi: unde exurgunt frequentissimi motus contra rationem; atqui ratio licet possit reprimere singulos (ex quo habent rationem voluntarii) non potest tamen



men reprimere omnes, quia dum uni resistere nititur, sæpissimè alius insurgit, nec ratio potest esse semper pervigil ad hujusmodi motus vitandos & coercendos. Ergo.

*Obj: amò.* Si homo non possit omnia peccata venialia vitare sine speciali privilegio, quod DEUS non est paratus dare; Ergo ad aliquod committendum necessitatur. E. illud committendo non peccat. Nemo enim peccat in eo, quod vitare non potest, ut ait S. Aug: lib: 5. de libero arb: cap: 18.

*R. D. Sequel: E.* ad aliquod peccatum veniale committendum vagè & indeterminate necessitatur C. Ad aliquod particulare & determinatum N. Ut enim homini imputetur peccatum, sufficit quod possit quodlibet determinatè secundum se, & prout se offert hic & nunc vitare, licet ad aliquod vagè & indeterminate necessitetur; seu licet non omnia collective possit vitare. Sic Christus dixit, necesse est, ut veniant scandala, sed quia hæc necessitas est vaga, nec quemquam determinate afficit, meritò culpatur, qui scandalum præbet.

*Instab: amò.* DEUS præcipit vitare omnia peccata venialia, E. homo potest omnia vitare.

R.

*R. D. A.* Præcipit præcepto indistincto à præceptis singulorum *Concedo*. Præcepto distincto *N.* Cum enim omnia simul non occurrant, nec omnia vitentur, nisi vitando singula, frustra adhiberetur præceptum vitandi omnia distinctum à præcepto vitandi singula.

*Instab: 2dò.* Oramus, ut ad nullum declinemus peccatum. Ergo possumus vitare omnia.

*R. N. Conseq;* Sic enim oramus, quia nullum est determinatè, quod non possumus vitare. Undè petimus omnia vitare, inquantum est possibile.

*Instab: 5tiò.* Omnia peccata venialia etià collectivè sumpta, quæ justus committit, liberè committit; Ergo potest omnia collectivè vitare.

*R. D. Ant.* Libere committit committendo libere seorsim *C.* committendo collectionem omnium independentè à singulis, *N. Ant:* Illa enim collectio est chymera.

*Ob: 2dò.* Joan: 3. legitur: *Omnis, qui natus ex Deo peccatum non facit - - - & non potest peccare.* E possibile est &c.

*R.* Sensum esse justum non peccare, nec posse peccare venialiter, quatenus agit ut justus, seu ex gratia, qua justus est.

Vel



Vel secundum Aug: lib: 2. de peccat: mer: cap: 7. & 8. intelligenda est sententia Apostoli de illo, qui natus est ex DEO nativitate seu regeneratione consummata & perfecta in Patria. Ex his.

*Collig:* Soli B. Virgini privilegium immunitatis ab omni peccato veniali concessum, ut docet Trid: & S. Aug:

*Petes.* Utrum homo lapsus possit sine gratia vitare omnia peccata mortalia, & vincere omnes tentationes?

*R.* Homo lapsus, & in peccato mortali existens, sine speciali Dæi gratia superaddita non potest diu vitare omnia peccata mortalia contra legem naturalem, & omnes tentationes vincere. Sequitur ex præc: art: Quia homo lapsus non potest sine gratia observare omnia præcepta; E nec vitare omnia mortalia; peccatum enim nihil est aliud, quàm transgressio præcepti.

## ARTICULUS VII.

*Utrum homo se possit præparare ad gratiam  
sine gratia?*

**C**irca præsentem quæstionem duplex fuit error, nempe Pelagianorum &

H

Semi-

**Semi-Pelagianorum.** Pelagiani negantes peccatum originale dicebant: hominem propriis viribûs posse bona opera facere, quibus promeretur primam gratiam; ficquè gratiam dari secundùm merita, quem errorem ipse Pelagius ne damnaretur in Concilio Diopolitano damnavit verbotenus, reipsa illudens Patribus. Semi-Pelagiani admittentes peccatum originale, & per illud attenuatas esse vires naturæ, fatebantur hominem non posse sine gratia opera bona facere, attamen contendebant vires naturæ non ita esse profligatas, quin posset propriis viribus aliquod boni operis initium efficere, scilicet petendo, desiderando, quærendo, aut quovis alio modò, quò non quidem gratiam mereretur, sed ad illam se disponderet, Deo illud initium tanquam occasionem arripiente conferendi nobis gratiam, nè esset personarum acceptor, si uni præ altero sine ulla ratione, ex parte illius gratiam conferret. Uterq; error ab Ecclesia est damnatus.

His non obstantibus non defuerunt quidam Catholici, qui dicebant hominem posse sine gratia præparare se ad gratiam; sic Ludovicus Molina in Concordia Disp: 10. ubi docet benè utenti facultate naturali.



rali, DEUM nunquam denegare gratiam, non quidem ex merito operis naturalis, sed ex pacto inter DEUM & Christum inito, ut facienti quod in se est ex viribus naturæ, infallibiliter detur gratia. Quæstio est de necessitate gratiæ actualis ad se præparandum ad gratiam sive actualem, sive habitualem.

*Dico.* Homo lapsus nihil prorsus facere potest, quod ipsum quovis modò disponat ad gratiam sive actualem sive habitualem, nisi auxiliò gratiæ actualis præveniatur.

*Prob:* Ex Scrip: imo: Nam Prov: 8. d. *præparatur voluntas à Domino*, quod passim urget Aug: contra Pelagianos. Joan. 6. *Nemo potest venire ad me, nisi Pater, qui misit me, traxerit eum.* Si autem homo seipsum præparare posset, ait S. Thomas, non deberet, quod ab alio traheretur; jam enim ex se venire contenderet. Joan: 15. *Sine me nihil potestis facere.* Ergo nec ad gratiam se præparare. *Si sine illo nihil possumus facere*, inquit August: lib: 2. ad Bonific: c: 9. *profecto nec incipere nec proficere* Apostolo interroganti Rom: 11. *Quis prior dedit illi & retribuetur ei?* Posset homo respondere, secundum oppositam sententiam: ego

prior dedi illi conatum, & dispositionem meam quæ est ex me, & non ex illo. Item interroganti 1. Cor: 4. *Quis te discernit?* posset respondere, dispositio & conatus meus. *add.* ex Conciliis: Arausic: 11. can: 3. can: 4. can: 5. Concil: Trident: Sess: 6. cap: 5. Quæ hanc veritatem manifestè tradiderunt.

3tio, S. August: passim urget contra Pelagianos & Semi-Pelagianos principia sequentia. Primum in negotio salutis dignationi gratiæ nihil penitus esse subtrahendum; subtraheretur autem aliquid, si dispositio ad gratiam non esset ex gratia. Secundum: Ecclesiam orare non tantum ut volentes & conantes adjuvet, sed etiam ut ex nolentibus volentes fiant. Tertium minimam præparationem ad gratiam esse bonam cogitationem, quam homo habere non potest sine gratia præveniente juxta illud 2. Cor: 3. *Non sumus sufficientes cogitare aliquid à nobis, quasi ex nobis &c.* Augustino accedit S. Thom: Quodl: 1. a. 7. o. Super cap: 10. ad Rom: Lect: 3. Lib: 3. cont: gent; cap: 149. hic q. 109. a. 6. ex professo. Infra q. 112. a. 3. Ubi plus quam decem rationibus probat Conclus: in locis assignatis. Plura dicentur, post solutas objectiones, ubi explicata-



plicabimus axioma Theol: *Facienti* &c.

*Obj: Amò. Zachar: 1. dicitur: Convertimini ad me, ait Dominus, & ego convertar ad vos. Luc: 11. Petite, & accipietis, quærite & invenietis Ergo.*

*R. His & aliis Scripturæ locis liberum arbitrium, nostramquè liberam gratiæ co-operationem commendari, sed gratiæ prævenientis necessitatem non excludi. Responsio est August: lib: de gratia & lib: arbitrio cap: 5. & Concil: Trid: Sess: 6. cap: 5.*

*Instabis Amò. Ex illo Prov: 16. Homini est præpare animam, & Domini gubernare linguam. Et infra: cor hominis disponit viam suam; sed Domini est dirigere gressus ejus; atqui non potest intelligi nisi de præparatione animæ & cordis per solum hominem sine gratia alioquin non subsisteret antithesis, quam facit Scriptura; si quidem gubernare linguam, & dirigere gressus (quod dicitur esse Domini) sit etiàm hominis gratiâ adjuti. Ergo,*

*R. N. Min: Quamvis homo nonnisi per gratiam præparet cor & animam, subsistit nihilominus antithesis, quia licet in locutione & executione interveniat actio hominis, ut tamen ad exitum in anima & corde perveniat præmeditatum,*  
*solius*

folius est Domini dirigere verba & opera, quasi dixisset Scriptura: non sufficit meditari quid dicturus aut facturus es, nisi DEUS dirigat linguam & opus, ut bene succedat. Et hoc est, quod vulgò dicitur: *homo proponit, Deus disponit.*

*Instab: 2dò.* In Scriptura plures referuntur, qui per bonum opus naturale pervenerunt ad gratiam; sic obstetrices Ægyptiæ per naturalem commiserationem erga pueros hebræorum; Rahab meretrix recipiendo exploratores Israelitas; Zacheus recipiendo Christum in domum suam; Lathro in cruce dicens: *Domine memento mei;* Cornelius per orationes & eleemosinas, antequàm in Christum crederet; Paulus I. Timot: I. quia ignorans peccaverat. Sic videmus plures converti ex aliquo motivo naturali vg. morbo, amici morte &c.

R. Et illa bona naturalia & has occasiones, & ista motiva esse insufficientia, nisi DEUS cor interius per gratiam suam disponat, sicq; non excludere necessitatem gratiæ interioris: *Nisi Deus altius misereatur* ait Aug: *Cælum & terra surdis loquuntur.* Hinc Concil: Arausic: II. can: 25. *manifestissime credendum est, quod illius latronis, quem Dominus ad paradisi patriam revoca-*



revocavit, & Cornelii Centurionis, ad quem Angelus Domini missus est, & Zachei, qui ipsum Dominum suscipere meruit, illa tam admirabilis fides, non fuit de natura, sed Divinae largitatis donum. Plus difficultatis habet textus Apost: R. His verbis: *Misericordiam Dei consecutus sum, quia ignorans feci in incredulitate*; ignorantiam adferri non ad extenuationem peccati, & ad movendum DEUM hac ratione, ut misericordiam faciat; sed tanquam rationem objecti maximè convenientis circa quod DEUS exerceat suam misericordiam. Nam objectum seu materia misericordiæ est miseria; unde quantò major est miseria, tanto magis est objectum conveniens misericordiæ, & tanto magis nata eam commovere. Sensus igitur Apostoli est. Ideo misericordiam consecutus sum, quia magna erat mea miseria, hæc nimirum; quòd tanta mala facerem per ignorantiam & incredulitatem ad instar ægroti, qui per in saniam medicum cædit. Ita S. August: Serm: 8. 9. & 10. de verbis Apost: His ergo Pauli verbis non designatur ratio meriti aut dispositionis in eo, provocans DEUM ad misericordiam & gratiam illi præstandam, sed tantum magnitudo miseriæ significatur velut objectum conveniens

niens maximè Divinæ misericordiæ; quæ miseria quia peccati erat (nam & ignorantia & incredulitas erat in eo peccatum) non poterat secundum rationem meriti aut dispositionis misericordiam DEI provocare, sed iram.

*Obj: 2dò.* S. Cyrillus Jerosol: Chrysostomus, Clemens Alexand: & alii videntur docere, gratiam non prævenire voluntates nostras, sed eas expectare. Ergo.

*R. 1mò.* Illos plerumq; loqui de gratia habituali, aut de augmento gratiæ actualis ad perfectiora opera, non de prima gratia, per quam habetur initium bonæ voluntatis. Undè cum dicunt DEUM voluntatem nostram expectare, intelligunt voluntatem non nudam, sed adjutam gratiâ. *2dò.* Dum negant voluntatem esse posteriorem gratiâ, seu dum negant gratiam antecedere voluntatem, intelligunt de antecedentia necessitate, qualem Manichæi, contra quos agunt, docebant. Sic S. Thom: interpretatur Damascenum 1. p. q. 23. a. 1. ad 1. *3tiò.* Variis aliis in locis docent dogma Catholicum. Chrysost: Hom: de Adam. Hom: 12. in 1. Cor: & alibi. Clemens Alexand: lib: 2. Strom: p. 1273. lib: 5. p. 396. Cyrillus Cathechesi 5. & 6.

*Petes*



*Petes 1mò.* Quis est sensus vulgati axiomatis: *Facienti, quòd in se est, Deus non denegat gratiam.*

*R. 1mò.* Sensus non est, quod operi moraliter bono solis naturæ viribus elicto, debeatur gratia tanquàm merito sive de condigno, sive de congruo. Hoc enim hucusq; impugnatum, & à Conciliis damnatum est.

*R. 2dò.* Non est sensus, quod facienti, quod in se est ex viribus naturalibus, DEUS non denegat gratiam, ex pacto inito inter DEUM & Christum; ut bene utenti, facultate naturali DEUS infallibiliter conferat gratiam, ut finxit Molina. Si quidem stante hoc systemate, opus bonum morale foret dispositio ad gratiam, si non ex se, saltem ex lege statuta, proinde haberet aliquam proportionem & jus ad auxilia gratiæ. Quod dici non potest 1mò: quia juxta S. August: inscrutabile est DEI judicium, cur unum trahat, alterum non trahat. At suppositò dicto pacto, id non foret inscrutabile, sed ratio facile redderetur, nempè quia ipse facit, quod in se est ex propriis viribus. 2dò: Supposita hac lege sive pacto; gratia non foret gratia, quia daretur ex operibus, quod est contra Apostolum. 3tiò. In hac hypo-  
thesi

thesi homo haberet aliquid, in quo se discerneret, & in quo gloriaretur, quod rursus contra Apost: 4<sup>to</sup>. Hoc pactum nullum habet fundamentum in Scriptura, Conciliis & Patribus, ergo est fictitium.

Pater Valentia in Congregatione habitata coram Clem: VIII. Ultima Septemb: anno 1602. hoc pactum probare voluit ex S. Augustino lib: 19. de Civit: Dei cap: 13. sed non cessit ei bene.

R. 3<sup>to</sup>. Non est sensus, tandem quod facienti, quod ex se est, ex viribus naturæ negativè, hoc est non ponenti obicem gratiæ, Deus infallibiliter conferat gratiam. Quia vel hoc dicitur de non ponente obicem ex omni parte, observando nempe totam legem, & vitando omnia peccata, hoc non potest fieri sine gratia; vel de non ponente obicem ex aliqua parte tantum, servando aliquod præceptum, vitando aliquod peccatum; at secundum S. August: & experientiam videmus quosdam servare plura præcepta; & plura vitare peccata, quibus tamen denegatur gratia; cum perditissimis nullam legem curantibus, & in omnia flagitia prorumpentibus aliquando concedatur.

Restat ergo præfatum axioma non posse aliter intelligi, quam intelligit S. Thomas,



mas, nempè *facienti quod in se est ex gratia, Deum gratiam ulteriorem non denegare*. Quovis enim alio modò intelligas, vel opus naturale erit meritum de condigno aut de congruo; vel erit DEO motivum aut regula, aut occasio, aut conditio, ad cujus positionem DEUS moveatur ad conferendam gratiam, sicquè erit aliquo modò dispositio ad illam; quod impugnatum manet.

*Petes 2dò. Quomodo illud contra Pelagianos definitum: gratia non datur secundum merita.*

R. Sic intelligi, ut gratia sive actualis sive habitualis cujuscunq; boni operis ad salutem pertinentis, non detur propter ullum meritum sive de condigno, sive de congruo, quod ex viribus nostris sine gratia Divina habeamus. Loquendo autem de meritis nostris, quæ sunt ex gratia; dicendum aliquam gratiam secundum merita dari. Justis enim secundum meritum strictè sumptum datur augmentum gratiæ & gloriæ. Item omnis gratia post primam actualem, datur secundum meritum nostrum saltem de congruo. Non tamen sic data definit esse gratia, quia in sua radice est semper gratuita. Hinc notandum dictum S. Aug: *Deum sua dona corona-*

*ronare, dùm merita nostra coronat.*

*Petes 3tiò.* Utrùm homo possit resurgere à peccato sine gratia?

*R. negative.* Sequitur ex dictis, & est definitum in Concil: Araus: II. can: 14. *Nullus miser de quantacunque miseria liberatur, nisi qui Dei misericordiâ prævenitur.* Hæc assertio est ita aperta & certa, ut ipse Pelagius, alioquin gratiæ hostis infensissimus eam non negaverit, etsi in hoc erraverit, quod voluerit hanc gratiam nostris meritis dari.

Ratio ex illo ad Gallat: 2. quod si data est lex, quæ potest justificare. *Ergo Christus mortuus est gratis*, idest sine causa. Pari ratione si homo habet naturam, per quam potest justificari, Christus gratis, id est, sine causa, mortuus est. Rursus: Resurgere à peccato, non est tantum cessare ab actu peccandi, ut volunt Sectarii; sed est hominem reparari quoad ea, quæ peccando amiserat, consequenter liberari à malis, quæ per peccatum incurrit; atqui homo non potest sine gratia liberari à malis, quæ per peccatum incurrit: E.

*Prob: Min:* Incurrit homo triplex detrimentum sive malum peccando, scilicet maculam, corruptionem naturalis boni, & reatum pænæ; maculam incurrit, quatenus



nus privatur decore gratiæ; & hoc non potest reperari nisi per ipsam gratiam; bonum rationis corrumpitur, inquantum natura hominis deordinatur, voluntate ejus non subjectâ DEO; hoc enim sublatô ordine, consequens est, ut tota natura hominis peccantis inordinata maneat. Iste autem subjectionis ordo reparari non potest, nisi DEUS voluntatem hominis ad se trahat. Tandem reatus pænæ est, per quam homo peccando mortaliter, mereatur æternam damnationem; hic autem reatus remitti non potest nisi à DEO, in quem est offensa commissa, & qui est hominum Judex. Ergo. Notandum esse aliquam imperfectam resurrectionem & vivificationem peccatoris, ad quam licet non requiratur gratia habitualis, requiritur tamen actualis, scilicet qua DEUM diligere incipit metû salubri percussus, & ad ejus reconciliationem aspirat, de qua resurrectione imperfecta potest intelligi illud cap: 5. ad Ephes: *Surge, qui dormis, & exurge à mortuis & illuminabit te Christus.* Unde jurè damnata est propositio 64. in Bajo hanc distinctionem commentitiam dicente.

## ARTICULUS VIII.

*Utrum homo in gratia constitutus indigeat speciali auxilio gratiæ ad finaliter perseverandum?*

**N**On hic quæstio movetur de perseverantia sumpta pro virtute & habitu inclinante ad eligendum & proponendum perservare nequè pro proposito perseverandi, sed de ipso actuali exercitio perseverantiæ in bono usq; ad finem vitæ. Perseverantia sic sumpta potest accipi dupliciter, *1mò*: pro diuturna continuatione in gratia & bonis operibus usquè ad finem vitæ, ut plerumq; contingit in adultis. *2dò*. pro conjunctione gratiæ cum morte sine diuturna continuatione, ut contingit in pueris post baptismum morientibus, aut etiam in adultis, post adeptam justificationem decedentibus.

*Dico*: Ad perseverantiam finalem sive brevem sive diuturnam requiritur speciale auxilium.

*Prob*: Authoritat: S. August: qui toto libro de dono perseverantiæ hanc veritatem adversus Semi-Pelagianos defendit. Juxta eundem. S. D. ibid: cap: 2. Omnes justî,



justi, dum in oratione Dominica petunt: *Adveniat regnum tuum*, petunt perseverantiam finalem, sive diuturnam sive brevissimam, quæ conjungat gratiam cum morte, quam nempe conjunctionem sequatur asscution regni cælestis: *Cur autem inquit S. D. perseverantia ista poscitur à Deo, si non datur à Deo? Nonne ista irrisoria petitio est, cum id ab eo petitur, quod scitur ipsum non dare, sed ipso non donante in hominis esse potestate.*

*Confirmatur.* Autoritate Conciliorum: Arausicanum II. can: 10. distingvit perseverantiam sumptam pro asscutione finis, & sumptam pro diuturna continuatione in bono, & ad utramq; requirit auxilium speciale, quod semper est implorandum à Sanctis. Similiter docet Trid: Sess: 6. can: 16. & cap: 17. ubi perseverantiam *magnum Dei donum vocat.* Suffragatur ratio ex S. Thoma: Conjunctio gratiæ cum morte est proprius effectus specialis providentiæ, nempe prædestinationis; solis enim prædestinatis convenit in gratia mori; Ergo habetur per speciale auxilium.

*Petes:* In quo consistit istud speciale auxilium? Suppono: donum perseverantiæ non solum includere auxilium sufficiens, quò homo potest perseverare; sed etiam efficacem,

efficax, quo defactò perseveret, ut docet S. Aug: de dono persev: cap: 6. *De illa perseverantia loquimur, qua perseveratur usq; in finem, quæ si data est, perseveratum est usq; in finem; si autem non est perseveratum usq; in finem, non est data.* Idem habet lib: de Correp: & grat: c. 12.

R. Hoc auxilium non sistere in aliquo indivisibili, nec omnibus dari eodem modo, sed plura includere & intrinseca & extrinseca. Cùm enim perseverantiæ donum formaliter consistat, in conjunctione gratiæ cum fine vitæ, ex efficaci gloriæ intentione imperata; illam DEUS singulari providentiâ variis modis procurat, quibusdam accelerando mortem, ne cadant; aliis prorogando vitam ut resipiscant; aliis subtrahendo pericula & tentationes, aut eas temperando, quæ omnia sunt auxilia extrinseca; aliis in periculis & tentationibus constituendis vires augendo, ut vincant, & immobiliter stent in bono usq; in finem; & hæc pertinent ad auxilia intrinseca.

Obj: *amò.* Perseverantia est conjunctio gratiæ cum morte; atqui homo justus potest cum auxiliis communibus gratiæ annexis se aliquamdiu conservare in bono, saltem si illo brevi intervallo nulla aut levis tentatio occurrat; & interim potest mors contin-



contingere ex causis naturalibus; hæc enim non est DEI donum, sed pæna peccati; Ergo sine gratia speciali potest homo iustus perseverare finaliter.

*R. D. Maj:* Perseverantia (finalis) est conjunctio gratiæ cum morte, casualis & per accidens contingens *N.* Conjunctio per se volita ex efficaci gloriæ intentione *C.* Nemo enim dicet hominis prædestinationem & salutem esse casualem & fortuitam. Admittenda ergo est aliqua causa per se hujus conjunctionis, quæ causa alia non est, quàm intentio DEI efficax conferendi prædestinato gloriæ, & inde manans auxilium efficax ad conjungendam gratiam cum morte. Unde *D. Min:* Mors considerata secundum rationem communem hominibus & brutis, est ex causis naturalibus, nec est donum DEI *C.* considerata ut conditio requisita ad habendum statum immobilem in gratia *N.* Sub ista enim ratione providetur à DEO per singularem curam, juxta illud. Sap: 4. *Raptus est ne malitia mutaret intellectum,*

*Instab:* imò. Justus habet virtutem perseverantiæ infusam, sicut alias virtutes infusas, gratiæ annexas. Ergo cum illa perseverare potest.

*R. D. Conseq;* Ergo cum illa perseve-  
I rare

rare potest potentiâ antecedente *C.* potentiâ consequente *N.* Alioquin omnes iusti perseverarent, & qui non perseverarent, non haberent virtutem perseverantiæ; & quisquis non ageret, non haberet virtutem agendi, quæ vera non sunt. Hic autem non est quæstio, an ad posse perseverare requiratur auxilium speciale, sed ad perseverandum actualiter, ut notavimus ex *S. Aug.*

*Subsum es:* Atqui habenti virtutem perseverantiæ, debetur secundum providentiam auxilium ad perseverandum actu. Ergo.

*Prob:* Unicuiq; formæ debetur auxilium ad ejus operationem.

*R. Ad prob: D. Ant:* Ad ejus operationem secundum conditionem subjecti, in quo est, *C.* Præter conditionem subjecti, *N.* Est autem virtus perseverantiæ in subjecto vertibili & defectibili; Unde quod non permittatur deficere, est ex auxilio speciali.

*Instab 2dò.* Habenti gratiam debetur gloria: Ergo à fortiore debetur auxilium pro continuatione gratiæ cum gloria.

*R. N. Conseq;* Quia quamvis homini habenti gratiam debeatur gloria, quamdiu manet in gratia, non tamen debetur ut invariabiliter conservetur in gratia usq; ad mor-



mortem, quia est naturæ variabilis & defectibilis.

*Obj: 2dò.* DEUS semel justificatum non deserit, nisi prius ab eo deferatur, ut definit Trid: Sess: 6. cap: 11. atqui si necesse foret speciale auxilium iusto ad perseverandum, quod DEUS pluribus iustis deneget, defereret illum, priusquam ab eo defereretur. Ergo.

*R. 1mò.* Juxta illos, qui hanc desertionem intelligunt per subtractionem gratiæ habitualis, DEUM illam non subtrahere, nisi priusquam homo ipsum offendat mortaliter, sicq; non deferere iustum; nisi ab eo deferatur. *2dò.* Juxta illos, qui hanc desertionem intelligunt per subtractionem gratiæ actualis, etiam DEUM non deferere iustum, priusquam ab eo deferatur, quia non subtrahitur efficax gratia nisi homo gratiis sufficientibus, quæ dant posse, prius sua culpâ desit, juxta illud Trid: Sess: 6. cap: 13. ubi agit de dono perseverantiæ. *Deus, nisi ipsi illius gratiæ defuerint, sicut capit opus bonum, ita perficit operans velle & perficere.* Sed si quæris, quare non dat omnibus iustis gratiam efficacem? *R.* ex dictis, quia homo variabilis & defectibilis est, & DEUS unumquemque movet secundum modum suum. Si ulterius quæ-

ras, quare dat isti, denegat illi? *R.* cum S. Aug: de dono persev: c. 9. *inscrutabilia esse judicia ejus.* Et Tract: in Joan: *Noli velle judicare, si non vis errare.*

*Petes 1mò.* Utrum Angelis & primo homini in statu innocentiae necessarium fuerit auxilium speciale ad perseverandum?

*R. Affirm:* Id probat principium S. Thomæ 2. 2. q. 137. a. 4. 3. cont: gent cap: 155. Quia liberum arbitrium in statu innocentiae erat variabile & defectibile; Ergo ut permaneret in bono, ad aliud invariabile & indefectibile debebat reduci, nempe ad voluntatem DEI auxiliantem. Non erat quidem in Adamo & Angelis infirmitas sananda, sed instabilitas tegenda & firmanda. Nulla erat agendi difficultas, sed magna cadendi facilitas, ut eventus probavit.


*Petes 2dò.* Utrum donum perseverantiae finalis sit idem ac donum confirmationis in gratia?

*R. negative.* Quia donum confirmationis in gratia dat non posse peccare sive mortaliter, sive venialiter, secundum modum, quò datur. At donum perseverantiae finalis remanente potentia peccandi dat tantum non peccare mortaliter usque

mor-




tem, hoc est quod habens donum perseverantiæ non est moriturus in peccati mortalis statu, sed ex speciali DEI gratia pænitentiam de eo aget. Unde donum perseverantiæ est commune omnibus prædestinatis, non autem donum confirmationis in gratia.



## DISSERTATIO IV.

### *De essentia gratiæ.*

Quæstio præcipuè erit de gratia habituali & sanctificante, quæ per antonomasiam appellatur gratia, per quam scilicet constituimur Filii DEI, & hæredes regni, & ad quam reducitur gratia actualis, sicut dispositio ad formam, & motus ad terminum, quæ pro inde non constituit speciem distinctam ab habituali gratia.



## ARTICULUS I.

*Utrum gratia sit donum animæ intrinsecum?*

**N**Egant Lutherani & Calvinistæ, qui dicunt hominem peccatorem etiam in peccatis perseverantem esse Deo gratum

gratum & amicum denominatione extrinseca, nempe per imputationem justitiæ Christi, cujus intuitû DEUS ipsum diligit; ejus peccata diffimulat, eumquæ habet Filium & hæredem; modo tamen per fidem internam, veluti per conditionem firmiter credat, & confidat DEUM per merita Christi, peccata etiamsi, ad finem vitæ continuata, condonaturum. En clavim patentissimam omnibus flagitiis viam aperientem. Contra quos.

*Dico.* Gratia habitualis gratum faciens est DEI donum animæ intrinsecum. Est de fide definita in Conc: Trid: Sess: 6. can: 11. *Si quis dixerit homines justificari, vel sola imputatione justitiæ Christi, vel sola remissione peccatorum, exclusa gratia & charitate, quæ in cordibus eorum per Spiritum S. diffundatur, atq; illis inhæreat; aut etiam gratiam, qua justificamur, esse tantum favorem Dei, anathema sit.* Hanc veritatem passim clamat Scriptura; Ezech: 36. *Effundam super vos aquam mundam - - - Dabo vobis cor novum, & spiritum novum ponam in medio vestri.* Petr: 1. *Maxima & pretiosa promissa nobis donavit, ut per hæc efficiamini consortes Divinæ naturæ.* Rom: 5. *Charitas Dei diffusa est in cordibus nostris per Spiritum S.*



*S. qui datus est nobis. 1. ad Tim: 4. Noli negligere gratiam, quæ est in te. 2 Cor: 5. Signavit nos & dedit pignus spiritus in cordibus nostris. Joan: 4. Qui biberit ex hac aqua, fiet in eo fons aquæ salientis in vitam æternam. Joan: 1. cap: 3. Omnis, qui natus est ex Deo, peccatum non facit, quoniam semen ipsius in eo manet &c. hujusmodi; atqui semen insitum, pignus commissum, sigillum impressum, fons aquæ è corde scaturiens importat aliquid animæ intrinsecum. Hinc S. Aug: lib: 1. de peccatorum meritis, cap: 9. Deus dat sui Spiritus occultissimam fidelibus gratiam, quam latenter infundit & parvulis: Ergo.*

*Suffragatur ratio. Theologica sumpta ex S. Thom: hic q. 110. a. 1. Gratia est, quâ DEO grati sumus, & ab ipso diligimur; non enim per gratiam quodvis beneficium gratis datum intelligimus; sed quô homo est DEO gratus, acceptus ac ab eo dilectus, seu est ipsa Divina dilectio ex parte DEI, & terminus illius ex parte hominis; atqui hujusmodi gratia non dicit solum amorem DEI extrinsecum; sed importat aliquid in anima intrinsecum. Ergo.*

*- - Prob: Min: Amor humanus & Divinus, in hoc conveniunt, quod respiciunt bonum; sed in hoc differunt, quod amor humanus*

manus sit sterilis, & affectivus tantum, non efficiat bonum, quod diligit, sed supponit; at vero amor DEI cum sit efficacissimus, neque solum affectivus, sed & effectivus, (est enim causa totius bonitatis creaturæ, quæ à se bonum habere non potest) bonum non supponit, sed efficit: Ergo fieri non potest, ut hominem DEUS diligat, & gratum habeat, quin ipsum bonum efficiat, secundum modum, quò eum diligit; ita ut si ipsum diligat in ordine naturali, faciat ipsum bonum naturaliter, conferendo ipsi dona naturalia, esse, vivere &c. Si in ordine supernaturali, faciat ipsum bonum supernaturaliter, conferendo ipsi bonum supernaturale, quò ipsi gratus & amicus in ordine ad finem supernaturalem, existat.

*Obj:* Isaïæ 43. legitur: *Ex quo honorabilis factus es, & gloriosus in oculis meis, ego dilexi te.* Ergo dilectio DEI non supponit bonitatem in homine.

*R.* Cum S. Thom: in cap: 43. Isaïæ N. Conseq; Quia tò *ex quo* non significat causam aut prioritatem, sed concomitantiam tantum & effectum dilectionis DEI; ita ut sensus sit, ex quo feci & reputavi te honorabilem &c.

*Instab: amo.* DEUS diligit omnes creaturas;



turas; atqui nemo dixerit hac dilectione DEUM in ipsis producere aliquid supernaturale Ergo. Maj: patet ex illo Sap: 11. *Diligis omnia quæ sunt, & nihil odisti eorum, quæ fecisti.*

R. D. Maj: Diligit dilectione merè naturali C. supernaturali, (exceptis excipendis.) N. Maj: DEUS namq; per naturalem dilectionem communicat creaturis bona naturalia. Dixi *exceptis excipendis*, quia ultra dilectionem naturalem, quâ prosequitur omnem creaturam, creaturæ rationali vi dilectionis supernaturalis communicat bona supernaturalia, inter quæ ut donum principale est gratia habitualis.

*Instab: 2do.* DEUS diligit prædestinatos; atqui tamen non semper ponit in eis aliquid supernaturale, scilicet dum sunt in peccato. Ergo.

R. Nego DEUM diligere amore efficaci prædestinatum, dum est in peccato.

*Repones:* Esto amor DEI sit efficax: inde sequitur tantum, quod in homine causet aliquod auxilium supernaturale, non omnino gratiam habitualement.

R. N. *Sequelam.* Hic enim est quæstio de amore DEI non qualicunque, sed perfecto, quò vult homini beatitudinem supernaturalem, tanquam filio & hæredi,

ex

ex quo amore debet causari talis gratia, per quam participet Divinam naturam, cui debetur beatitudo ut hæreditas. Ex his.

*Collig:* DEUM creaturam rationalem in via existentem triplici dilectione prosequi: *amò:* naturali, per quam communicat ei bona naturalia; *2dò,* supernaturali imperfectâ, qua ei communicat dona quædam supernaturalia, ut fidem, spem, & auxilia transeuntia, quæ possunt stare cum peccato, & odio DEI; *3tiò:* perfectè supernaturali, quâ simpliciter & perfectè diligit hominem in ordine ad æternam beatitudinem, & per eam ipsi communicat gratiam habituales, quâ fit DEO gratus & amicus, particeps Divinæ naturæ, & hæres regni cælestis.

*Petes amò.* Utrum gratia DEI sit qualitas animæ?

*Nota:* Loquimur de gratia habituali, nam gratiam actuales, cum detur per modum transeuntis non esse qualitatem, nisi forte incompletam, habentem se per modum passionis, & motûs certum est.

*R.* Gratia sanctificans est quædam animæ qualitas, seu donum permanens in anima.

Patet ex Scriptura superius adducta,  
ubi



ubi gratia dicitur semen, pignus, sigillum, fons, hæc enim significant donum permanens. Hinc Trid: loco cit: cap: 16. *Justitia*, inquit, *nostra dicitur, quia per eam nobis inhaerentem justificamur*. Hanc doctrinam, quam Trid: hic definit de fide, Concil: gen: Viennense jam elegerat ut probabiliorem, Clement: de Fide.

*Petes 2dò. Utrum sit de fide gratiam sanctificantem esse rigorosè qualitatem seu habitum?*

*R. negativè. Ita tamen esse, est tenendum. Prima pars patet: quia Concilia Viennense & Trid: consultò abstinuerunt à vocibus qualitatis & habitus, nè quæstionem de nomine tantum controversam definirent. Unde videtur, quod ille fidei satisfaceret, qui teneret gratiam sanctificantem esse donum habituale internum, distinctum ab actu, animæ permanentiter inhærens. Secunda pars inde constat: quod gratia sanctificans est permanens; est difficile mobilis, quantum est ex se & principiis suis, nempe innixa influxui Divino, & ex se importans inclinationem contrariam peccato, quod ejus est destructivum; licet per accidens ratione status possit facile perdi; & tandem hominem de se indifferentem ad bonum & malum, disponit,*

nit, ut se benè habeat circa Divina. Ex his

*Collig:* quod gratia proximè ordinatur ad tribuendum esse supernaturale, & mediatè per virtutes infusas ad operandum supernaturaliter.

## ARTICULUS II.

*Utrum gratia sanctificans sit formalis & physica participatio naturæ Divinæ?*

**G**ratiam esse aliquam Divinæ naturæ participationem nullus negat propter expressa Scripturæ & Patrum testimonia, sed quæ & quomodo sit intelligenda controversatur. Quidam dicunt esse tantum moralem consistentem in rectitudine voluntatis & imitatione sanctitatis & justitiæ DEI, in suis operibus, eo sensu, quo qui imitantur fidem & sectantur vestigia Abrahæ, dicuntur filii ejus, qui imitantur malitiam diaboli, dicuntur ejus filii; quamvis physicè non sint ex iis nati. Alii & communius dicunt esse participationem physicam, sed non sic intelligenda est participatio physica, quasi per gratiam natura Divina quoad essentiam communicetur homini, sicut in humanis natura parentis communicatur filio, hoc enim modò



modò solum communicatur natura Divina ad intra Divinis Personis, sed intelligenda est per similitudinis participationem, seu per donum aliquod à natura Divina distinctum, eam analogice & imperfectè imitans & exprimens.

*Dico:* Gratia sanctificans est formalis & physica participatio divinæ naturæ. S. Thom: hic q. 110. a. 3. & 4. & q. 112. a. 1.

*Prob:* Ex illo celebri & expresso testimonio Principis Apostolorum: Epist: 2. c. 1. *Per ipsum (Christum) maxima & pretiosa nobis promissa donavit, ut per hæc efficiamini Divinæ consortes naturæ.* Item Scriptura passim testatur justos per gratiam ex DEO generari, nasci, renasci, & filios fieri DEI. Jacobi 1. *Voluntariè genuit nos verbò veritatis, ut simus initium aliquod creaturæ ejus.* Joan: 1. *Dedit eis potestatem filios Dei fieri --- qui ex Deo nati sunt.* Joan: 3. *Nisi quis renatus fuerit &c.* & alia: atqui per generationem & nativitatem natura communicatur, isquè solus filius dicendus est, qui Patris naturam refert. Ergo. Suffragatur ratio. Sic gratia participat naturam divinam; sicut alia dona participant Divina attributa; atqui alia dona participant propriè & physice

sicè divina attributa; sic charitas propriè participat divinum amorem; lumen gloriæ, divinum lumen; gloria Sanctorum ipsam DEI gloriam & beatudinem, Joan: 17. *Ego claritatem, quam dedisti mihi, dedi eis.* Insuper: Effectus gratiæ sanctificantis, ut est participatio divinæ naturæ, sunt virtutes supernaturales, quæ ad illam sequuntur ut proprietates, & finis est visio beatifica; atqui hæ virtutes & visio sunt quid reale & physicum; Ergo & gratia erit realis participatio Divinæ naturæ.

*Obj: Imò.* Ex S. Scriptura adducta non colligitur gratiam esse participationem physicam divinæ naturæ, quia potest intelligi de participatione morali. Ergo.

*R. N:* Argumentum cum prob: Nam verba, quibus DEUS dona sua commendat, non sunt exaggerativa, nequè hyperbolica, quasi plus exprimant, quàm reipsa sint, sed potius sunt infra magnitudinem donorum; non enim DEUS est ut homo, sed DEI dona ac promissa verborum expressionem superant, juxta illud Apostoli 1. Cor: 2. *Oculus non vidit, nec auris audivit, nec in cor hominis ascendit, quæ præparavit Deus iis, qui diligunt illum.* Adde juxta regulam S. August: Scripturam propriè



priò & obviò sensû esse intelligendam, ubi nullum occurrit inconueniens; atqui nullum est iuconueniens, quod gratia sit physica & propria participatio Divinæ naturæ. Ergo.

*Dices:* Res inanimatæ dicuntur generari à DEO, ut Job: 38. *Quis est pluviae Pater, aut quis genuit stellas roris;* atqui tamen non participant naturam DEI; Ergo cum dicimur nasci, generari à DEO, hoc moraliter intelligendum.

*R.* Scripturam phrasi poeticâ, quæ frequens est in libro Job ibi ponere Patrem pro Auctore, & sumere generationem latò & improprio sensû, pro quacunque productione.

*Repones:* Scriptura eos, qui benè vivunt, & faciunt DEI voluntatem, vocat filios DEI, ut Math: 5. Luc: 6. & Math: 12. Christus vocat fratres suos, qui faciunt Patris suis voluntatem; atqui his significatur solum morale consortium cum DEO, nosq; effici ejus filios & Fratres Christi moraliter seu imitatione morum: Ergo ex testimoniis allatis non evincitur participatio propria & physica naturæ Divinæ, sed moralis tantum.

*R.* Equidem nos etiam morali quodam modò efficimur filii DEI per imitationem  
morum;

morum: at illa non excludit alteram, quâ etiam sumus per gratiam filii DEI, naturam divinam physicè participando, sed supponit. DEUS enim primò infundit gratiam, quâ divinam naturam physicè participamus, & ipsi grati & ejus filii effici-mur; deindè homo per proprios actus gratiâ informatos, fit etiam filius DEI sensû morali, mores imitando; ut exemplo patet in humanis. Et hoc innuunt verba Christi Math: c. 5. *ut sitis filii Patris vestri*; supponunt enim jam aliunde esse Patrem, quàm ex dilectione inimicorum.

*Repones 2dò*, Per gratiam efficimur duntaxat filii DEI adoptivi; atqui in humanis adoptio non communicat naturam, sed tantum jus ad hæreditatem. Ergo similiter in divinis.

*R, N. Conseq; Disparitas est 1mò*. quod in humanis adoptio supponat in adoptato eandem specie naturam, quæ est in adoptante, secus in divinis. *2dò*. quia amor, quo adoptans fertur in adoptatum in humanis est sterilis & affectivus tantum, non effectivus & efficax physicè, unde nihil physicum in eo producere potest, sed tantum quid morale & civile, nempe jus ad hæreditatem; amor autem, quò DEUS per gratiam adoptat hominem, est effectivus



ctivus & efficax, & in eo efficit bonum, quod diligat, scilicet participationem divinæ suæ naturæ.

*Obj: 2dò.* Natura divina non est participabilis à creatura. Ergo.

*R: D. Ant:* Non est participabilis per essentiam creaturæ C. accidentaliter per donum creatum, quod divinam naturam analogicè imitetur & exprimat N.


*Petes 1mò.* Utrum gratia sanctificans distingvatur à charitate?

*R.* Probabilius affirm: Quia Scriptura, Concilia, & Patres diversis nominibus gratiam & charitatem appellant, & de illis, ut duabus rebus loquuntur: sic 2. Cor: 13. *Gratia Domini nostri JESU Christi & charitas Dei.* Trid; Sess: 6. cap: 7. Can: 11. definit hominem non justificari *exclusa gratiâ & charitate.* Et in hoc sensu mentem Concilii intellexit Catechismus parte 2. de baptismo, ubi cum cap: 38. dixit hominis animam in baptismo divina gratiâ repleti, eamquè descripsit, cap: 39. immediate subjungit: *Huic additur nobilissimus omnium virtutum comitatus, quæ in animam cum gratia infunduntur.* S. Aug: de dono persever: c. 16. *Gratia prævenit charitatem.*

*Petes 2dò.* Utrum gratia sit in essentia animæ,

animæ, tanquàm subjecto, an in aliqua potentia?

R. Gratia est in essentia animæ ut in subjecto. Ratio, quia per gratiam regeneramur in filios DEI; atqui generatio prius terminatur ad essentiam, quàm ad potentias. Ergo.



## DISSERTATIO V.

### *De divisione gratiæ.*

Hanc materiam S. Thomas egregiè tractat q, III. Igitur.



## ARTICULUS I.

### *Quæ sunt gratiæ divisiones.*

**G**ratia in communi Theologicè sumpta, prout de ea hic agimus; est donum supernaturale gratis à Deo concessum creaturæ rationali intuitu meritum Christi, in ordine ad salutem æternam. Dicitur donum, quod est genus, supernaturale, ut distingvatur à donis naturalibus, quæ latò sensû gratiæ dicuntur. Non tamen inde excluditur certa dispositio rerum



rum naturalium ex singulari providentia in ordine ad salutem, hæc namq; est supernaturalis ex parte finis & principii. Dicitur: *gratis concessum*, idest, nullo modo debitum, alioquin non foret gratia, ut d. Apost: Dicitur: *creaturæ rationali intuitu &c.* per primas particulas designatur subjectum seu causa materialis; per secundas causa efficiens, per subsequentes, causa meritoria; per ultimas, causa finalis.

Gratia sic descripta dividitur in *externam* & *internam*; externa est, quæ hominem solum extrinsecè afficit & movet, ut sunt lex divina, prædicatio Evangelii, miracula, exempla Christi & Sanctorum, occasiones bene agendi ex providentia supernaturali præparatæ, occasiones peccandi eadem providentiâ remotæ, verbò: omnis effectus providentiæ supernaturalis ad salutem nostram ordinatus: Hanc gratiam eleganter ex parte describit S. Aug: Hom: 23. inducens DEUM sic loquentem: *Regebam te mihi; servabam te mihi. Ut adulterium non committeres, suavor defuit; ut suavor deesset, ego feci. Locus & tempus defuit; ut deesset, ego feci. Agnosce ergò gratiam.* Ad hanc speciem reduci potest amor, quò nos DEUS dilexit ab æterno in ordine ad beatitudinem, &

dicitur gratia increata, ex qua in tempore effluunt omnes gratiæ creatæ. Gratia interna est, quæ hominem intrinsecè afficit, sive inhærendo, ut gratia habitualis & virtutes infusæ, sive interiùs movendo, ut sunt gratiæ actuales, intellectûs & voluntatis.

Gratia interna dividitur *primò* in gratiam gratis datam, & gratiam gratum facientem; non quod gratia gratum faciens non fit gratis data, sed quia cùm primum membrum careat proprio nomine, illi ut ignobiliori tribuitur nomen generis. Gratia gratis data est, quæ per se primò ordinatur ad salutem aliorum, estquè *donum Dei gratis collatum ad procurandam aliorum salutem*, juxta illud 1. Cor: 12. *datur unicuiquè manifestatio spiritûs ad utilitatem*, nempe aliorum. Gratia gratis datæ numerantur novem species 1. Cor: 12. Sermo sapientiæ, sermo scientiæ, fides, gratia sanitatum, operatio virtutum, prophetiæ donum, discretio spirituum, genera linguarum, interpretatio sermonum. Gratia gratum faciens est, quæ per se primò ordinatur ad salutem recipientis, & est *donum gratuitum, quò homo justus & acceptus Deo constituitur*. Dixi de utraquè *per se primò*, quia gratia gratis data potest conducere  
secun-



secundariò ad salutem recipientis, si benè, id est, ex charitate DEI eà utatur; & gratia gratum faciens potest etià secundariò conducere ad salutem aliorum, per exempla virtutum.

2dò. Gratia gratum faciens dividitur in actualem & habitualem: Habitualis est duplex, una formaliter sanctificans, & est gratia habitualis residens in anima, scilicet *formalis & physica participatio Divinae naturæ*; Altera sanctificans completè, & sunt virtutes infusæ. Gratia actualis, quæ concurrit efficienter ad justificationem; quatenus DEUS per eam movet ad vitam piè instituendam, & ad opera salutaria facienda, quibus vel disponimur ad gratiam habitualem, vel eam conservamus, vel ejus augmentum meremur. Vid: sup: a. 1. Dissert: 4.

3tiò. Gratia actualis dividitur in operantem & cooperantem S. Thom: sic divisionem explicat: operatio alicujus effectûs non attribuitur mobili, sed moventi. In illo ergo effectû, in quo est mota mens nostra & non movens, solus autem DEUS movens, operatio DEO tribuitur & secundùm hoc dicitur gratia operans, *operatur velle* ad Philip: 2. In illo autem effectû, in quo mens nostra & movet & movetur, opera.

operatio non solum tribuitur Deo, sed etiam animæ, & secundum hoc dicitur gratia cooperans. Igitur gratia operans est, qua *aliquid Deus in nobis sine nobis operatur* vg, velle. Cooperans, qua *aliquid in nobis una nobiscum operatur*. Cor: 15. *non ego, sed gratia Dei mecum*. Hæc dicta spectant gratiam actualem. Observat autem S. Thom: hanc divisionem etiam pertinere ad gratiam habitualement, ratione diversorum officiorum; ut enim exercet rationem causæ formalis sanando & justificando, dicitur gratia operans; ut autem est principium radicale actûs meritorii in genere causæ efficientis, mediante virtutibus infusis, dicitur gratia cooperans.

4to. Dividitur gratia in prævenientem, & subsequentem: *Misericordia ejus præveniet me*. Psal: 58. *Misericordia ejus subsequetur me*. Psal: 21. Hanc divisionem exponit S. Thom: per ordinem ad effectus priores & posteriores. Sunt enim quinque effectus gratiæ in nobis, quorum primus est, ut anima sanetur; secundus, ut bonum velit, tertius, ut bonum, quod vult, efficaciter operetur; quartus, ut in bono perseveret; quintus, ut ad gloriam perveniat. Igitur gratia prout in nobis  
causat



causat primum effectum, vocatur præveniens respectu secundi effectûs, & prout causat secundum, vocatur subsequens respectu primi, & præveniens respectu tertii, & sic de cæteris.

Aliò modò ex eodem S. D. potest intelligi præveniens & subsequens respectivè ad hominem, quem movet; ita, ut dicatur gratia præveniens, quæ facit, ut homo benè velit, subsequens; quæ facit, ut homo exequatur bonum, quod volebat: *Nolentem prævenit, ut velit, inquit Aug: in Enchyr: cap: 32. Volentem subsequitur, ne frustra velit.*

*Nota tamen*, omnem gratiam in hoc sensu esse prævenientem, quod DEUS in omni bona volitione, & omni opere bono prius prioritate causalitatis operetur, quàm nostra voluntas. Quidquid enim boni volumus, ipse facit, ut velimus, & quidquid boni facimus, ipse facit, ut faciamus, ut continuo docet S. August: Undè nunquàm potest dici gratia subsequens in hoc sensu, quasi sequatur opera nostra naturæ, ut conatus naturales, vel in aliquo sit posterior liberò arbitriò; id namquè pertinet ad errorem Pelagii; sed ut dictum est: dicitur subsequens, vel quia sequitur aliam gratiam, seu alium gratiæ

gratiæ effectum, vel quia datur ad exequendum, quod per gratiam prævenientem est volitum.

5<sup>to</sup>. Gratia à quibusdam dividitur in excitantem & adjuvantem. Excitans, quæ à somno peccati ad pœnitentiam nos movet; adjuvans quæ jam excitatos, & de nolentibus volentes factos adjuvat ad perficiendum, quod volebamus. Sed ut patet: excitans reducitur ad operantem & prævenientem, adjuvans ad cooperantem & subsequentem.

6<sup>to</sup>. Gratia dividitur in sufficientem & efficacem. Nota: sufficiens ad aliquid, dicitur dupliciter. *1<sup>mo</sup>*: simpliciter & ex omni parte, ita; ut nihil aliud requiratur in quovis alio genere. *2<sup>do</sup>*: secundum quid & in certo genere, ita, ut nihil ulterius requiratur in isto genere, licet aliquid aliud requiratur in alio genere. Per gratiam sufficientem hic intelligimus eam secundò modò, quæ in suo genere, hoc est, in ratione potentiæ agendi sufficit. Per gratiam autem efficacem intelligimus eam, quæ hanc potentiam applicat ad actum. Huic notioni conveniunt variæ definitiones: Gratia sufficiens est, quæ confert facultatem benè agendi; efficax, quæ præbet bonum usum hujus facultatis. Item

gratia

R. R.



gratia sufficiens est, quæ dat bonum posse, si velimus; efficax, quæ facit, ut velimus. Gratia sufficiens, gratia possibilitatis; efficax, gratia actionis. Tandem juxta S. Aug: gratia sufficiens est auxilium *sine quo non*; gratia efficax auxilium *quo*. De utraquæ hac gratia plura infra; antè præmittendæ sunt opiniones & systemata circa illam. Ergo.

---

## ARTICULUS II.

*Varia systemata circa gratiam sufficientem  
& efficacem.*

**Q**Uænam fuerunt systemata Pelagianorum & Semi-Pelagianorum circa necessitatem, naturam & proprietates utriusquæ gratiæ supradictum in Dissert: I. Hic tria tantum systemata proponam, Jansenii, Thomistarum, & Molinistarum, sive Congruistarum.

§ I. mus.

*Systema Jansenii.*

I. **R**adix, unde profluit tota hæresis Jansenii, est distinctio, quam fecit inter statum innocentiae & naturæ lapsæ, in eo sitam, quod in statu naturæ innocentis

centis non essent, nisi gratiæ sufficientes pendentes à voluntate Adami; in statu autem naturæ lapsæ non sunt nisi gratiæ efficaces absolutè dominantes hominis voluntati. Ita Jansenius in toto suo opere.

*H.* Ex hoc falso principio non agnoscit aliam causam necessitatis gratiæ efficacis pro præfenti statu, quàm infirmitatem naturæ vulneratæ, & corruptæ per peccatum. Sic S. Thom: 3. 1. 8. c. 2.

*III.* Hæc gratia juxta Jansenium nihil aliud est, quam delectatio spiritualis, seu motus indeliberatus delectationis cælestis; quæ nos movet ad bonum; sicut cupiditas est motus indeliberatus delectationis terrenæ, quæ nos movet ad malum. Lib: 4. de grat: cap: 1. 2. 3. &c. docet Jansenius.

*IV.* Si delectatio cælestis fit gradu aliquo superior cupiditate, gratia fit victrix, & nos rapit necessario ad bona; si è contra delectatio terrena fit superior, cupiditas fit pariter victrix, nosquè necessario rapit ad malum; sicut majus pondus in bilance necessario elevat minus; Tum quia, ut centies repetit Jansenius, secundum id, quod magis delectat, necesse est ut operemur; tum quia juxta ipsum hæc delectatio relative victrix, sive gratiæ sive cupidita-



piditatis, diametraliter opponitur indifferentiæ agendi vel non agendi.

Nec id obstat, quin homo sit liber juxta ipsum ad merendum & demerendum in electione boni & mali, quia in ejus principiis, hæc indifferentia agendi & non agendi non est essentialis libertati; cum enim, juxta ipsum libertas nihil sit aliud quam voluntas, hoc ipso quod vult, infert esse liberam; ita, ut sola coactio & non necessitas saltem mutabilis repugnet libertati. Ita Jans: lib: 6 de gratia Christi cap: 6. & ulterius. Dixi *necessitas saltem mutabilis*. Quia ipse distingvit duplicem necessitatem, unam fixam, immutabilem, quæ in nullis circumstantiis vinci potest, talis est necessitas, quâ DEUS seipsum diligit, qua Beati DEUM diligunt; hanc necessitatem dicit repugnare non quidem libertati essentiali, sed libertati viatoris. Altera necessitas mutabilis, transitoria, relativa, quæstantibus præsentibus circumstantiis relative ad vim oppositam superiorem vinci non potest, licet absolutè & in aliis circumstantiis vinci possit. Et hanc necessitatem contendit Jansenius non repugnare libertati hominis in hac vita, nec impedire, quin bene aut malè agat, ita, ut tota libertas hujus statûs sita sit in vertibilitate

te de una in alteram necessitatem, subalternante delectatione terrena vel cælesti. In hoc potissimum situm est virus hæresis Jansenianæ.

V. Ex eadem radice contendit voluntatem antecedentem in Deo salvandi omnes homines, quam vocat *primam* & *bonitatis*, non fuisse nisi pro statu innocentiae, non autem pro statu naturæ lapsæ, pro quo agnoscit solum voluntatem consequentem, quam vocat *secundam* & *justitiæ*. Hinc infert, quod vi voluntatis antecedentis Adam quidem receperit gratias sufficientes, sed quod nunc sit sterilis erga homines lapsos, nec ex illa eis obveniat ulla gratia, nè quidem mors Christi pro omnibus.

VI. Attamen non negat Jansenius dari in hoc statu naturæ lapsæ parvas gratias, quæ hominem utcunque moveant ad bonum, quæ illius desideria imperfecta in eo excitent, & quibus resistit. Verum quod benè notandum, hæ parvæ gratiæ juxta Jansenium, nec sunt, nec esse possunt sufficientes. Quia gratiam sufficientem eamq; versatilem solum admisit pro statu naturæ integræ, & excludit totaliter, à statu lapsæ naturæ. Ergo hæ parvæ gratiæ non sunt sufficientes, quia non  
pos-



possunt dare verum & sufficiens posse agendi bonum, legem implendi, se convertendi, nec Divina voluntas antecedens sterilis foret erga lapsos, si revera gratias sufficientes præpararet, quod non admittit Jansenius. Ex his.

*Collig:* Jansenius agnoscit in homine libertatem arbitrii, nomine, non re; reponit enim libertatem arbitrii hominis lapsi in solo voluntario cum perfecta advertentia rationis, seu in immunitate à coactione & à necessitate immutabili, non à necessitate mutabili. Agnoscit indifferentiam contrarietatis & contradictionis, non quæ sit vera potentia activa ad agendum bonum vel malum, sed quæ sit mera flexibilitas in bonum vel malum per delectationem gratiæ & concupiscentiæ alternatim voluntatem captivantis & necessitantis. Agnoscit tandem sub cupiditate dominante potentiam agendi benè & sub gratia victrici veram potentiam peccandi; potentiam scilicet absolutam & abstractam, non relativam ad delectationem superiorem dominantem, vel potentiam ligatam & vinculatam, non expeditam & liberam. De his plura apud Authorem Tract: de Affectibus hum: Dissert: 2. a. 1. §. 2. a. 2. 3. & 4. in Digress: histor: ibid: in fine Dissert: 2.

Ex

Ex toto hoc systemate spontè fluunt quinque famosæ propositiones damnatæ supra allatæ.

§. 2dus.

*Systema S. Thomæ & Thomistarum.*

**S**Chola Thomistica cum suo Doctore agnoscit 1mò: necessitatem duplicis gratiæ sufficientis, & efficacis pro omni statu. 2dò. gratiam sufficientem omnibus dari, aut saltem offerri; gratiam efficacem non omnibus conferri. 3tiò. Utramquè esse absolutè gratuitam. 4tò. Gratiam efficacem esse talem per se, & ex intrinsecis, hoc est ex omnipotentissima DEI voluntate. 5tò. Ex hac efficacia nullum inferri præjudicium libertati. De singulis ex principiis S. Thomæ agamus.

*Necessitas duplicis gratiæ.*

1mò. DEUS est prima & immediata causa omnium entium naturalium & supernaturalium.

2dò. Homo est causa secunda subordinata primæ in agendo, ex se indifferens & indeterminata ad agendum vel non agendum, & insuper ex se incapax, præsertim per peccatum debilitatis viribus, efficiendi ullum actum supernaturalem, & meritorium salutis.

3tiò.



5<sup>ti</sup>o. Actio, & potentia agendi sunt duo entia distincta tam in ordine supernaturali, quàm naturali, quorum primum est nobilius & perfectius secundò.

Ex his principiis, quæ locum habent in omni statu, inferunt Thomistæ necessariam esse tam in statu innocentiae, quam in statu naturæ lapsæ duplicem gratiam in ordine ad salutem; alteram minus perfectam & minus validam, quæ dat tantum posse, elevat, & reddit hominem aptum actui supernaturali, & vocatur *sufficiens*, alteram perfectiorem & validiorem, quæ potentiam determinat, & confert actionem, vocatur *efficax*, ita, ut nunquam contingat, quod hæc potentia, quàm confert gratia sufficiens, agat, & obtineat suum principalem effectum nisi ope gratiæ efficacis, alioquin DEUS desineret esse causa prima, & immediata actionis, & creatura, quæ non obstante potentia & elevatione collata per gratiam sufficientem, est semper indifferens, sibi ipsi daret determinationem, quam non habet, fieretquæ prima causa suæ salutis; sic tamen, quod sua culpâ careat gratiâ efficaci, quam DEUS præstò potest illi dare, & quam offert in sufficienti, nisi mala voluntate peccando cursum gratiæ sufficientis

tis fisteret, & efficaci impedimentum apponeret. Hæc ex S. Thom: in cap: 3. ad Eph: Lec: 2. 1. 2. q. 109. a. 1, & 2. ibid: a. 9. & 10. 2. 2. q. 137. a. 3. Cont: gent: c. 88. & 159. 1. 2. q. 113. a. 7. & 10. & alibi.

Quantum ad ordinem moralem docent, quod cum vires naturales, quas homo in sua creatione accepit, non sunt per peccatum destructæ, sed imminutæ tantum, possit adhuc viribus propriis aliquod bonum morale saltem non difficile facere, & ut actu faciat, opus sit tantum concursu generali, qui tamen aliquo sensu sit specialis & gratuitus, ut supra dictum. Ita S. Thom: q. 24. de Verit: a. 14. 1. 2. q. 85. a. 1. & 2. 2. 2. q. 10. a. 3, & 5.

#### *Distributio gratiæ:*

Est in Deo duplex voluntas super salutem hominum, una antecedens, conditionata, & inefficax, vera tamen & sincera salvandi omnes. Altera consequens absoluta, efficax salvandi aliquos tantum, ut in salvandis eluceat misericordia, in reprobandis iustitia, cæteraquæ in ambobus DEI attributa, ut dicitur in Tract: de DEI voluntate. Qui verò vult finem, vult media necessaria ad finem assequendum,

&



& eo modò vult media, quò vult finem. Cùm ergo DEUS velit sincerè, sed inefficaciter salvare omnes, debet dare omnibus auxilia sufficientia, quibus possint salvari; ita, ut si non salventur, non sit, quia non possunt, sed quia nolunt, & voluntariè peccando ponunt obstaculum gratiæ efficaci, quæ dedisset velle & agere. Ex altera parte cùm velit efficaciter salvare aliquos, debet illis dare gratiæ efficacis media, quibus reipsâ salventur. Hæc ex S. Thom: super cap: 12. Hebr: Lect: 3. in 1. d. 46. q. 1. a. 1. Ibid: d. 40. q. 4. a. 2. 2. 2. q. 137. a. 4. 1. p. q. 109. a. 6. & a. libi.

*Gratuitas seu independentia gratiæ.*

Utraquè voluntas in DEO super salutem hominum, est merus effectus ejus infinitæ misericordiæ, prorsus independens ab eorum meritis, consequenter gratiæ, quæ ex ea promanant, sunt pariter merè gratuitæ. Unde d. Apost: Rom: 11. *Non ex operibus; alioquin non est gratia.*

Insuper homo nihil ex se habet, quod ipsi conferat jus ad gratiam, aut DEUM adstringat eam illi dare. Quidquid homo habet ex se vel est peccatum, vel meritum humanum; peccatum reddit ipsum

L

gratia

gratiâ indignum, meritum humanum, cùm sit inferioris ordinis ad gratiam, non est illi sufficiens proportionatum, ut sit illius meritum; imò nec dispositio ad illam; dispositio enim debet esse ejusdem ordinis cum forma, ad quam disponit. Ita S. Th: 1. 2. q. 112. a. 3. & 6. q. 114. a. 5. q. 109. a 6. & alibi.

*Efficacia gratiæ.*

Suppositis, quæ primò dixi, DEUM per gratiam esse primam & immediatam causam nostræ salutis, omnium actionum nostrarum supernaturalium & meritoriarum, hominem verò causam secundam primæ subordinatam, eamquæ ex se semper indifferenter, & indeterminatam, sequitur necessario, quod hæc gratia non fiat efficax seu non habeat efficaciam ex consensu liberi arbitrii, quandoquidem in his principiis iste consensus, quovis modò consideretur, sive in instanti, quò datur, sive ut prævisus in congruis circumstantiis, sit semper effectus, & nunquam causa hujus efficaciz; & semper sit verum dicere, arguendo à priori; ideo hominem consentire, quia gratia est efficax; nunquam verò, ideo gratia est efficax, quia homo consentit; alioquin, ut dictum, DEUS non esset



esset causa prima & immediata hujus consensûs, consequenter nec salutis, & creatura hanc sibi prærogativam arrogaret. Igitur ex potentissima DEI voluntate, & supremo ejus dominio super voluntates nostras, hæc gratia habet suam vim & efficaciam ineffabilem. Et hoc est, quod exprimitur hac phrasi: *gratia per se efficax*. Ita S. Thom: q. 6. de malo 1. p. q. 19. a. 8. in 2. dict: 25. q. 1. a. 2. 1. 2. q. 10. a. 4.

*Libertas perfecta sub gratia per se effici.*

Cum hæc DEI omnipotentia non sit minus universalis, quàm efficax, & se extendat ad omnia entia, & omnes differentias & modus entium, motio, quæ ex illa profluit, non solum confert actionis substantiam, sed etiam modum, quò fieri debet, conformiter ad naturam causæ secundæ; ita, ut si sit causa necessaria, moveat, ut necessariò agat; si sit causa libera, moveat, ut liberè agat; & sublata duntaxat indifferentiâ passiva, relinquit integram indifferentiam activam, hoc est veram & completam potentiam, iisdem stantibus circumstantiis non agendi, illi resistendi, oppositum faciendi, non secus ac si ipsa voluntas sola se determinaret.

Quod ut clarius intelligas, attende moti-  
nem seu gratiam efficacem ad actum sup-  
ponere utramquè potentiam agendi &  
non agendi, neutram auferre, sed actum  
duntaxat, positio autem actûs non destruit  
potentiam ad oppositum; sicut homo stan-  
do non destruit in se potentiam sedendi;  
intellige tamen potentiam antecedentem  
& in sensu diviso. Hæc ex S. Th: Quod-  
libet 1. a. 7. 1. Perhjern lect: 14. 1. p.  
q. 19. a. 8. q. 83. a. 1. ad 3 & alibi.

*Varia discrimina inter systema Thomi-  
starum & Jansenianum.*

Quantum distat ortus ab occidente,  
tantum unum ab altero distat: 1<sup>mo</sup>. Jan-  
senius negat pro hoc statu voluntatem  
antecedentem in Deo sinceram & acti-  
vam salvandi omnes; Thomistæ omni-  
bus modis illam defendunt. 2<sup>do</sup>. Non  
agnoscit (Jansenius) pro hoc statu aliam  
gratiam, quàm efficacem; Thomistæ ultra  
efficacem (non in sensu Jansenii) admit-  
tunt sufficientem. 3<sup>tiò</sup>. Jansenius non agno-  
scit aliam causam necessitatis gratiæ, quam  
infirmiorem naturæ lapsæ; Thomistæ &  
inde & ulterius eam repetunt ex dignita-  
te primæ causæ, & primi motoris, præ-  
sertim in ordinē salutis, ex subordinatione  
causa-



causarum secundarum ad primam, ex earum indifferentia, & indeterminatione, atque ex improportione ad opera supernaturalia. 4<sup>to</sup>. Jansenius sub gratia efficaci non agnoscit veram, expeditam potentiam relativam ad oppositum; Thomistæ eam agnoscunt. 5<sup>to</sup>. Jansenius docet solam gratiam efficacem dare verum & completum posse; Thomistæ docent gratiam efficacem supponere verum & completum posse per gratiam sufficientem collatum, eamque istud posse tantum applicare ad actum. 6<sup>to</sup>. Jansenius reponit libertatem essentialiter in sola immunitate à coactione; libertatem hujus statûs, requisitam ad merendum & demerendum in immunitate à necessitate invariabili, non variabili; Thomistæ utramque reponunt in immunitate ab omni, sive utraque necessitate. 7<sup>mo</sup>. Jansenius non agnoscit in homine lapso veram & activam potentiam agendi vel non agendi pro nutu, sed meram flexibilitatem ab una necessitate ad aliam, sub gratia & cupiditate alternatim dominante: Hoc figmentum nunquam venit in mentem Thomistis, sed detestantur, veram activam & relativam potentiam profitentes. 8<sup>vo</sup>. Quinque damnatis propositionibus Jansenii, quinque oppositas opponunt ex S. Thom: Hæc sunt discrimina inter doctrinam Thomistarum &

Janſenii, ipſe Janſenius lib: 8. de grat:  
Chr: cap: 2. ſeptem discrimina inter ſuam  
& Thomiſtarum ſententiam ſtatuit.

§ 3<sup>t</sup>ius.

*Systema Theologorum, qui Congruiftæ  
dicuntur.*

I. **H**I Theologi videntur admittere tria  
prima capita ſyſtematis Thomiſti-  
ci, ſcilicet duplicem gratiam, ſufficientem  
& efficacem; ſufficientem omnibus ſaltem  
offerri; utramquè eſſe omnino gratuitam,  
ſed cùm quartum rejiciant, ſcilicet gra-  
tiam efficacem eſſe talem ex ſe, & ex  
intrinſecis, ſeu ex potentiffima DEI vo-  
luntate, tria priora ſenſû diversò à Tho-  
miſtis intelligunt.

II Ludovicus Molina, à quo dicuntur  
vulgo Moliniſtæ cadente ſæculo XVI.  
docuit non dari gratiam niſi ſufficientem  
ex ſe, eamquè fieri efficacem ex conſen-  
ſu voluntatis humanæ, DEUMQUE ſæpè  
offerre iis, qui non convertuntur, gratias  
fortiores & abundantiores, quàm iis, qui  
reipſa convertuntur; prædeſtinâſſe autem  
ad regnum, quos per ſcientiam mediam  
præſcivit ex innata libertate gratiæ omni-  
bus oblatae conſenſuros, & in ea perſeve-  
ratorios.

III.



III. Hæc doctrina multis nova apparuit, & displicuit; eam inter alios impugnârunt Bellarm: lib: 1. de grat: & lib: arb: c. 12. Henricus Henriques, in duplici censura data anno 1594. & 1567. Mariana de Regim: cap: 4. Eam Patres ordinis nostri coram SS. Pontificibus Clemente VIII. & Paulo V, Pelagianismi, aut Semi-Pelagianismi postulârunt, suamquè accusationem per plures annos infamosis disputationibus *de auxiliis* prosecuti sunt. Vide plura apud Authorem de Scientia media, Ser-ry de Auxil:

IV. Re maturius inspectâ Molinæ systema temperatum est à Suarezio, quod cum statuatur gratiam congruam, Congruistarum dictum est. In hoc igitur systemate Congruistæ agnoscunt duplicem gratiam, unam incongruam, alteram congruam. Prima dicitur incongrua, quia non est satis accomodata indoli, inclinationibus, passionibus, habitibus, tempori, loco, aliisque circumstantiis, in quibus versatur is, qui eam recipit, ut ab illo consensum obtineat, & ideo non est nisi sufficiens. Altera dicitur congrua, quia est accomodata indoli, & aliis circumstantiis illius, qui eam recipit, & in quibus per scientiam mediam ab æterno Deus præscivit ipsum infal-

infallibiliter consensurum; ita, ut hæc gratia congrua semper sit efficax, alias non foret congrua, & DEUS in sua præscientia falleretur. At hanc infallibilem efficaciam non habet ex se & intrinsecis, seu ex potentissima DEI voluntate, ut volunt Thomistæ; sed juxta aliquos ex sua congruitate, juxta alios ex ipsa præscientia divina, aut ex utroque; juxta vero rei veritatem ex ipsa voluntate consentiente, ut in systemate Molinæ.

V. Juxta hoc systema, quamvis gratia congrua in esse physico nihil amplius habeat ex parte DEI, quàm gratia incongrua; dicitur tamen habere quid amplius in esse morali, quatenus DEUS ex speciali benevolentia & providentia eam huic confert in iis circumstantiis, in quibus prævidit ipsum consensurum, cum posset aliter conferre, & reipsa conferat alteri in iis circumstantiis, in quibus prævidit non consensurum. Hinc fit, quod hæc gratia congrua juxta suos assertores sit majus beneficium, quam gratia incongrua, & ab hac distingvatur non solum quantum ad actum secundum & per consensum creaturæ, sed etiam quantum ad actum primum, & ex parte DEI.

VI. Molinistæ ergo efficaciam gratiæ  
repe-



repetunt ex consensu creaturæ; Congruistæ ex ejus congruitate & præscientia. At cum neq; congruitas, nec præscientia ullam vim intrinsecam conferant gratiæ, & fateantur ipsi nihil reale aut physicum habere, quod non habeat gratia incongrua seu sufficiens, palam est, in eorum systemate hanc efficaciam infallibilem gratiæ etiam repetendam esse à consensu voluntatis, ut in systemate Molinæ; & in hoc solum differunt, quod Congruistæ dicunt, DEUM ex speciali benevolentia ac intentione boni operis in nobis efficiendi, nos constituere in iis circumstantiis, in quibus per scientiam mediam prævidit nos concursui indifferenti oblato ex innata libertate consensuros, quam specialem benevolentiam non agnoscunt puri Molinistæ, sed dicunt DEUM æquali & generali voluntate gratiam omnibus offerre, quam quilibet pro innata libertate reddit efficacem vel inefficacem.

Circa hæc duo præfata systemata. *Observandum* itaq. Theologos, qui dicuntur Augustiniani, quantum ad statum naturæ integræ consentire cum Molinistis puris, cum Thomistis verò quantum ad statum naturæ lapsæ, excepto, quod efficaciam gratiæ repetant ex sola infirmitate naturæ

ræ; Thomistæ eam insuper repetant ex dependentia causæ secundæ à causa prima, & ex causæ secundæ indifferentia.

*Observ: 2dò.* Omnes Theologos, qui scientiam mediam rejiciunt, stare pro systemate gratiæ per se efficacis quoad substantiam, dissentire autem inter se duntaxat, quoad modum explicandi hanc efficaciam. Quidam eam explicant per sympathiam, quidam per motiones morales, quidam per delectationem, quidam per actus indeliberatos, quidam per solum divinum decretum, quidam per multiplicationem auxiliorum, quidam per præmotionem physicam, sic Thomistæ.

### ARTICULUS III.

*Utrum detur in hoc statu naturæ lapsæ gratia sufficiens?*

*Dico:* **P**Ræter gratiam efficacem datur in statu naturæ lapsæ gratia sufficiens. Est contra Jansenium, nec videtur salva fide posse negari.

*Prob:* Gratia sufficiens est, quæ dat posse facere bonum salutare, etiã in iis, qui illud non faciunt, seu, quæ dat facultatem



tatem sancti operis, sed effectu carentem culpâ voluntatis creatæ; atqui datur gratia hujusmodi in statu naturæ lapsæ. Ergo. *Maj: est notio gratiæ sufficientis explicatæ. Prob: Min: amò ex Scrip: Isaiaë 5. dicit DEUS. Quid est, quod debui ultra facere vineæ meæ & non feci? An quod expectavi, ut faceret uvas, & fecit labruscas? Prov: 1. Vocavi & renuistis. Math: 23. Quoties volui congregare filios tuos, & noluisti. Apoc: 3. Act: 7. 1. ad Thess: 5. 2. Cor: 6. habentur similia. His omnibus constat gratiæ plures deesse, illi resistere, illam extinguere, eam in vacuum recipere; talis autem non est efficax, sed sufficiens. Ergo.*

*Prob: 2dò eadem Min: Argumento ex definitionibus Ecclesiæ. De fide est mandata DEI esse observatû possibile justis, (quidquid dixerit Jansenius in propositione sua supra cit.) qui tamen illa non servant; ut definitum à Concil: Trid: Sess: 6. cap: 11. & can: 8. & à SS. Pontificibus in condemnatione primæ propositionis Jansenii; Ergo datur eis gratia, qua possibile fiant, non enim sunt possibile viribûs naturæ, præsertim cùm inter ea sint supernaturalia; aliunde hæc gratia non est efficax, quia, ut suppono, ea non implent; Ergo est sufficiens.*

*Prob:*

*Prob: 3tiò eadem Min: S. Aug: lib: de natura & gratia cap: 43. docet: DEUM non præcipere impossibilia; Ergo supponit dari gratiam, quâ possibilia fiant, etiam in iis, qui ea non servant; Ergo gratiam sufficientem. Toto libro de gratia Christi observat hæc tria à Pelagio distincta, possibilitatem, voluntatem & actionem. Quamvis Pelagius reponeret possibilitatem in natura, fatebatur tamen eam gratiâ adjuvari, & hoc in eo probat Augustinus; Ergo S. D. agnoscit gratiam possibilitatis seu sufficientem distinctam à gratia voluntatis & actionis seu efficaci. Et lib: de Correp: & grat: resellens excusationem eorum, qui dicunt, non perseveravimus, quia perseverantiam non habuimus dicit: *Homo, in eo quod audieras & tenueras, in ea perseverares, si velles.* Vestigia S. Aug: sequitur S. Th: 1. 2. q. 106. a. 2. ad 2. Item in cap: 3. Ephes: hic q. 109. a. 1. 9. 10. Consentiunt reliqui Patres hac in re. His adde hanc secundam Jansenii propositionem damnatam: *Interiori gratiæ nunquàm resistitur; E. aliquando ipsi resistitur; Ergo datur gratia interior, quæ non est efficax, sed sufficiens tantum.**

*Obj: 1mò. Janseniani plures Scripturæ textus;*



textus; sed quibus probatur duntaxat dari gratiam efficacem, & esse in DEO voluntatem scilicet absolutam & consequentem, cui non resistitur, quod ultro concedimus, at non excludunt gratiam sufficientem, & voluntatem DEI antecedentem, cui resistitur. Vel probant omnem gratiam habere aliquem effectum, quod non negamus.

*Obj: 2dò.* Plures textus August: quibus requirit gratiam efficacem, ut homo possit velle, & facere bonum.

*R.* Augustinum intelligendum esse de potentia consequente & conjuncta cum actu, non de potentia antecedente & meræ possibilitatis.

*Instab: 1mò.* S. Aug: lib: de Prædest: SS. ait: eos, qui non credunt, foris tantum audire & non intus. Ergo deficientes gratiâ, quæ dat credere, non est alia interior secundum August:

*R:* Sensum Aug: esse eos, qui non credunt foris tantum audire quantum ad effectum C. quia non magis credunt, quam si foris tantum audirent. Quantum ad sufficientiam gratiæ, quasi nullam interiorem haberent *N. Nam oppositum patet ex prob:*

*Subsumes:* Atqui S. Aug: excludit interiorem sufficientem Prob: Sub: Nam lib: de

de grat: Chr: cap: 13; ait: *Qui novit, quod fieri debeat, & non facit, nondum à Deo didicit secundum gratiam; sed secundum legem;* atqui his excludit gratiam interiorem sufficientem. Ergo.

*R. D. Min:* Excludit gratiam quoad effectum principalem C, quantum ad effectum immediatum N. *Min:* Gratiae sufficientis duo sunt effectus, unus mediatuſ & principalis, qui non habetur, nisi per gratiam efficacem, potest tamen haberi per sufficientem vg. impletio Divini præcepti, alius immediatus, ut quod moveat inefficaciter voluntatem ad implendum vg. præceptum, & hunc effectum semper consequitur gratia sufficiens. Adde hæc solvenda esse à Jansenianis, qui admittunt gratias interiores in eis, qui non credunt, nec faciunt.

*Instab: 2dò.* Aug: de Correp: & gratia cap: 10. 11. 12. hoc statuit discrimen inter gratiam status innocentiae, & naturae lapsae, quod gratia sufficiens esset propria statui innocentiae; gratia verò efficax propria sit statui naturae lapsae. Ergo.

*R. N. Ant:* Equidem docet Aug: Adamo datam fuisse tantum gratiam sufficientem ad perseverandum, & nunc dari prædestinatis efficacem; at non dicit hanc  
pro-



propriam esse huic statui, & illam propriam statui innocentiae. Vid: Dissert: 2. a. 3. & 4.

*Obj: 3tiò.* Omnis gratia interior etiam sufficiens dicta, secundum Thomistas, habet effectum; Ergo omnis gratia est efficax.

*R. D. Ant:* Etiam sufficiens habet effectum imperfectum & minus principalem *C.* perfectum & principalem ad quem datur *N. D. Conseq:* Ergo omnis gratia est efficax secundum quid *C.* simpliciter *N.* Fieri enim non potest, ut illuminet DEUS intellectum, & non illuminetur, voluntatem moveat, & voluntas non moveatur, & hic est effectus minus principalis; effectus principalis est illud, propter quod DEUS movet voluntatem vg. præcepti impletio, quæ quidem vi gratiæ sufficientis potest fieri, sed actu non fiet; proinde hunc effectum principalem gratia sufficiens non habet. Vid: Auth: hic.

---

#### ARTICULUS IV.

*Quò sensû sit admittenda gratia sufficiens?*

*Dico:* **A**dmittenda est gratia sufficiens sensû Thomisticò.

*Prob:* Gratia sufficiens sensû Thomisticò est,

est, quæ confert homini facultatem seu potentiam benè agendi, ultra quam, ut actu benè agat, & benè utatur hac facultate, requiritur altera validior, scilicet efficax; atqui admittenda est hoc sensû gratia sufficiens; Ergo. Min: quoad 1<sup>am</sup> partem probata manet ex art: præc: *Prob: 2da pars*: Actio bona, est quid distinctum à potentia benè agendi, est quid nobilius ipsa, & quod præcipuum est, in negotio salutis; atqui DEUS est prima & immediata causa salutis, & omnis actus salutaris. Ergo sicut per gratiam sufficientem constituitur prima & immediata causa benè agendi; ita per gratiam efficacem à sufficienti distinctam constitui debet prima & immediata causa actus salutaris. Utramquæ hanc gratiam S. Thom: clarè in Caput 3. Epist: ad Eph: Lect: 2. tradit: *Tangit Apostolus auxilium sibi præstitum & ministeriorum executionem: Hujusmodi autem auxilium duplex fuit: Unum quidem facultas exequendi, aliud ipsa operatio seu actualitas. Facultatem autem dat Deus infundendo gratiam & virtutem, per quas efficitur homo potens & aptus ad operandum, en gratiam sufficientem: Sed ipsam operationem confert, in quantum in nobis interius operatur, movendo & instigando ad bonum*

--- in-



*inquantum virtus ejus operatur in nobis velle & perficere pro bona voluntate. Vid: etiam 1. 2. q. 109. a. 1. & a. 2. & alibi.*

*Obj: Imò. Ista gratia non est sufficiens, præter quam requiritur altera; atqui præter gratiam explicato sensu sufficientem, alia requiritur Ergo. Maj: patet: quia sufficiens præter quod nihil aliud requiritur.*

*R. D: Maj: Ista gratia non est sufficiens ex omni parte & in omni genere præter quam &c. C. Maj: non est sufficiens in suo genere, secundum acceptionem hujus vocis sufficiens N. Maj: D. Min: alia requiritur in diverso genere C. in eodem genere N. Min; Dicimus gratiam, quæ sic dat homini facultatem benè agendi, ut si non agat, non ideo sit, quia non potest, sed quia non vult; proprio & naturali sensû, & juxta communem loquendi modum, esse sufficientem, quamvis ad actu agendum alia requiratur nempe efficax. Vid: Auth: Exemplum patet in Passione Christi, quæ ex se sufficiens est ad omnes salvandos, ut tamen actu salventur, plus requiritur.*

*Instab: Saltem hæc gratia revera est insufficiens ad actu operandum, seu ad actu servandum mandatum; atqui ad hoc debet esse sufficiens, quia Deus non præ-*

cipit nobis, ut possimus mandata servare; sed ut actu observemus. Ergo. *Prob: Maj:* Illa gratia est insufficiens ad actu mandatum observandum; cui ad actualem observantiam deest aliquid, quod non est in nostra potestate; atqui gratia efficax, quæ &c. non est in nostra potestate, & deest. Ergo.

*R. Probation: D. min:* Gratia efficax non est in nostra potestate, ut effectus, qui illi subsit *C.* ut causa, quæ illi præstò adfit *N.* Deus enim quantum est ex se, est paratus omnibus, qui habent gratiam sufficientem, dare efficacem, nec eam ulli denegat, nisi propter culpam, quæ saltem ordine & naturâ præcedit gratiæ subtractionem; nempe efficacis gratiæ. Et hæc est constans doctrina *S. Thom:* qui 3. cont: gent: c. 59. ait: *Deus, quantum in se est paratus est omnibus gratiam dare - - sed illi soli gratia privantur, qui in seipsis gratiæ impedimentum præstant.* Item habet in 1. d. 40. q. 4. a. 2. 1. 2. q. 112. a. 3. & alibi.

*Dices:* Gratia sufficiens sensû explicatò est inutilis *E. Prob: A.* Gratiâ hac nemo unquam utitur *E.*

*R. cum P. Goudin:* Est inutilis ex se *N.* per accidens ex defectu hominis *C.*

Dat



Dat enim ex se verum posse, quod est utile, quodsi homo ea non utitur, hominis non gratiæ culpa est. Sicut in natura, sic in gratia multa DEUS præstat ex se utilia, quæ nostro defectu carent effectû.

*Ad prob:* Nemo utitur hac gratiâ reduplicativè ut merè sufficiente C. specificativè ut dat facultatem boni N. Gratia sufficiens consideratur *imò* ut merè talis, sub qua ratione connotat permissionem DEI, ut homo illi desit, illiq; resistat, & hoc sensu verum est, neminem illâ benè uti; *2dò* consideratur quoad propriam entitatem & proprium præcisè effectum, qui est dare bonum posse, & hoc sensû falsum eâ neminem benè uti. Nam pleriquè eâ sic considerata benè utuntur, & benè agunt, licet hoc ipsum, quod benè eâ utantur, sit effectus gratiæ efficacis.

*Obj: 2dò.* Ex gratia sufficiente homo fit pejor E. *Prob: Ant:* Si eâ careret, non peccaret; & dùm habet, toties peccat E.

*R. N. Ant:* Melior est enim, qui potest facere, quam qui non potest. *Ad prob.*

*D. Ant:* qui habet gratiam sufficientem, toties peccat ratione pravæ voluntatis C. ratione vel causâ gratiæ N. Quin imo per eam gratiam entitativè sumptam homo ponitur in statu non peccandi, sed suo

defectu sistit gratiæ cursum, & facit, quod maneat merè sufficiens. Hæc & alia hujusmodi possunt retorqueri in gratiam Congruistarum sufficientem.

Hinc habes corrigendam esse hanc falsam gratiæ sufficientis notionem, quam nobis affingunt AA. ut sit scilicet facultas ex se sterilis, cui DEUS pro libitu subtrahit influxum necessarium, ad eam reducendam in actum, sicquè contingat semper eam effectu frustrari. Est enim secundum nos gratia sufficiens semen Evangelicum, principium boni operis, illud virtute continens, & ad quod perveniret, nisi cursum ejus homo sua defectiva libertate sisteret; sicut bonum semen terræ mandatum fructum ferret, nisi aliquo terræ defectu impediretur. Profitemur, quod ut homo gratiæ non desit, eiquè consentiat, requiratur efficax; sed benè adverte, ut illi desit, ut illi resistat, ut peccet, sola sufficit defectiva libertas, quia illa resistantia, illud peccatum præcedit natura & ordine privationem gratiæ efficacis; ideo verum est dicere hominem privari gratiâ efficaci, quia peccando sufficienti restitit, non verò peccare, quia privatur gratiâ efficaci.

*Petes.* Quid & quotuplex sit auxilium gratiæ sufficientis?

*R. Amò.*




*R. 1mò*, Auxilium sufficiens non consistit in aliquo uno determinato, indivisibili, sed in pluribus concurrentibus ad actus nostros, unoquoque in suo genere, & inadæquatè. Nam Deus multiplici modo adjuvat ad bonum, modò exterius per legem, per prædicationes, exhortationes, exempla, miracula, flagella, beneficia &c. Modò interius per mentis illustrationes, voluntatis motiones, & habitus infusos virtutum. Hinc.

*R. 2dò*. 1mò Auxilium sufficiens dividitur in internum, & externum. Ad externum pertinent primò enumerata, ut lex, prædicationes &c. Ad internum, quod DEUS intra hominem operatur ad ipsum movendum ad bonum, & avocandum à malo. Hoc est duplex: aliud transiens, ut sunt illustrationes intellectûs, piæ motiones voluntatis; Alterum permanens, ut sunt habitus infusi virtutum.

Aliud est morale, aliud physicum. Ad moralia pertinent auxilia externa, quibus nos DEUS ostensione boni, & comminatione mali ad bonum commovet: ad illud etiam pertinent illustrationes mentis, quæ quamvis respectivè ad mentem sint physicae, relatæ tamen ad voluntatem sunt morales, quatenus eam tantum movent  
objecti-

objectivè propositione boni vel mali. Physicum est, quo DEUS ut causa efficiens hominem movet operando in voluntate, eam immutando.

Aliud proximum, quò quis immediatè potest bonum opus facere, ut sunt habitus infusi respectivè ad suos actus. Remotum aliud, quò quis potest facilius, quod si faciat, perveniet ad actum, vg. peccator non est proximè potens ad superandas graves tentationes, sed potest per gratiam orare, quod si faciat, fiet proximè potens ad vincendas tentationes, ut docet Trid: Sess: 6. cap: 11. His addi auxilium sufficiens collatum & oblatum; immediatum, & mediatum, ut auxilium collatum parentibus pro pueris, qui hujus capaces non sunt.



## ARTICULUS V.

*Unde repetenda sit efficacia gratiæ, & an sit per se efficax?*

**H**ic gratia efficax sumitur pro ea, quæ reipsa habet effectum, & cui non resistitur. Dari hoc sensû gratiam efficacem nullus negat. Sed difficultas est, unde hæc gratia habeat, quod sit efficax?



ficax? Non dico quomodo habeat vim qualitercunq; efficiendi, quod est esse efficacem in actu primo, hoc enim à Deo habere rursus nemo negat; sed est sermo unde habeat, quod certò & infallibiliter obtineat consensum nostrum, quod est esse efficacem in actu secundo, & eo modò intelligimus gratiam efficacem.

Puri Molinistæ efficaciam gratiæ repetunt ex eventu, nempe quod illam (sufficientem) suò consensu creatura reddit efficacem; Congruistæ ut supra dictum, paucis additis in idem coincidunt; Thomistæ ex intrinsecis, seu ex potentissima DEI voluntate deducunt.

*Dico:* Efficacia gratiæ repetenda non est ex eventu, nequè ex directione scientiæ mediæ, aut congruitate circumstantiarum, sed ex omnipotentissima DEI voluntate, atq; ejus supremo dominio in voluntates nostras, sicquè est per se infallibiliter efficax, non infallibilitate scientiæ tantum, sed & causalitatis.

Hanc conclusionem omnia probant, quæ traduntur in Tract: de Divina scientia contra scientiam mediam; & pro decretis per se efficacibus.

*Prob: imò ex Scrip: Apost: 1. Cor: 4. d. Quis te discernit? Quid habes, quod non*  
acce-

*accepisti? Si autem accepisti, quid gloriaris, quasi non acceperis?* Atqui si gratia non sit efficax, consensûs nostri causativa ex se, homo habet aliquid à se, quod non accepit, & in quo possit gloriarî, & discernere se ab alio, qui æquali gratiâ præventus non consentit, nempe per ipsum consensum gratiæ, quem (in hypothesi) non haberet à gratia, sed à se. Ergo. Resp: AA. vide apud Authores. 2dò. Juxta Scripturam DEUS facit, ut faciamus: *Faciam ut in præceptis meis ambuletis.* Ezech: 36. *Operatur in nobis velle & perficere pro bona voluntate.* Philip: 2. Facit de nolentibus volentes, auferendo duritiem & resistantiam voluntatis, & dando obedientiam & consensum, Ezech: 11. & 36. Atqui DEUS non dat nobis, ut velimus, & faciamus, non auferit cor lapideum, idest: resistens; non dat cor carneum, idest: cor docile & consentiens; non auferit duritiem & resistantiam cordis per gratiam versatilem, & permissam libero voluntatis arbitrio, expectantem ejus obedientiam vel resistantiam; ejus consensum vel repulsum, ut patet; sed per gratiam vi propria effectricem bonæ volitionis, & cordis docilis; obedientis, & consentientis, atquè victricem duritiei & resis-



sistentiæ voluntatis. Ergo. Hic adjice illud clarissimum testimonium Apost: Rom. 9. *Igitur non est volentis, nequè currentis, sed misereris Dei;* Atqui in sensu AA. est potius hominis volentis, (nempè determinantis concursum DEI indifferentem,) quàm DEI misereris. Vid: S. Aug: explanantem hunc textum in Enchyridio cap: 32.

*Prob: ex S. August: ex terminis, quibus S. D. exprimit gratiæ efficaciam, lib: 1. de pecc: meritis cap: 9. vocat gratiam efficacem: Spiritus S. occultissimam gratiam. Lib: de grat: Chr: cap: 24. Internam, occultam, mirabilem ac ineffabilem potestatem, quâ Deus operatur in cordibus hominum non solum veras revelationes, sed etiam bonas voluntates. Lib: 4. cont: Julian: c. 8. Omnipotentissimam voluntatem. Lib: 1. cont: 2. Epist: Pelagii cap: 20. Occultissimam & efficacissimam voluntatem ac potestatem, quæ convertit & transfert corda hominum ab indignatione ad lenitatem. Lib: de Correp: & grat: Inclinandorum cordium omnipotentissimam potestatem. De Prædes: SS. cap: 8. Gratia, quæ à nullo duro respuitur, quia ad tollendam cordis duritiem primitus datur; Atqui hæc solum competunt gratiæ per se ex natura sua efficaci; nullate-*

nus gratiæ subditæ libero arbitrio, aut quæ ex ejus consensu, & circumstantiis redditur efficax. *Nam 1mò:* hæc gratia Molinistarum & Congruistarum, non operatur occultis, miris, ineffabilibus modis; causa enim, cur operetur gratia, est in hoc systemate obvia & aperta, scilicet consensus humanæ voluntatis. *2dò.* Non est potentissima & efficacissima, siquidem nihil possit operari, si humana voluntas resistat. *3tiò.* Non efficit, ut homo sit volens & consentiens, cum è contra sit efficax, quia homo vult & consentit. *4tò.* deniquè non inclinatur quò, & quando Deo placet, sed in systemate opposito homo divinam potentiam flectit, quò & quando sibi placet.

De S. Thoma nullum est dubium. Videtur in cap: 3. ad Eph: Lect: 2. & 1. 2. q. 109. a. 1. Cont: gent: cap: 89. 1. 2. q. 10. a. 4. 1. p. q. 19. a. 8. q. 22. de verit: a. 8. 1. p. q. 23. a. 5. Ad Rom: 9. Lect: 3. *Unum addo:* Sententia opposita fundatur in scientia media; nostra sequitur ex decretis ex se efficacibus; atqui fatentibus AA. S. Thom: non agnoscit scientiam mediam, & docet decreta per se efficacia. E. Vid: plura de Prædest: & Scientia Dei.

*Prob: rationibus.* Sublata gratiâ per se efficaci, & posita gratiâ versatili voluntatis



tis creatæ consensum & determinationem exspectante, sequitur *1mò*: quod tollatur à DEO ratio primæ causæ, quia voluntas se determinat non determinata à DEO. *2dò*. Quod tollatur ab eo ratio causæ universalis, quia est aliquid, nempe consensus, & libera determinatio voluntatis, quod ejus causalitatem subterfugit. *3tò*. Quod diminuatur omnipotentia DEI, & supremum ejus dominium, quod habet supra nostras voluntates, quia non potest in quibuscunq; circumstantiis voluntates nostras inclinare in bonum. *4tò*. Quod tollatur præcipua ex parte necessitas orationis, nam in illa sententia non est necesse à DEO petere ut consentiamus gratiæ, cum id sit à nobis non à DEO. *5tò*. Quod non debeamus DEO gratias agere, pro eo quod est caput in negotio salutis, scilicet pro determinatione ad bonum, quæ est à nobis. *6tò*. Quod non in sola spe gratiæ inniti debeamus, sed præcipuè in nostra libertate, cum sit semper nobis liberum eam reddere efficacem; & indè quod non tam anxie timere debeamus alterius vitæ eventum, nec tanta sollicitudine saluti invigilare; atqui hæc omnia sunt absurda. Ergo.

*Obj*: Moveri efficacissimè ab alio, est cogi; sed implicat humanam voluntatem

tem cogi; Ergo non datur gratia efficax in sensu Thomistarum.

*R. D. Maj:* Moveri, ut inanime quoddam est cogi *C.* moveri & simul seipsum movere est cogi *N.* *Maj:* Voluntas humana non movetur à gratia divina ut inanime quoddam, ut docuit Lutherus, sed mota per gratiam se quoq; movet & accingit ad actionem, quocirca ejus libertas à gratia nullo modo læditur. Vid: *S. Th:* 1. p. q. 105. ad 1. & 2. 1. 2. q. III. a. 2. ad 2.

*Instab:* Gratia efficax necessitat; Ergo tollit rationem & voluntarii & meriti.

*Prob: Ant:* Illa producit infallibiliter consensum, non expectando voluntatis humanæ conatum, atqui producere consensum, independenter ab electione & deliberatione voluntatis humanæ, est illum necessari producere, & consequenter quodcunq; explodere meritum. Ergo.

*R. ad prob: D.* Gratia efficax &c. non expectando humanæ voluntatis in se relictæ conatum seu consensum, ut operetur *Conc:* humanæ voluntatis adjunctæ. *Subdis:* ut operetur actum primum seu primo-primum & incompletum. *Conc.* Actum deliberatum & perfectum *N.* Consideranda sunt hic, primo gratia, ejusq; primaria opera-



operatio, deindè consensus ipsi gratiæ; postea utriusq: simul agentis effectus vg. contritionis actus peccatorem convertentis. Primum est ipsius gratiæ concessio, & ejusdem subitanea impressio, quæ movet efficaciter peccatorem ad conterendum; & hic gratiæ motus est indeliberatus & primo-primus, seu in nobis sine nobis, ut loquitur S. Aug: Secundum est ipsi gratiæ moventi voluntatis obedientia, quæ dicitur consensus, adeòq; actus deliberatus, sed ille actus primariò procedit à gratia, deinde à voluntate mota & adjuta. Ex quo sequitur: consensum esse & à gratia & voluntate, sed primariò à gratia; ita ut à libero hominis arbitrio energiam ad operandum non accipiat; imò potius voluntas à gratia habeat, ut consentiat & velit bonum, quod ipsâ adjuvante id operatur, & hæc est tertia operatio, & actus perfectus vg. contritio producta & à gratia & voluntate humana.

*Urgebis:* Gratia per se efficax est gratia movens insuperabiliter, & indeclinabiliter: Ergo necessario absq; deliberatione.

*R. D.* Est movens insuperabiliter secundum quid, insuperabilitate orta tum à gratia, tum à voluntate humana mota & adjuta

adjuta C. absolutè N. Insuperabilitas absoluta est, quæ ex omni parte absoluta & physica nuncupatur, quæq; secundum Lutherum ortum habet à decreto ineluctabili & necessitante, ita ut voluntas sub dominio gratiæ merè passivè se habeat, ut inanime quoddam, hanc ut hæreticam excramur, nempe ab hæreticis excogitatam ad extinguendam libertatem voluntatis humanæ. Insuperabilitas *secundum quid* & ea hypothetica dicitur, quæ à voluntate ope gratiæ adjuta, & supposita liberi arbitrii tum deliberatione, tum electione procedit. Ergo duplicem habet causam, nempe gratiam faventer sanantem, roborantem, & moventem voluntatis vires ad bonum, quæ amorem boni ita favem producit, ut liberrimè se moveat voluntas ad bonum operandum; quo circa consensus effectivus boni & infallibilis habet pro causa 2da voluntatem adjutam. Sic ergo trahitur à Deo per gratiam, & videt bonum, illud etsi infallibiliter, tamen liberrimè & cum amore sequitur. Et verò quis hominum salutis bonum non amplectetur, quando cor habet dilatatum juxta illud Psal: 118. *Viam mandatorum tuorum cucurri, cum dilatasti cor meum.*

*Dices:* Eccl: 15. legitur; DEUM reliquit-  
se



se hominem in manu consilii sui: Ex quo sic: per gratiam per se efficacem homo applicatur & determinatur ad agendum; Ergò non est in manu consilii sui, ad hoc enim requireretur, quod seipsum applicaret independentè à quocunq;


*Resp:* S. Th: 1, p. q. 22, a. 2. ad 4. Dicendum in hoc, quod DEUS dicitur reliquisse hominem in manu consilii sui, non excluditur homo à Divina providentia, sed ostenditur, quod non præfigitur ei virtus operativa determinata ad unum, sicut in naturalibus. Ergo non sequitur, quod non sit in manu consilii sui, licet applicetur ad agendum, quia gratia applicat illum conformiter naturæ ipsius, idest, libere; nec DEUS aliter potest facere; scilicet, quod homo independentè ab illo se determinet; siquidem est de essentia creaturæ dependere à suo Creatore. Ex his.

Patet quid sit censendum de quinque modis, quibus gratia per se efficax à variis explicatur; *amò.* Quidam explicant per multitudinem auxiliorum, sed hi nodum non solvunt, sed quæstio manet, unde illud ex multis, cui voluntas consentit, sit efficax? An propria virtute, an voluntatis Consensû? Alterum dici non potest, quia aliàs auxilium non foret efficax; unde

dè ergo habet hanc virtutem? *2dò.* Alii efficaciam gratiæ efficacis per se reponunt in auxiliis moralibus infallibiliter moventibus. At auxilium morale solum objective movet alliciendo, svadendo &c. hinc voluntas, quia physicè non immutatur, semper manet in potentia, & indeterminata. *3tiò.* Quidam in motibus indeliberatis, pia scilicet affectione, quæ si sit fortior tentatione, vincet, & erit efficax. Verùm quamvis pia affectio indeliberata juvet, debet per ulteriorem gratiam seu motionem cooperantem determinari, alioquin cassa manebit, non solum ex fortiori tentatione, sed etiàm ex instabilitate voluntatis & aliis causis. *4tò.* Quidam defendunt delectationem indeliberatam necessitantem, sic Jansenius in tertia propositione damnata. Quidam delectationem indeliberatam non necessitantem defendunt, sic Theologi Augustiniani. *At 1mò:* delectatio est actus vitalis potentiæ, gratia autem non est talis actus. *2dò:* delectatio circa bonum supernaturale est actus bonus; Ergo est à gratia. *3tiò.* Gratia non semper in nobis operatur delectationem, neq; eâ solâ ad bonum inclinamur, sed variis aliis modis, ut timore DEI &c. *5tò.* Thomistæ communiter reponunt efficaciam



ciam gratiæ in præmotione seu præde-  
terminatione physica, quæ nihil aliud est,  
quàm applicatio activæ potentiæ ad actum  
secundum modum ejus, scilicet, ut agat  
liberè, si sit potentia libera; necessario, si sit  
necessaria. Supposito, quod datur talis  
præmotio, nemo negare potest, quin sit  
modus expeditissimus explicandi efficaci-  
am gratiæ; cum enim repugnet esse appli-  
cationem activam sine passiva, sequitur esse  
infallibilem connexionem inter gratiam  
applicantem voluntatem ad actum, & vo-  
luntatem agentem. Qui plura cupit de hac  
re, adeat Sylvium de motione primi Mo-  
toris, P. Antonium Massoulie Tom: 1. Dis-  
sert: 1. & 2. sed potissimum Goudin in Me-  
taph: Disp: 2. q. 3. qui hanc materiam de  
præmotione ad captum omnium tractavit.



DISSERTATIO VI.

*De causa gratiæ.*

## ARTICULUS I.

*Utrum solus Deus sit causa principalis efficiens gratiæ?*

**Q**Uæstio est de gratia habituali, &  
nonnisi indirectè de gratia actuali,  
N qua-

quatenus nempe est motus ad habitualement, ut ad formam & terminum. Porro causa finalis gratiæ proxima est salus æterna habentis illam; ulterior Christus; ultima DEUS juxta id 1. Cor: 3. *Omnia vestra sunt, vos autem Christi, Christus autem Dei.* Causa materialis est ipsa essentia animæ. Causa formalis nulla est, quia gratia est simpliciter forma. Causa instrumentalis est Humanitas Christi, & Sacramenta novæ legis, ut d. S. Thom: hic a. 1. ad 1. & 2. & 3. p. q. 62. a. 5. Causa ministerialis sunt Angeli & homines; Angeli subministrando illustrationes, quibus perveniatur ad gratiam; homines instruendo, orando, & Sacramenta ministrando. Causa meritoria principalis est Christus, ut d. S. Thom: infra q. 114. a. 6. & definit Trid: Sess: 6. cap: 7. Causa meritoria minus principalis esse potest homo justus, qui & sibi potest mereri de condigno gratiæ augmentum, & alteri de congruo primam gratiam.

*Dico:* Solus DEUS potest esse causa principalis efficiens gratiæ. Ita S. Th: hic q. 112. a. 1.

*Prob:* ex S. Scriptura: Job: 14. legitur: *Quis potest facere mundum de immundo conceptum semine? Nonne tu, qui solus es?*  
Psal:



*Pfal: 83. Gratiam & gloriam dabit Dominus; atqui DEO soli competit dare gloriam, ut nulli alteri competere possit. Ergo pariter. Suffragatur ratio Theologica: Illius solum est producere gratiam per modum causæ principalis, cujus est deificare, dare jus ad hæreditatem, & peccata dimittere; ille enim solus potest deificare, qui per seipsum DEUS est; ille solus potest dare jus ad hæreditatem, qui Dominus est hæreditatis; ille solus potest peccata dimittere, quem peccata offendunt; atqui hæc soli DEO competunt. Ergo.*

*Obj: Christus pluries in Scriptura commendatur, aut Author & Causa gratiæ. Sic Joan: 1. Gratia per JESUM Christum facta est. Item: de plenitudine ejus accepimus omnes, & alia multa. Ergo.*

*R. S. Thom: Christum ratione Divinitatis esse causam principalem gratiæ; ratione Humanitatis esse causam instrumentalem & meritoriam.*

*Inst: imò. S. Thom: in librum 4. distinctione 5. q. 2. a. 2. dicit: Agens principale baptizando est ipse Deus per auctoritatem, & Christus quæ homo. Ergo.*

*R. S. Thom: Non dixit, quod Christus ut homo sit agens principale per auctoritatem, sed per meritum, addit enim: cu-*

*ius meritum operatur in baptismo.*

*Instab: 2dò.* Christus ut homo est Caput aliorum hominum; atqui capitis est influere vitam in membra. Ergo per Auctoritatem &c.

*R. D. Min:* Influere ut causa principalis *N.* Ut instrumentum præcipuum animæ *C.* Sic autem Christus, quatenus homo, ut instrumentum conjunctum & præcipuum Divinitatis influit in nobis gratiam.

*Inst: 3tiò.* Gratia capitalis Christi, quæ influit in nobis gratiam, est nobilior nostrâ; atqui causa principalis est, quæ agit per formam nobiliorem effectû. Ergo.

*R. D. Min:* Si illa forma nobilior sit per se effectiva effectûs *C.* Si non sit sic effectiva, sed mota & elevata per virtutem superadditam *N.* Tunc enim ut instrumentum, agit, non ut causa principalis. Quod ergo gratia Christi cooperetur ad profundendam gratiam in nobis, non habet ex se, sed ex Divina virtute per eam ut instrumentum operante.

*Petes 2mò.* Quis est modus producendæ gratiæ?

*R.* Gratia non creatur, nec concreatur, sed educitur de potentia obedientiali animæ. Ita *S. Thom:* infra q. 113. a. 9. & q. 27. de Verit: a. 3. ad 9. Ratio primæ partis,



tis, quia creari est proprium rei subsistentis, qualis res non est gratia. Ratio 2dæ partis: quia actio productiva gratiæ non creat subjectum nempè animam, sed supponit creatam. Ergo. Hinc sequitur gratiam produci sivè educi de subjecto, à quo in esse dependet. Ergo etiam in fieri.

*Petes 2dò.* Utrum ad gratiam requiratur aliqua præparatio, seu dispositio ex parte hominis?

Quantum ad gratiam actualem certum est, quod nulla præparatio requiratur ex parte hominis, quasi præveniens divinum auxilium; sed potius quæcunq; præparatio in homine esse potest, est ex illo auxilio DEI moventis hominem ad bonum. Quæstio de dispositione ad gratiam habitualement; convenit inter Theologos; requiri dispositionem ex parte hominis; sed quidam volunt hanc dispositionem tantum esse moralem, & ex institutione divina, non physicam.

*R. imò.* Juxta communem Providentiæ cursum, requiritur ex parte hominis sui compotis, quædam dispositio ad gratiam, quæ dispositio est actus & motus liberi arbitrii in DEUM. Utraq; pars videtur de fide, decisa à Trid: Sess: can: 9. *Si quis dixerit sola fide impium justificari, ita,*  
*ut*

ut intelligat nihil aliud requiri, quod ad justificationis gratiam consequendam cooperetur, & nulla ex parte necesse esse eum suae voluntatis motu preparari, atq; disponi, anathema sit. Idem aperte innuit Scrip: 1. Reg: 7. *Præparate corda Vestra Domino.* Zach: 1. *Convertimini ad me, & ego convertar ad vos.*

R. 2dò. Actus liberi arbitrii moti à DEO disponunt ad gratiam non solum moraliter & ex institutione Divina, sed physice & ex natura sua, non tamen ad eam effectivè concurrunt, sed dispositivè.

Ratio 1mæ partis. Actus liberi arbitrii moti à DEO, est quædam inchoatio ordinis gratiæ; habet enim se ad gratiam ut motus ad terminum; Ergo est dispositio physica.

Ratio 2dæ partis, Ex Conc: Trid: Sess: 6. c. 7. *Hujus justificationis causæ sunt - - - efficiens misericors Deus - - - instrumentalis Sacramentum baptismi.* Agens autem cap: præc: nempe 6. de actu liberi arbitrii, eum refert ad causam dispositivam, quam distingvit ab efficiente. Hinc S. Thom: q. 28. de Verit: a. 8. ad 2. & ad 7. ait: *Motus liberi arbitrii non est causa efficiens infusionis gratiæ &c.*



## ARTICULUS II.

*Utrum aliquis possit esse certus se esse  
in gratia?*

CERTITUDO alia est simpliciter dicta, cui nullo modo potest subesse falsum, & excludit omnem formidinem de opposito; hac certitudine certa sunt à DEO revelata. Altera moralis, conjecturalis, quæ nititur momentis, signis, conjecturis gravibus quidem, at non sic firmis, quin possit etiam moraliter loquendo, eis subesse falsum. Et hæc major est vel minor, pro ratione momentorum, quibus nititur.

Lutherani & Calvinistæ tria circa materiam præsentem asserunt: *Primum*: certa & indubitata fide posse scire se esse in gratia. *Secundum*: unumquemq; id de se ipso teneri credere; alioquin nec justus est, nec fidelis. *Tertium*, hac sola fide homines justificari. Duo ultima anathemate confixit Trid: Sess: 6. can: 13. & 14. Primum etsi in Can: anathemate non damnet; attamen cap: 9. sat manifestè improbat.

*Dico*: Nemo, speciali revelatione seclusâ, potest esse certus, se esse in gratia certitudine

titudine absolutâ, cui non possit subesse falsum, aut saltem, quæ excludat omnem formidinem; sed solum certitudine morali, secundum quid tali, & conjecturali.

*Prob: ama pars ex S. Scrip: Eccl: 9. Sunt iusti atq: sapientes, & opera eorum in manu Dei; & tamen nescit homo, utrum amore an odio dignus sit. Nec dicas: impium scire posse se odio dignum. Hic ut patet, sermo non est de impiis, sed solis iustis & sapientibus. Eccl: 5. De propitiato peccato noli esse sine metu. Ad Philip: 2. Cum metu & tremore salutem vestram operamini. 1. Cor: 4. Sed neq; me ipsum iudico. Nihil enim mihi conscius sum; sed non in hoc justificatus sum.*

Ex PP. August: de perfectione iustorum cap: 15. ait: *Quantalibet iustitia sit præditus homo, cogitare debet, ne aliquid in illo, quod non videt, inveniatur esse culpandum.* Sic etiam alii. Innocentius III. cap: *Accepimus* 5. Decretalium titulo 54. iuramentum, quo Archiepiscopus Bisuntinus volebat se purgare à criminibus, de quibus accusabatur, tanquam dimissis per pœnitentiam, reprobatur ut indiscretum, temerarium & ineptum; cum Beatus Job: dicat: *etiamsi simplex fuero, hoc ipsum ignorat anima mea.* Hinc Concil: Trid: Sess:



6. cap: 9. *Sicut nemo pius de Dei misericordia, de Christi merito, de Sacramento-  
rum virtute & efficacia dubitare debet; sic  
quilibet, dum seipsum suamq; infirmitatem  
& indispositionem respicit, de sua gratia ti-  
mere & formidare potest, cum nullus sci-  
re valeat certitudine fidei, cui non potest  
subesse falsum, se gratiam esse consecutum.*  
Unde S. Greg: M. lib: 5. Mor: cap: 6. *San-  
cti viri, cum mala superant, sua etiam ge-  
sta bona formidant, ne cum bona agere ap-  
petunt, de actionis imagine fallantur, ne pe-  
stifera tabes putredinis, sub boni specie la-  
teat coloris.* Ergo.

*Secunda pars, Colligitur ex Scriptura,  
quæ hæc passim signa indicat. Tria hic  
refert S. Thomas. Primum delectatio in  
rebus divinis audiendis, legendis, meditan-  
dis, juxta id Joan: 8. Qui ex Deo est, ver-  
ba Dei audit. Secundum: contemptus re-  
rum mundanarum, nam diminutio cupi-  
ditatis est signum charitatis. Tertium:  
quod homo non sit sibi conscius peccati  
mortalis, sed paratus potius mori, quam  
DEUM offendere; Ad hæc promptam ha-  
bere voluntatem exequendi ea, quæ sunt  
placita DEO, & humilitatem servare: Hu-  
milibus enim Deus dat gratiam. Jacob: 4.*

*Obj: amò. Cont: 1. p. ex illo 1. Cor: 2.*

*Nos*

*Nos non spiritum hujus mundi accepimus, sed spiritum, qui ex Deo est, ut sciamus, quæ à Deo donata sunt nobis. 1. Joan: 4. In hoc cognovimus, quoniam in ipso manemus, & ipse in nobis; quoniam de spiritu suo dedit nobis. Ergo.*

*R. Expltc:* Hæc & similia indicant notitiam & certitudinem divinarum promissionum & donorum ex parte DEI Conc: ex parte nostra, quasi cognoscamus certò habere conditiones, quibus ea promissa mereamur. Nego: Dona ex parte DEI promittentis habent omnimodam certitudinem, est enim fidelis DEUS in verbis suis; At ex parte nostra, de iis non datur certitudo nisi conjecturalis, quia homo non potest omninò esse certus se habere conditiones requisitas, ut sit promissorum DEI particeps.

*Instab; 1mò. Rom: 8. Ipse Spiritus testimonium reddit spiritui nostro, quod simus filii Dei. Ergo.*

*R. Explt:* Et hoc testimonium infallibiliter (excepta revelatione) à nobis cognoscitur Nego conjecturaliter, & per signa. Conc.

*Instab; 2dò. In hoc cognoscent omnes, quod discipuli mei estis, si dilectionem habueritis ad invicem. Ergo.*

*R.*



R. Hæc hypotheticè sunt dicta de omnibus, non de singulis. Quia nobis in particulari non constat, nec est certum, quod diligamus proximum verâ charitate, & non cupidate aut humanô affectû. Certè hæc hypothesis à Christo directâ fuit ad omnes discipulos, nunquid omnes hanc dilectionem habuerunt? Judas unus fuit in Apostolico collegio, qui eam habere videbatur; *numquid hoc unguentum non potest venundari multis, & dari pauperibus?* Et reipsa non habuit, sed cupiditate ductus unguenti venditionem desiderabat, quia fur erat & loculos habebat.

*Instab: 3tiò. Joan: 14. In illo die cognoscetis quia ego sum in Patre, & vos in me, & ego in vobis. Ergo.*

R. Hæc ab Aug: & Cyrillo de die futuri sæculi, intelliguntur in quo viventes beata vitâ certissimè cognoscemus DEUM in nobis. Si verò verba referantur ad præsentem vitam, sensus est; quod Apostoli post resurrectionem Christi, & adventum Spiritûs S. perfectiùs cognituri erant per fidem Spiritum S. & Christum, eum nempe esse in Patre per unitatem ejusdem substantiæ; nos, naturam nostram in ipso, & ipsum in nobis, idest, in Ecclesia, tanquàm ejus caput. Ergo pro hæreti-

reticis nihil ex his colligi potest. Concedimus enim plurimos esse qui sunt in Christo, & Christus in eis; At hi certò dignosci non possunt; concedimus, inquam, sed insuper contendimus plures esse, in quibus, existimamus, Christum inhabitare, & seipsos existimant esse in Christo, à quo tamen longi sunt, & tales sunt cum Juda hæretici &c.

*Obj: 2dò.* Gratia est in anima; atqui homo cognoscit, quæ sunt in seipso: Unde 1. Cor: 2. Apost: d. *Quis hominum scit, quæ sunt hominis, nisi Spiritus hominis, qui in ipso est.* Ergo.


*R. D. Min:* Cognoscit omnia *Neg:* aliqua eaq; naturalia tantum *Conc:* Ex his.

*Collig.* Cum fides Divina aut scientia sit ex natura sua habitus certus, residens in intellectu, qui est potentia cognoscitiva & reflexiva supra seipsam; forma autem (fides, scientia) informans subjectum, tribuit illi suum effectum formalem; fides divina aut scientia informans intellectum, tribuit illi infallibilem certitudinem de suo objecto, & secundariò per reflexum actum certitudinem infallibilem de seipsa; quod dici non potest de voluntate; tum quia charitas non includit in ratione sua certitudinem, sicut fides aut scientia; tum  
 quia



quia voluntas secundum se non est potentia cognoscitiva & reflexiva. Hinc sequitur, quod cum spes semper sequatur fidem, nec destruaturs nisi per actum desperationis, & homo possit esse certus se nunquam in actum desperationis incidisse, possit etiam esse certus de sua spe. Nec ex his sequitur, quod semper debeamus esse anxii, dubii & perplexi, ac non possimus licite suscipere Sacramenta vivorum, quæ supponunt gratiam. Nam.

Ut tollatur dubitatio, anxietas, & perplexitas, & licite accedamus ad Sacramenta vivorum, sufficit, quod bonam & probabiliorem habeamus fiduciam nos esse in gratia, ex dolore de præteritis peccatis, ex firmo proposito cavendi futura, ex testimonio bonæ conscientiae, ex studio bonorum operum, aliisque signis.



## DISSERTATIO VII.

### *De justificatione peccatoris.*

**H**ic agemus de effectibus gratiæ, quorum præcipui duo sunt, justificatio impii & meritum iusti. De primo, hac in Dissert: de altero in seq; Justificatio

tio ex S. Th: hic q. 113. a. 3. dicitur à justitia. Passivè sumpta importat motum ad justitiam. Justitia autem, cùm de sui ratione importet quandam rectitudinem ordinis, dupliciter accipi potest. Uno modo secundùm quod importat ordinem rectum in ipso actu hominis respectivè ad alium, & hac ratione justitia est virtus particularis, de qua alibi. Alio modo dicitur justitia prout importat rectitudinem quandam in ipsa interiori dispositione hominis, prout mens subditur DEO, & inferiores vires menti sive rationi; & hæc justitia sit in homine (peccatore) secundùm rationem motûs, qui est de contrario in contrarium; & sic justificatio importat quandam transmutationem de statu injustitiæ ad statum justitiæ. Et hoc modo loquimur de justificatione impii, de qua tria præcipuè quæri possunt. Primum: an in justificatione impii peccatum propriè deleatur? Secundum: an sine gratiæ infusione possit remitti? Tertium qui actus ex parte peccatoris requirantur ad justificationem?



## ARTICULUS I.

*Utrum in justificatione impii peccata sic remittantur, ut verè deleantur & auferantur, & non solùm tegantur?*

**J**ustificare, est justum facere ea justitiâ, quæ mox est explicata: Potest dupliciter accipi: primo improprie pro eo, quod est declarare, pronuntiare, reputare aliquem justum, sive interim sit revera justus, sive non, usû nempè forensi, dum judex ex favore aut ignorantia declarat aliquem justum, etiamsi sit reus. Secundo modò sumitur proprie pro eo, quod est revera facere justum, rectum, sanctum, benè interius & exterius ordinatum erga DEUM, seipsum & proximum.

Hæretici nostri temporis sumunt justificationem sensû improprio, contenduntq; in justificatione peccatoris peccata non verè deleri, nec auferri sed ex integro remanere in homine, & ea tantum tegi, & non imputari; ita, ut justificatio ex parte DEI in eo tantum consistat, quod peccata non imputet, sed meritis & gratiâ Christi quasi contegat; ex parte autem hominis, ut firmissimè credat, peccata, quæ  
com-

commisit & committet, sibi propter Christi merita esse condonata, nec ullatenus ad pœnam damnationis esse imputanda. Contra quos.

*Dico:* In justificatione peccatoris non solum teguntur, seu non imputantur peccata, sed delentur verè, remittuntur & auferuntur.

*Prob: 1mò-* Ex S. Scriptura, quæ formalissimis terminis hac in re loquitur: Psal: 50. *Dele iniquitatem meam, & omnes iniquitates meas dele.* Isaïæ 34. *Ego sum ipse, qui deleo iniquitates tuas propter me.* Oseæ 14. *Omnem aufer iniquitatem.* Mich: 7. *Quis Deus similis tui, qui aufer iniquitatem?* Joan: 1. *Ecce Agnus Dei, ecce qui tollit peccata mundi.* Christus non semel in Evangelio dicit se remittere peccata, sic dixit paralytico, & mulieri peccatrici; nunquam dixit; quod tegat, aut non imputet peccata. Insuper non ideo peccatrici remissa narrantur peccata Luc: cap: 7. quia credidit sibi remissa, seu non imputata, ut dicunt hæretici; sed quia dilexit multum; en causam veram internæ renovationis, nempè gratiam. Similia habes Psal: 50. *Lavabis me &c.* Ezech: 36. 1. Joan: 1. 1, Cor; 6. in quibus dicitur homo à peccatis mundari, lavari, purgari &c. Si  
autem



autem peccata solum teguntur, hæc non verificantur. Quis enim dicet hominem sordibus inquinatum, esse mundum & ablutum, quia sordes pallio tegit? Ergo. *addo.* Ex S. Augustino. Conc: 2. in Psal: 31. exponens hæc: *Beati, quorum remissæ sunt iniquitates & quorum tecta sunt peccata,* quibus maxime confidunt hæretici, ait: *Nec intelligatis peccata cooperta esse, quasi ibi sint & vivant --- Deus ergo tegat vulnera, non tu: Nam si tu tegere volueris erubescens, medicus non curabit. Medicus tegat & curet, emplastro enim tegit; sub tegmine medici sanatur vulnus.* Sic igitur juxta S. Aug: DEUS tegit vulnera, ut tegendo sanet, sicut medicus, qui emplastro tegit vulnus, & sanat. Quod decretorium est contra hæreticos. Alios PP. vide apud Bellarminum lib: 2. de justific: c. 8. & alios. Hinc meritò hunc errorem proscriptit Conc: Trid: Sess: 5. can: 5. & Sess: 6. cap: 7.

*Insuper multa absurda devorare coguntur hæretici: Si in justificatione impii peccata remaneant, & solum tegantur, non verò deleantur, sequitur imò: quod homo erit simul justus & injustus; justus, quia justificatus, injustus, quia manet in peccato, quod est essentialiter injustitia. addo.*

O

sequi-

sequitur, quòd diligat DEUS peccatores, ut amicos suos, & in ordine ad beatitudinem contra illud Sap: 14. *Odio sunt Deo impius, & impietas ejus.* 3<sup>tiò</sup>: quòd Joan: 3. Christus falsum dixerit Apostolis: *Iam vos mundi estis.* Quomodo enim mundi, si peccatis inquinati. 4<sup>tò</sup>. Quod Christus non sit Agnus tollens peccata mundi &c.

*Objic: illud: Psal: 31. Beati, quorum tecta sunt peccata; beatus cui non imputavit peccatum.*

*R. Huic arg:* Jam responsum ex S. Aug: DEUM peccata tegere ea sanando, sicut medicus tegendo vulnus sanat; & quia illa sanat; non imputat. Insuper, cum omnia sint nuda & operta oculis DEI, nihil DEO tegitur, nisi quod non est.

*Dicunt.* Apost: justificationem explicat per hoc, quod induamus JESUM Christum Rom: 13. Similiter ad Galat: 5. ad Ephes: 4. atqui indumentum non tollit, sed tegit corporis deformitatem. Ergo Psalmista de tegumento externo seu non imputatione mera est intelligendus.

*R. Expl:* Quod induamus Christum, ejus merita exterius apprehendendo *N.* per mutationem & renovationem internam, à statu peccati, ad statum innocentiae deponendo veterem hominem, & omnem affectum



fectum peccati & inchoando vitam novam & immaculatam, ut legimus locis cit: Rom: 13. & ad Ephes: 4. *Conc.*

*Reponunt.* Sanctificatio importat interiorum hominis renovationem & cordis puritatem; atqui sanctificatio à justificatione distinguitur, quæ plus non importat, quàm meram non imputationem peccati, ut patet in exemplo judicis forensis supra allato. Ergo Apostolus intelligendus non est de interiori hominis mutatione.

*R. 1mò.* Fictitiam esse distinctionem inter justificationem & sanctificationem, nam usû Scripturæ non separatur justitia à sanctitate, & justificari est sanctificari juxta illud 1. Cor: 6. *Abluti estis, sanctificati estis, justificati estis.* Ubi nota: *justificati estis*, ultimò ponitur; si ergò sanctificatio renovat hominem interius, homo justificatus interius nullo scelere in corde inquinatus erit, sed ablutus. Ephes: 4. *Induimini novum hominem, qui secundum Deum creatus est* NB. *in justitia & sanctitate.* 2dò. Falsum est aliud, quod dicunt, justitiam solum importare non imputationem peccati, cum juxta Scripturam ille solum justus est, qui in rectitudine cordis (cum qua non stat peccatum) facit, quod justum est: *Filioli,*

1. Joan: 3. *nemo vos seducat, qui facit justitiam, justus est, 3tiò.* Veritati ac æquitati divinæ valdè est injuriosum, quod DEUS ad instar judicis forensis pronuntiet & æstimet justum, nisi qui revera justus est.

*Instant:* Juxta Scripturam nemo est sine peccato; Ergo si ad justificationem requiratur destructio peccati, nemo justificatur.

*R. D. Ant:* Nemo est sine peccato veniali. *Trans:* Sine mortali N. Et hoc sufficit ad justificationem.

*Quæ opponunt hæretici de fide justificante, solventur infra.*

## ARTICULUS II.

*Utrum ad remissionem peccati, quæ est justificatio impii, requiratur gratiæ infusio?*

**R**ES est nobis cum Lutheranis & Calvinistis, qui non agnoscunt veram & propriam remissionem peccatorum in justificatione peccatoris, ut dictum art: præc: consequenter dicunt non haberi eam per formam intrinsecè sanctificantem & justificantem, sed vel per justitiam, quâ DEUS justus est, vel per justitiam Christi extrinsecè imputatam. Contr: quos

*Dico:*



*Dico: Remissio peccatorum, quæ est in justificatione peccatoris, non fit per imputationem extrinsecam justitiæ, quâ DEUS justus, est, aut justitiæ Christi, sed per veram intrinsecam justitiam, seu gratiæ habitualis infusionem. Est de fide definita à Trid: Sess: 6. can: 10. & 11. Si quis dixerit, homines justificari vel sola imputatione justitiæ Christi, vel sola peccatorum remissione, exclusa gratiâ & charitate, quæ in cordibus eorum per Spiritum S. diffunditur; atquæ illis inhæreat; aut etiam gratiam, quâ justificamur, esse tantum favorem Dei, anathema sit. Hic est Canon: 11. Et cap: 7. Unica formalis causa (justificationis impii) est justitia Dei, non quâ ipse justus est, sed quâ nos justos facit, quâ videlicet ab eo donati renovamur spiritû mentis nostræ, & non solum reputamur, sed verè justî nominamur, & sumus justitiam in nobis recipientes.*

*Prob: ex Scrip: Amò. Ex locis art: præc: laudatis, quibus peccator dicitur, lavari, purgari, renovari, sanctificari, nemo autem potest esse lotus, &c. nisi per aliquod internum, quò denominatur & sit talis. 2dò. Eadem Scriptura dicit nos habere in nobis gratiam, charitatem & justitiam, quâ justî sumus. Joan: 1. De plenitudine ejus*

*ejus omnes nos accepimus, & gratiam pro gratia. Rom: 1. Per quem accepimus gratiam. Non plenitudinem nobis imputatam accepimus, sed de plenitudine gratiam. Nequè dicit Paulus: Ejus accepimus gratiam, quasi nobis imputatam, sed per quem, ut denotaret causam efficientem & meritoriam. Rom: 5. ad Ephes: 4. 3<sup>ti</sup>o Apost: comparat justitiam & obedientiam Christi, cum peccato & inobedientia Adæ; atqui peccatum Adæ realiter & intrinsecè contrahimus, & non solum per imputationem extrinsecam; Ergo justitia, quæ illi opponitur, & per quam expellitur est nobis intrinseca, & non solum extrinsecè imputata. Insuper: Christus reddidit nobis, quod in Adam perdidimus; sed in Adam perdidimus justitiam intrinsecam, & quam in posteros transfudisset, si in bono perseverâisset. Ergo Hinc S. August: lib: de Spir: & lit: cap: 9. in hæc verba Apostoli: *Justitia Dei manifestata est, ait: Non dicit Apostolus justitia hominis, sed justitia Dei, non quâ Deus justus est, sed quâ induit hominem, cum justificat impium. Ergo.**

*Obj: Quosdam textum Scripturæ, ut Rom: 5. Per unius obeditionem justi constituentur multi. Iterum: per unius justitiam in omnes homines in justificationem. 1. Cor: 1.*

Chri-



Christus dicitur: factus iustitia & sanctificatio nostra. Ergo.

R. Hæc & similia intelligenda esse in sensu causali, non formali, quatenus Christus est causa efficiens & meritoria justificationis nostræ; quò sensu ibidem dicitur. *Sapientia nostra*: Joan: *Resurrectio & vita*; Deut: 3. *Vita hominum & longitudo dierum*. Textus ex 1. Cor: 1. manifestè Adversariis contrarius est: Nam eodem modo ibi dicitur Christus iustitia, ac sanctificatio nostra; atqui sanctificatio juxta ipsos fit per internam renovationem hominis, non per solam imputationem sanctitatis Christi nobis factam; Ergo & justificatio.

*Instab*: Apostolus 1. Cor: 10. reprehendit eos, qui propriam virtutem volunt statuere: *Ignorantes*, inquit, *iustitiam Dei*, & suam volentes statuere, *iustitia Dei non sunt subjecti*. Ergo.

R. cum S. Aug; lib: de grat: Et lib: arb: cap: 12. Apostolum reprehendere Judæos, & Phariseos, qui præsumebant se posse viribus naturæ legem implere, & sic justificari absq: gratia Dei.

*Urgent*: Juxta Scripturam: nemo est justus coram Deo. Psal: 114. *Non justificabitur in conspectu tuo omnis vivens*. Job:

9. *Non justificabitur homo compositus Deo.* Hæc autem essent falsa, si homo haberet justitiam intrinsecam. Ergo.

R. Sensum esse, vel quod nemo sit ita justus, ut non inveniatur in aliquibus levibus deliquisse; vel quod nullus sit justus coram Deo ex seipso & propria virtute, sed ex DEI munere; Vel, quod hominis justitia comparata ad justitiam DEI sit, quasi non esset, ob infinitam distantiam & inæqualitatem. Unde Job: 25. *Eccè luna etià non splendet, & stellæ non sunt mundæ in conspectu ejus, quantò magis homo putredo & filius hominis vermis.*

Dicunt: Justam dicitur, quod adæquatur regulæ seu legi; atqui in nobis talis justitia non est, cum in multis saltem levibus peccemus. Ergo.

R. D. Min. Non est in nobis talis justitia, quæ actu adæquatur legi. Conc: ex qua secundum se non fit nota sequi adæquatio. N. Quod ergo actû non adæquetur non est ratione sui, sed ratione viæ, in qua est, in statu imperfecto defectû luminis gloriæ, & visionis beatificæ; ex quo non sequitur, quod non sit justitia, sed tantum, quod non sit perfecta justitia.



## ARTICULUS III.

*De actibus ad justificationem peccatoris  
adulti requisitis.*

**P**ECCATORES adultos propriis actibus ad justificationem debere disponi probat hic S. Thom: art: 3. & nos supra d. Qui autem sint illi actus hic inquirimus cum eodem S. D. Concil: Trid: Sess: 6. cap: 6. sex assignat, scilicet actum fidei, timoris, spei, dilectionis DEI, pœnitentiæ seu contritionis, tandem propositum suscipiendi Sacramenta instituta ad remissionem peccatorum, inchoandi novam vitam, & mandata DEI servandi, quod propositum includitur sæpè in contritione præsertim vehementi. De his hic.

§ IMUS.

*Quæ fides requiratur ad justificationem?*

**L**UTHERANI & CALVINISTÆ distinguunt triplicem fidem: *Primam* vocant historicam, (dixissent, dogmaticam;) quâ credunt omnia, quæ in sacris Literis continentur. Nos eam dicimus Catholicam, cum hoc addito, quod multa credamus, quæ in Verbo DEI tradito comprehenduntur. *Secundam*. Vocant fidem miraculorum,

lorum, per quam fiunt, aut impetrantur miracula. quâ scilicet credimus nihil esse, quod à D<sup>eo</sup> fieri non possit. *Tertiam* vocant fidem promissorum, quâ credimus DEUM promississe remissionem peccatorum. Hanc tertiam dividunt in generalem, & particularem; generalem vocant quâ credunt in communi omnibus credentibus promississe remissionem peccatorum & Salutem; specialem dicunt, quâ unusquisque credit seu certò confidit peccata sibi esse remissa propter merita Christi. Hanc enim malè confundunt cum fiducia, quæ ad spem & voluntatem pertinet, non ad intellectum; est enim fiducia ex S Th: spes roborata. Hanc ergò fidem seu fiduciam particularem requiri ad justificationem, & eam solam justificare contendunt. Quamvis quidam, ut pestilentissimi erroris, qui omnibus flagitiis aperit viam, invidiam declinent, requirunt delectionem, contritionem, opera bona, non ut conducentia ad justificationem, sed ut signa & proprietates fidei, sive fiduciæ justificantis. Quæritur ergo, quæ fides requiratur ad justificationem? An sola fides sufficit in sequenti § examinabimus.

*Suppono*, Ut certum & ab omnibus admissum, aliquem motum fidei requiri in adultis ad justificationem, nam *sine fide est*



*impossibile placere Deo. Hæb: 10. Trid: Sess: 6. cit: Quia requiritur in adulto justificando motus animi se convertentis ad DEUM, quia accedentem ad Deum oportet credere. Hebr: 11. sed quæ illa fides sit?*

*Dico: Fides requisita ad justificationem non est fiducia, quâ credimus seu confidimus peccata esse nobis propter Christum remissa; sed quâ credimus omnes veritates nobis à DEO revelatas, propter ejus Authoritatem & veracitatem. Ita definit Conc: Trid: Sess: 1. can: 12. Si quis dixerit fidem justificantem, nihil esse aliud, quàm fiduciam divinæ misericordiæ peccata remittentis propter Christum; vel eam fiduciam solam esse; anathema sit.*

*Prob: 1. mō. Ex S. Scripturæ apertissimis testimoniis: Marci ult: Prædicate Evangelium omni creaturæ, qui crediderit (Evangelio & veritatibus in eo contentis) qui crediderit (non qui solam fiduciam habuerit) Salvus erit. Rom: 10. Hoc est verbum, quod prædicamus, quia si confitearis in ore tuo Dominum JESUM, & credideris in corde tuo, quod Deus suscitavit illum, salvus eris. Ergo Christus etiã & ejus resurrectio, non sola misericordia DEI peccata remittentis sunt objectum fidei salvantis. Hebr: 10. in finē cū dixisset Apost:*

post: *Iustus ex fide vivit*; statim initio cap: seq; explicans, quæ sit illa, ait: *Est autem fides sperandarum substantia rerum, argumentum non apparentium*; Hæc autem definitio nullo modo competere potest fiducia, quâ credimus peccata nobis esse remissa, sed solum illi fidei, de quâ ibidem: *Sine fide impossibile est placere Deo; credere enim oportet accedentem ad Deum, quia est, & inquirentibus se remunerator est*. E. fides sine qua &c. non est fiducia remissionis peccatorum, sed quâ credimus Deum existeret; & esse remuneratorem inquirentium illum. Vid: Joan: 11. Joan: ult: 2dò. Ex Traditione: Ecclesia, ut ab initio, ita nunc, cum fidem requirit à baptisandis, non aliam requirit, quàm illam, quâ credimus fidei articulos in symbolis contentos; non verò, quâ credimus peccata nobis dimissa. Quis enim unquam Apostolorum, Episcoporum, aut Ministrorum accedentem ad se in causa justificationis docuit: Crede peccata tibi dimitti & statim dimittentur? Legantur Catecheses Cyrilli &c. Sermones Cypriani, Augustini, Chrysostomi & aliorum ad Catechumenos; Ritualia antiquissima baptizandorum adulterum, reconciliandorum. Sanè hanc doctrinam absurdam, & piarum



rum aurium offensivam explodunt. Legant Acatbolici priorum sæculorum canones pænitentiales; hi ostendunt clarè, quam arduum sit opus justificationis, nec in sola fiducia, quæ in hæreticorum sensu potius præsumptio dicenda, & peccatum in Spiritum S. quàm causa justificationis. Vide PP. apud Bellarm: lib: 1. de justif: cap: 9. Plura vid: apud Auth:

*Objiciunt.* Illud Pauli Act: 15. *Notum igitur sit vobis Viri Fratres, quia per hunc Christum remissio peccatorum vobis annuntiatur - - - in hoc omnis, qui credit, justificatur;* id est, qui credit remissioni peccatorum sibi annuntiatae, hoc ipso justificatur.

*R. Falsam esse glossam.* Hæc enim verba: *in hoc omnis, qui credit, justificatur,* non referuntur ad remissionem peccatorum tanquàm ad objectum, sed ad Christum & ejus resurrectionem, quam ibi prædicabat Apostolus; ita, ut sensus sit; per Christum annuntiatur vobis remissio peccatorum; & omnis, qui credit in illum, justificabatur; Unde justificatio est effectus hujus fidei, non objectum. Hoc eodem sensu d. Apos: ad Rom: 10. *Si credideris, quod suscitavit Deus Christum à mortuis, salvus eris.*

*Instant:*

*Instant:* Math: 9. Videns JESUS fidem illorum dixit Paralytico: *Confide fili, remittuntur tibi peccata.* Ibid: *Confide filia fides tua te salvam fecit.* Quorum verborum sensus esse videtur: *Confide peccata tibi remitti & remittentur.*

*R.* Utrumq; locum magis nocere, quàm prodesse hæreticis. Etenim antequam obtinerent peccatorum remissionem, jam habebant fidem; & tamen nondum credebant peccata sibi esse dimissa. Ergo remissio peccatorum in uno particulari non est objectum fidei. Insuper fiducia hic non exigitur tanquàm ratio, vel conditio remissionis peccati; non enim dixit *confide & remittentur*; nec conditionaliter, si confidas remittentur; sed absolutè, *confide, remittuntur*; ita ut remissio sit causa fiduciæ, non fiducia causa remissionis; quasi diceret, esto bono animò, quia remissa sunt tibi peccata tua: Et mulieri: *confide seu noli timere, quod tetigeris vestem meam, quia fides tua, quâ credis in me, te salvam fecit*; quò eodem sensu dixit Apostolis trepidantibus: *nolite timere, ego sum.*

*Dicit.* Calvinus super cap: 3. Epist: ad Galat: *In symbolo habetur, credo sanctam Ecclesiam, quod non est aliud, quàm credo*  
do



*do, nullum esse amplius peccatum, nullam mortem in Ecclesia.*

R. Credimus Ecclesiam esse sanctam, quia habet Sponsum sanctum, dogmata sancta, leges sanctas, multos filios sanctos, & extra illam nullum esse sanctum, nisi præsumptuosè talem, qui gravibus inquinatus vitiis, sua fiducia putat se esse sanctum; hoc credimus, sed scimus, simulquè credimus; Ecclesiam esse aream, in qua paleæ cum tritico; esse agrum, in quo triticum & zizania; esse rete, in quo sunt boni & mali pisces; tandem esse domum, in qua vasa aurea & lutea, aliud in honorem, aliud in contumeliam. Vid: Melchior Canus de locis Theol:

*Reponit Melanhton in Apol: Confess: Augustanæ: Non est omissa remissio peccatorum in symbolo fidei; atquè illa non est, quam fides justificans propriè intuetur.*

R. Sensus hujus articuli: *Credo remissionem peccatorum*, non est, ut fingunt hæretici: credo peccata mihi esse remissa. Nam hujus articuli fidem Ecclesia exigit à Catechumenis, & tamen non credit eis peccata esse dimissa, sed tantum dimittenda per baptismum. Sensus ergo Catholicus hujus articuli est: *Credo esse in Ecclesia potestatem remittendi peccata*  
*per*

*per baptismum, & alia Sacramenta ritè suscepta.* Unde Symbolum Nicæno - Constantinop: hunc articulum sic exprimit. *Confiteor unum baptisma in remissionem peccatorum.* Ex his.

*Collig:* Fidem veram (non fiduciam AA.) quâ credimus ea, quæ à Deo revelata sunt, esse initium justificationis, non causam, ut mox dicetur. Igitur.

§ 2dus.

*Utrum sola fides sufficiat ad justificationem?*

**S**ic olim dogmatizarunt Simon Magus quod S. Jren: lib: 1. cap. 20. & postea Eunomius apud S. Aug: lib: de hæres: hæresi 54. & lib: de fide & operibus cap: 14. ex malè intellectis Pauli Ap: verbis ad quem errorem refellendum, ut notant prædicti PP. Petrus, Joannes, Jacobus, & Judas, suas scripserunt Epistolas. Hunc errorem in cinere sepultum, suscitaverunt Lutherus & Calvinus, cum hoc tamen discrimine: quod illi veteres fidem, quam d. sufficere ad salutem, intelligerent eam fidem, quâ credimus omnes articulos fidei; moderni autem intelligunt fidem illam specialem, quâ unusquisq; credit, aut confidit peccata sibi esse remissa. Contra utrosq;

*Dico:*



*Dico: Nequè illa fides specialis recentium hæreticorum, quæ vana est, & nulla; neque fides vera & Christiana sola sufficit ad justificationem. Ita definitum in Conc: Trid: Sess: 6. can: 9. & Can: 19. Prob: Ex Apostolis, qui ut notavimus studio scripserunt contra hunc errorem. S. Jacob: cap: 2. Quid proderit Fratres, si fidem quis dicat se habere, opera autem non habeat? Nunquid poterit fides salvare eum? - - Fides, si non habet opera, mortua est in semetipsa - - Videtis quoniam ex operibus justificatur homo, non ex fide tantum - - fides sine operibus mortua est. S. Judas hortatur fideles, ut fidei superædificent bona opera, ad vitam æternam consequendam. Idem facit S. Petrus 2. Epist: c. 1. Idem præstat Joan: Epist: 1. c. 3. Qui facit justitiam justus est; Ergò ad justificationem non sufficit credere, sed oportet facere. Sed.*

Has Epistolas more suo AA. non habent pro Canonicis; veniamus ad S. Paulum, cui malè confidunt Novatores, & videamus, quid hac in re sentiat: 1. Cor: 3. Si, inquit, habuero omnem fidem; ita ut montes transferam, charitatem autem non habuero, nihil sum. Galat: 5. In Christo JESU nequè circumcisio aliquid valet, neq;

P

præpu-

*præputium, sed fides, quæ per charitatem operatur.* Rom: 2. *Non Auditores legis justificati sunt apud Deum, sed factores legis justificabuntur.* Tandem Christus in Evang: commendat bona opera, ut necessaria ad justificationem & ad salutem. Math: 5. & 7. & 19. respondet juveni: *Si vis ad vitam ingredi, serva mandata.* Demum cap: 28. Non solum monet Apostolos, ut fidem prædicent, & baptisent, sed etiam vult, ut doceant *servare omnia, quæ ipse mandavit.* Id etiam evincitur iis omnibus locis, quibus Christus annuntiat, non solum ut Redemptor, sed & Legislator. Math: 5. 6. 7. &c. Statuens præmia legum observatoribus. Math: 19. Luc: 10. Apoc: 3. decernens pænas eorum transgressoribus, Math: 5. 7. 25. & alibi.

*Objiciunt hæretici.* Ex Apost: qui, juxta illos totus est, ut asserat ad justificationem sufficere fidem sine operibus, ut Rom: 3. *Arbitramur hominem justificari per fidem sine operibus legis.* Ibid: 4. ad Galat: 2. Philip: 5.

*R. imò.* Apostolum solum excludere opera, quæ vel ante fidem, vel post habitam fidem, sed sinè fidei gratia fiunt, idest opera, quæ ex solis viribus naturæ & liberi arbitrii procedunt, qualia erant quædam honesta justitiæ naturalis opera



apud Gentes, & opera Judæorum, qui carnaliter legem Moyſis ſervabant; unde pluries exprimit *opera legis*, non verò excludit opera fidem conſequentia, & ex gratia fidei facta. Unde S. Aug: lib: de grat: & lib: arb: c. 7. *Homines, inquit, non intelligentes, quod ait ipſe Apoſt: Paulus: arbitramur hominem juſtificari per fidem ſine operibus legis: putaverunt eum dicere ſufficere homini fidem, etiamſi malè vivat, & bona opera non habeat. Quod abſit, ut ſentiret vas electionis.*

R. 2dò. Non favet etiam ex alio cap: Novatoribus Apoſtolus: Nam ubiquè intelligit fidem Chriſtianam & Catholicam, non verò fidem ridiculam ſeu fiduciam Novatorum.

*Instant:* Abraham de quo Rom: 4. & Galatæ ad Galat: 2. jam operabantur ex fide, tempore, quo loquitur Apoſt: tamen excludit eorum opera: Ergo.

R. *Data Maj: D. Min:* Excludit eorum opera, quæ fiebant ex gratia fidei N. Quæ facta fuerant ante fidem, vel quæ poſt fidem habitam non fiebant ex gratia C. Nihil obſtat enim, quod qui habet fidem, aliquando non operetur ex fide, ut dùm facit aliquod morale bonum ſine relatione ad DEUM.

*Reponunt; Apost: Rom: 4. d. Ei, qui operatur, merces non imputatur secundum gratiam, sed secundum debitum: Ei verò qui non operatur, credenti autem in eum, qui justificat, reputatur fides ad justitiam secundum propositum gratiæ Dei; sicut David dicit: beatitudinem hominis, cui Deus accepto fert justitiam sine operibus. Ergo ut sit gratuita justificatio, nulla in ea habenda est ratio operum, sive ante, sive post fidem factorum; alioquin justificatio redderetur ex debito.*

*R. N, Conseq; Sensus enim verborum Apost: hic est: Ei, qui operatur &c. id est, si opera nostra sine fidei gratia, & ex solis viribus naturalibus facta, qualia faciunt Ethnici, obtinerent justificationem, non esset gratuita, sed merces debita talibus operibus, nam omni operanti ex propriis, debetur merces. Ei verò, qui non operatur &c. id est illius, qui justificatur non ex operibus; propriis secundum naturæ vires, sed ex fide in Christum, justificatio est gratuita; tum quia ipsa fides, est gratia, tum quia fides ex se non meretur tantum donum, licet ad illud disponat.*

*Urgent: Apostolus excludit merita, ut ne quis gloriatur; sed si homo per fidei opera justificetur, posset de illis gloriari. Ergo.*

*R.*



*R. Imò.* Inde sequi, quod neq; per fidem posset justificari, quia etiã de actu fidei posset gloriari. *Unde R. 2dò, D. Min:* gloriari in DEO C. in seipso N. Ipsa enim fides est gratuitum donum DEI, consequenter & opera ex illa promanantia; Apostolus autem permittit gloriationem in DEO: *Qui gloriatur, in Domino gloriatur.*

*Dicunt:* Præfatis Scripturæ testimoniis pro probatione citatis, damnari eos, qui olim docebant fidem mortuam & bonis operibus vacuam sufficere ad salutem; at non eos, qui id quidem soli fidei, sed fidei vivæ, activæ & bonis operibus stipatæ, tribuunt, quæ fidem concomitantur, velut ejus signa & proprietates & fructus.

*R.* Hæc Novatores dicunt ad emolliendum immanem horrorem hujus erroris, quæ tam manifestè pugnant cum principiis eorum; Nam illi docent *Amò:* hominem, dum per fidem justificatur, non verè fieri justum, sed reputari tantum; nec ulla ejus opera bona, sed omnia esse peccata mortalia, etsi ei non imputentur propter Christum; quâ fronte ergo, dicunt non solam fidem, sed fidem solam junctis tamen operibus bonis justificare, cum secundum illos nulla sint bona opera. *2dò docent:* hominem semel justificatum per fidem, nullò flagitiò à justitia excidere

posse. Ita Calvin: lib: 3. Instit: cap: 2. §. 11. & Lutherus in Serm: super hæc verba: *Sic Deus dilexit &c.*, excipiens solum incredulitatem. Sicq; semel justificatus per fidem, quamvis sit fur homicida, adulter, &c. remanet justus. Ergo fides justificat sine operibus bonis, imò cum malis & pessimis, quod est antiqua hæresis damnata in scriptura. *Plura alia obijciunt hæretici* tum ex S. Scriptura tum ex SS. PP. quæ soluta habes apud Be-larminum lib: 1. de justifi: à cap: 20. ad 25. Interim accipe generales solutiones. *Prima est:* justificatio fidei tribuitur tanquàm ejus initio & radici, non tamen excludendo alia opera ad eam disponentia. Ita Trid: Sess: 6. cap: 8. *Secunda:* intelligenda est fides viva, quæ per charitatem operatur, ut loquitur Apost: ad Gal: 5. *Tertia:* per fidem aliquando intelliguntur ea, quæ in Evangelica doctrina continentur, faciendo ea, quæ secundum hanc doctrinam sunt facienda. *Quarta:* quando excluduntur opera, intelligenda sunt opera ante fidem, vel sine fidei gratia facta; vel opera legis Mosaicæ. Sed maximè præ oculis habendum, nos nomine fidei hic non intelligere fidem sive fiduciam Novatorum, hæc enim non datur, sed fides



dem Catholicam, quâ assensum præbemus veritatibus à DEO revelatis.

§ 3<sup>tius</sup>.

*De aliis actibus ad justificationem adulti requisitis.*

*Potes 1<sup>mò</sup>. Quinam sunt illi actus?*

*R. ut sup: d. Ex Trid: præter fidem, quinque alios actus requiri ex parte peccatoris adulti ad sui justificationem, nempe: æctum timoris, spei, dilectionis DEI, contritionis, & propositum suscipiendi Sacramentum, & servandi mandata divina.*

*Potes 2<sup>dò</sup>. Quomodo hi actus deducuntur?*

*R. Hoc modo. Fides illustrans mentem peccatoris exhibet ei hinc divinam justitiam pænas præparantem ipsi, illinc divinam misericordiam veniam offerentem; unde ex primo exurgit in ejus voluntate timor divinæ justitiæ; ex secundo, deinde, spes & fiducia veniæ obtinendæ. Spem sequitur inchoata dilectio DEI, ut totius justitiæ fontis; ex hoc enim, quod DEUS misericors peccatori pænam timenti offert veniam, non solum spes excitatur, sed etiam divinæ bonitatis amor saltem inchoatus. Ex fide, timore, spe & dilectione inchoata saltem, oritur peccati detestatio;*

tio; quia hoc ipso, quod peccator novit paratas esse peccatis suis pœnas, & ex eo quod DEUM ea sibi condonare paratum diligere incipiat, movetur odiô in peccatum, ut sibi nocivum, & divinæ bonitatis offensivum, Hoc autem odium seu detestatio, contritio dicitur, perfecta quidem, si peccatum displiceat principaliter ut offensivum DEI; imperfecta verò, si principaliter displiceat, ut nocivum peccatori. Hæc autem contritio habet necessariò ad junctum propositum inchoandi novam vitam, & servandi divina mandata; non enim est in aliquo sincerus dolor de peccatis, nisi velit deinceps illa vitare.

*Petes 3tio.* Utrum necesse sit, ut isti actus requisiti ad justificationem sint formales; an sufficiat, quod sint virtuales & impliciti, contenti in aliquo eminentiori?

*R.* Actus fidei & dilectionis necessariò debent esse formales, quia neq; in intellectu, nec in voluntate dantur præstantiores, in quibus isti virtualiter contineri possunt. Quantum ad actum spei, quando proceditur in conversione paulatim de imperfecto ad perfectum, requiritur, ut sit formalis; sed si subito homo moveatur à DEO de peccato ad justitiam, ex sola consideratione DEI & peccati, ut DEO injuriosum,



sum, non attendendo ut sibi malum, videtur quod sufficiat spes virtualis contenta in actu charitatis. Actus pœnitentiæ seu contritionis ordinariè debet esse formalis; exigat enim recta ratio, ut qui læsit jus alterius, de hac injustitia & injuria doleat; dolor autem de peccato, ut est læsivum juris divini, propriè pertinet ad pœnitentiam, non ad charitatem, quæ habet solum odisse peccatum ut oppositum divinæ bonitati. Per accidens tamen, si homo ignorans invincibiliter se esse in peccato, aut de peccatis nihil cogitans eliceret actum perfectæ charitatis, justificaretur sine actu formalis pœnitentiæ, sed cùm virtuali contenta in actu charitatis. Propositum quandoq; includitur in actu pœnitentiæ, ut si peccator ferventissimos actus charitatis & doloris eliceret, non attendendo ad propositum, justificaretur.


*Petes 4to.* Utrum justificatio impii fiat in instanti?

*R.* Si justificatio impii sumitur pro infusione & remissione peccatorum fit in instanti. Si autem justificatio sumatur & pro infusione gratiæ & pro dispositionibus, quibus peccatur, licet possit fieri in instanti, ut contingit in Paulo, ordinariè tamen fit successivè.

*Petes*

*Petes 5tò. Utrum justificatio sit maximum opus Dei?*

*R.* Si justificatio spectetur ex parte modi agendi, creatio est majus opus quam justificatio; quia præstantissimus operandi modus est facere ex nihilo. Ex parte rei productæ est majus creatione; non tamen glorificatione; quia bonum cretionis est bonum naturæ; justificationis est bonum æternum in spe; bonum autem ad quod terminatur glorificatio, est bonum æternum in re. Si justificatio attendatur juxta proportionem illius, qui glorificatur, est majus opus glorificatione, quia donum gratiæ, plus excedit impii dignitatem utpotè pænâ digni, quàm donum gloriæ dignitatem justi, qui erat dignus gloriâ.



## DISSERTATIO VIII.

### *De Merito justi.*

Alter Divinæ gratiæ effectus est meritum justi; cùm enim operari sequatur ad esse, ex hoc, quod gratia hominem justum constituat, sequitur, per eam radicaliter opera justa & sancta, proinde meritória fieri. Ergo sit. -

ARTI.



## ARTICULUS I.

*Quid & quotuplex sit meritum, quas conditiones requirat?*

**M**eritum latius sumptum designat dignitatem rei, ob quam exigit aliquid; sic dicitur, quod elegans pictura mereatur videri, ager fertilis coli. Meritum propriè sumptum convenit actibus tantum, estq; proprietas actûs humani moraliter boni, dicens proportionem ad præmium; loquimur enim de merito in bonam partem, non in malam, quod causâ distinctionis dicitur demeritum. Porro.

Duplex est hujusmodi meritum; unum de condigno, alterum de congruo. Meritum de condigno est, cujus valor æquat valorem præmii, & cui redditur præmium ex justitia. Meritum de congruo, est opus, cujus valor non æquat valorem præmii, & cui non debetur præmium ex justitia, sed ex congruitate tantum & ex decentia, amicitia & liberalitate præmiantis. Meritum de condigno est propriè meritum; meritum de congruo impropriè & secundum quid, quia non habet æqualitatem

litatem ad id, quod ejus intuitu datur. Exemplum poni solet in milite generoso, cui proprium stipendium datur de condigno, de congruo autem beneficium nobilitatis, aut aliquod donativum à Rege.

Meritum de condigno est duplex; unum de rigore justitiæ, quod sic importat valorem æqualem ad præmium, ut excludat omnem gratiam factam personæ merenti à præmiante, & tale fuit meritum Christi; Alterum de condignitate tantum, quod importat quidem valorem æqualem ad præmium, sed suppositâ aliqua gratiâ facta personæ merenti à præmiante, & de hoc secundo hic præcipuè agitur.

*Sex conditiones requiruntur ad meritum.*

*Prima:* ut opus sit liberum. *Secunda:* ut sit bonum. *Tertia:* ut fiat in obsequium præmiantis. *Quarta:* ut operans sit viator. *Quinta:* ut sit in statu gratiæ. *Sexta:* ut ejus opus sit à DEO ordinatum in præmium.

*Hæ conditiones expenduntur.*

*Prima conditio:* Ut opus sit liberum. Est de fide ex damnatione tertiæ propositionis Jansenii, & longè ante tradita à S. Thoma q. de malo, art: unico. Et patet:



tet: quia intantum aliquis meretur, seu est præmiô & laude dignus, inquantum est Author sui operis, & aliquid ponit de suo in obsequium præmiantis; est enim inter merentem & præmiantem contractus: ut merens exhibeat suum obsequium, & præmians tribuat mercedem; atqui hoc supponit opus liberum. Ergo.

*Secunda conditio:* Ut sit opus bonum, ut patet: quia opus malum est pænâ dignum.

*Tertia:* Ut opus fiat in obsequium præmiantis; quia alioquin non esset ratio, cur ab eo expectaretur retributio.

*Quarta: Status viatoris.* Hanc apertè innuit Scriptura Joan: 9. *Venit nox*, id est, mors, quando nemo potest operari, nempe meritoriè, & alibi.

*Quinta conditio,* Est status gratiæ; colligitur ex Scriptura, quæ passim docet opera hominis esse mortua, nisi vivat per charitatem, ut 1. Cor: 13. Charitas autem non est sine gratia. Item ex Trid: Sess: 6. cap: 8.

*Sexta conditio.* Est ordinatio seu promissio & pactum DEI ordinantis bonum opus ad præmium seu mercedem; non quod bonum opus valorem seu condignitatem suam intrinsecam habeat ex illa promissione, sed quia ultra dignitatem, quam

quam totam habet ex gratia, necessaria sit promissio de mercede reddenda ad hoc, ut qui ex gratia est benè operatus, habeat jus ad mercedem, & DEUS obligetur illi reddere, juxta illud Jacobi 1. *Qui suffert tentationem, cum probatus fuerit, accipiet coronam vitæ, quam Deus repromisit diligentibus* sc. Similiter ad Hæbr: 6. & 9. Math: 19. 2. ad Tim: 4. ubi vita æterna ut corona justitiæ reddenda dicitur. Trid: Sess; 6. cap: 16. Hinc S. Aug: Serm: 16. de verbis Apost: *Deus debitor factus est, aliquid à nobis accipiendo; sed, quod ei placuit promittendo.* Vid: S. Thom: hic art: 1.

*Possset addi septima conditio.* Ad merendum influxus charitatis, de quo infra dicetur.

*Petes.* An DEUS præmia retribuatur meritis ex fidelitate tantum, aut gratitudine, an ex justitia?

*R.* DEUM præmia meritis retribuere etiam ex justitia, non commutativa sed distributiva, quæ servat modum justitiæ commutativæ.

*Ratio amæ, Patr:* Quia homo nihil potest dare DEO, quod ipsius DEI non est, & sub ejus dominio, etiam ipsa libera actio seu communicatio DEI est. *Quis prior dedit illi,*



*illi, & retribuitur ei?* Rom: 11. *Ratio 2da p.* Justitia distributiva est, qua Superior dat inferioribus, unicuiq; secundum suam dignitatem & meritum, quod maxime convenit DEO.

*Ratio 3tia p.* Quia licet retributio præmii in DEO deficiat à ratione justitiæ commutativæ in hoc, quod homo nihil det DEO, quod non sit DEI; DEUS tamen servat æqualitatem meriti ad mercedem, in quantum tantum dat pro tanto, quod est modus justitiæ commutativæ.

---

## ARTICULUS II.

*Utrum homo possit aliquid mereri apud Deum?*

**I** Utherani & Calvinistæ, qui volunt hominem lapsum non justificari intrinsece, sed tantum denominativè & extrinsecè per imputationem justitiæ Christi; & ejus omnia opera esse mala, negant consequenter ipsum aliquod opus bonum posse facere, quod sit meritorium apud DEUM saltem vitæ æternæ. Falsum eorum principium in Diss: præc: impugnavimus, nunc alium errorem ex illo manantem rejiciemus.

*Dico:*

*Dico:* Homo iustificatus potest verè & propriè apud DEUM mereri aliquid, etiam ipsam vitam æternam. Est de fide decisa in variis Concil: Araus: II. can: 18. Lateran: sub Innoc: III. Cap: *firmiter*. Trid: Sess: 6. cap: 16. & Can: 32.

*Prob: 1<sup>o</sup> Amò ex S. Scrip:* Per meritum nihil aliud intelligitur, quam bonum opus comparatum ad mercedem; atqui Scriptura nobis passim proponit vitam æternam, ut mercedem bonis iustorum operibus reddendam, ut Eccl: 8. *Nè verearis usquè ad mortem justificari, quoniam merces Dei manet in æternum.* Math: 5. *Merceres vestra copiosa est in cælis;* ibid: cap: 19. simile legitur. Porro quærenti, quæ merces erit derelinquenti terrena pro Christo? Respondet Christus: *Centuplum accipiet, & vitam æternam habebit:* cap: 20. Vide etiam cap: 25. & 2. Cor: 4. Hebr: 6. & 13. Rom: 7. 2. ad Timot: 4. Ergo juxta Scripturam bonis iustorum operibus, promittitur non qualecunq; præmium, ut dicunt Sectarii; sed ipsa vita æterna, non ex sola liberalitate, ut aliis visum, sed ex iustitia, ideoq; ut merito propriè dicto.

*2dò, Ratione:* DEUS confert homini per gratiam virtutem benè operandi, & ejus operi-



operibus ex gratia factis promittit certum præmium, imò ipsam gloriam, ut mox dictum, omnesq; aliæ conditiones ad meritum requisitæ possunt concurrere, nulla enim repugnat; Ergò potest mereri gloriam etiam æternam.

*Objiciunt hæretici:* Omnia justorum opera coram Deo sunt peccata, aut certè variis peccatis admixta; Ergo. *Prob: Ant:* ex illo. Jsaïæ 46. *Quasi pannus menstruatæ omnes justitiæ nostræ.* Psal: 124. *Non justificabitur in conspectu tuo omnis vivens.* Item Psal: 129. Ergo.

*R. N. Ant:* Scriptura enim multa Sanctorum opera agnoscit & laudat ut Abrahami fidem, & obedientiam, Jobi innocentiam &c. *Ad prob:* locus Jsaïæ non est ad propositum; ibi enim sermo non est de operibus justorum, sed de observantiis legalibus judæorum, qui se justos existimabant, si hæc exteriora servabant, dum potiora violabant. *Ad alia & similia;* sensus est, quod nullus sit tam justus, qui identidem in aliquibus venialiter non delinquat; & hoc sensû indiget misericordiâ DEI condonante; sed hæc leviter meritum aliorum bonorum operum non evacuant; siquidem cum illis stat charitas, quæ est plenitudo legis.

Q

*Instant:*

*Instant: S. Hyeron: in dialogo cont: Pelag: d. Tunc iusti sumus quando nos peccatores fatemur, & iustitia nostra non ex proprio merito, sed ex Dei misericordia consistit. Item S. Aug: lib: 9. Confess: cap: 13.*

*R.* His loquendi modis non intendunt SS. PP. expungere merita SS. sed volunt tantum merita non esse ex nobis, ut assererent Pelagiani, sed nobis dari per gratiam DEI, quâ perpetuò egemus, ut permaneamus iusti; eaque variis admisceri maculis, quæ continuò veniâ misericordiæ indigent, & ideò semper est in hac vita imploranda.

*Dicunt: Juxta Scripturam: omnia nobis sunt donata à Christo; Ergo ejus merita sufficiunt, & nostra superfluent; imò injuriam meritis Christi facimus, cum humana merita adstruimus.*

*R.* Omnia nobis donata sunt à Christo, non ut nihil agamus, sed ut quod agimus; ex ejus meritis vim merendi habeat; est enim ipse nobis principium bene operandi & merendi; Unde Joan: 14. d. *Ego sum vitis, vos palmites, qui manet in me, & ego in eo, hic fert fructum multum.* Tandem tantum abest, ut merita nostra quidquam gloriæ Christi detrahant; quin imò magis attollunt, cum sit maxi-

ma



ma Christi gloria, quod non solum potuerit pro se mereri, sed etiam quod suis meritis nobis obtinuerit vim merendi.

*Reponunt:* Vita æterna datur ex misericordia DEI & gratia Rom: 6. *Gratia Dei vita æterna.* Idem Rom: 11. Ephes: 2. Tit: 3. affirmat nos salvos fieri ex gratia & non ex operibus. Ergo.

*R.* Vitam æternam dici gratiam DEI, non quod non sit merces bonorum operum, sed quia ipsa bona opera sunt gratis nobis data; atq; ita vera gratia. Ita S. Aug: de Correp: & grat: cap: 13. *Sine ulla dubitatione confitendum est, ideò gratiam vitam æternam vocari, quia his meritis redditur, quæ gratia contulit hominibus.* Dicitur etiam vita æterna gratia, quia gratuito promissa est, ut merces bonorum operum: *Promissum est ex misericordia, sed ex iustitia solvendum* ait S. Bern: de grat:

*Instant:* Si vita æterna sit revera merces bonorum operum, cur Apost: Rom: 6. sicut dicit: *stipendium peccati mors*, non dixit simpliciter stipendium bonorum operum vita æterna?

*R.* Cum S. Aug: Epist: 105. ita potuisse loqui Apostolum, sed abstinuisse, ne de humano merito extolleremur; ac insu-

per opera bona non sunt ex se meritoria vitæ æternæ, sed requiritur DEI gratia & promissio; peccatum autem est meritorium pænæ æternæ de se. Unde ait S. Doct: *Homo, si accepturus es vitam æternam, justitiæ quidem stipendium est, sed tibi gratia est, cui gratia est ipsa justitia.*

Ad Apost: d. nos salvos fieri non ex operibus, sed ex gratia, respondet Aug: de grat: & lib: arb: c. 9. intelligendum esse de operibus ex nobis factis, non per gratiam nobis datis; merces enim reddita meritis rectè dicitur gratia, juxta illud. Joan: 1. *Accepimus gratiam pro gratia.* Quod autem ulterius reponit Calvinus lib: 3. Instit: cap: 18. Vitam æternam promitti quidem bonis operibus in Scripturis, ea tamen non esse meritoria, quia non sunt DEO digna, nec alicujus pretii apud ipsum; omninò falsum est, & apertè contrarium Scripturæ asserenti opera justorum esse pretiosa apud DEUM, iisque sanctos effici dignos vitâ æterna. Psal: 114. *Pretiosa in conspectu Domini mors Sanctorum ejus.* Colols: 1. *Ut ambuletis dignè Deo in omni opere bono fructificantes.* Sap: 8. *Deus tentavit (probavit) eos, & invenit eos dignos se.* Vide plura apud Auth:

ARTI-



---

ARTICULUS III.

*Utrum opera justorum quæ fiunt ex gratia sint meritoria de condigno vitæ æternæ?*

**S**ensus quæstionis est, utrum in operibus justorum ex gratia factis sit condignitas ad gloriam?

*Dico:* Opera justorum ex gratia inhabitante & movente facta sunt propriè & intrinsecè meritoria de condigno vitæ æternæ.

*Prob:* Ex S. Scripturis art: præclaudatis, quibus iusti per opera bona dicuntur digni DEO, Sap: 8. 1. Collos: 1. His adde 2. Thess: 1. *Sic omnes tribulationes sustinetis, ut digni habeamini regno Dei.* Ad Ephes: 1. gratia dicitur pignus hæreditatis nostræ; pignus autem saltem tantum valet, quantum res, ut dicit S. Thom: in hunc locum Lect: 5. Insuper: quod redditur secundum justum iudicium est merces condigna; si enim non esset condigna, sed superaret dignitatem meriti, non redderetur ex justo iudicio; sed ex liberalitate; atqui vita æterna redditur à DEO secundum iudicium justum, juxta illud 2. ad Timoth: 4. *In reliquo reposita est mihi corona*

*corona justitiæ, quam reddet mihi Dominus in illa die justus judex. Ergo.*

*Obj: Illud Rom: 8. Non sunt condignæ passiones hujus temporis ad futuram gloriam, quæ revelabitur in nobis. 2. Cor: 4. Momentaneum & leve tribulationis nostræ æternam gloriæ pondus operatur. Ergo opera nostra sunt inferioris valoris ad gloriam cælestem, ideoq; nec illâ digna.*

*R. Cum S. Thom: hic a. 3. ad 1. Hæc & similia intelligenda esse de operibus Sanctorum consideratis secundum substantiam rei operatæ; ita, ut quæ patimur vel facimus propter DEUM sint res modici valoris respectu bonorum cælestium; at non de operibus SS. prout sunt à Spiritu S. & à gratia, sic enim sunt digna DEO.*

*Instab: Gloria excedit opera Sanctorum etiam prout sunt à gratiâ; illa enim est æterna, ista temporanea; illa est gratia consummata, ista inchoata. Ergo.*

*R. D. Ant: Gloria excedit excessu perfectionis actualis C. excessu virtutis N. Gratia præsens est instar seminis; semen autem licet non sit æquale arbori quantum ad molem, est tamen æquale in virtute; est enim in eo virtus ad totam arborem; ita similiter licet gratia gloriæ sit perfectior actu, quàm gratia & opera viæ;  
hæc*



hæc tamen ejus perfectio continetur in virtute gratiæ viæ.

*Repones:* Ex communi effato Theologorum: DEUS remuneratur justos ultra condignum: juxta illud Luc: 6. *Mensuram bonam --- & superfluentem dabunt in sinum vestrum.* Ergo.

*R. N. Conseq;* Quod DEUS remuneretur ultra condignum, non sic est intelligendum, quasi opera justorum non mereantur de condigno vitam æternam, sed quod ultra gloriæ gradum, quem de condigno merentur, DEUS ex sua liberalitate aliquid aliud adjiciat amplius, quod non negamus.

*Obj:* 2. Meritum de condigno est, cui debetur ex justitia præmium, ita, quod non possit ei denegari sine injustitia; atqui DEUS habenti merita gratiæ posset seclusa præmissione, denegare præmium sine injustitia; quia est Dominus potens merentem etiam annihilare. Ergo.

*R. N. Maj:* Ad sensum Concl: Quia meritum de condigno, prout nos hic sumimus, idest condignitas meriti, non attenditur penes debitum, sed penes æqualitatem valoris operis ad præmium, quod autem tali operi condigno DEUS debeat præmium, id convenit ex conventionem præmium

mium illi retribuendi; ex qua conventionne resultat in Deo obligatio justitiæ latioris, quia supponit gratiam factam merendi à præmiante; bona enim opera sunt ex ejus gratia, & nonnisi ex liberalitate & gratia illa acceptat ad præmium, quàmvis ex se ad illud habeant condignitatem. Vid: Aut: hic.



#### ARTICULUS IV.

*Utrum ad meritum vitæ æternæ requiratur influxus saltem virtualis charitatis?*

**S**uppono: Ex dictis habitum gratiæ esse principium tantum remotum meriti, quatenus dat esse deiforme, & elevat ad ordinem supernaturalem, idoneum tamen, qui per virtutes à se derivatas, tanquam per principia proxima possit bene operari & mereri. Quæstio hic est, utrum possit per omnes virtutes à se derivatas tam acquisitas, quàm infusas mereri vitam æternam sine aliquo influxu charitatis. Dico *vitam æternam*, quæ est præmium essentialiale, quia nemo negat actibus virtutum sine influxus charitatis in justo correspondere aliquod præmium accidentale, ut d. S. Thom: 1. p. q. 95. a. 4.

*Dico:*



*Dico:* Nullus actus virtutis sive acq̃u-  
sitæ, sive infusæ in justo est meritorius vi-  
tæ æternæ de condigno, nisi fiat ex influ-  
xu saltem virtuali charitatis.

*Prob:* Ex S. Scriptura ad Galat: 5. *In  
Christi JESU neq; circumcisio neq; præ-  
putium aliquid valet, sed fides, quæ per di-  
lectionem operatur.* Eadem Scrip: sic pro-  
mittit præmium bonis operibus, ut etiam  
addat conditionem, si fiant in gloriam  
DEI, vel in nomine Christi, vel propter  
Christum. Math: 18. *Qui recipit unum  
ex his pusillis in nomine meo, me suscipit.*  
19. *Qui reliquerit domum, aut Patrem - -  
- propter nomen meum, centuplum acci-  
piet, & vitam æternam possidebit.* Idem  
Marci 9. Quæ omnia important relatio-  
nem aliquam in DEUM, ut ultimum fi-  
nem, consequenter in objectum charitatis.  
Unde Apost: sollicitus hoc motivum in-  
culcare, ne fraudemur præmio 1. Cor: 10.  
hortatur: *Sivè manducatis sivè bibitis, sivè  
quidquid aliud facitis, omnia in Dei glo-  
riam facite.* Simil: ad Coloss: 3. Unde S.  
Thomas hic a. 4. ait: *Charitas inquantum  
habet ultimum finem pro objecto, movet a-  
lias virtutes ad operandum; semper enim  
habitus ad quem pertinet finis, imperat ha-  
bitibus, ad quos pertinent ea, quæ sunt ad  
finem.*

*Obj:*

*Obj:* In pluribus S. Scrip: locis, ut Math: 10. 12. Luc: 10. 1. Cor: 15. Trid: Sess: 6. cap: 16. & Can: 32. vita æterna promittitur absolutè cuilibet bono operi iustorum: Ergo.

*R.* His & similibus locis subintelligi conditionem, quam Scriptura alibi sæpe requirit; scilicet, ut opera fiant propter DEUM, in nomine Dæi, ad gloriam ejus &c. Neq; id tacuit Trid: cùm ibi loquatur de operibus *cooperante fide* factis, fide nempe formata, quæ per dilectionem operatur: Item *de operibus in Deo factis*, idest propter DEUM.

*Dices:* S. Thom: q. 2. de malo a. 5. ad 7. *Habentibus charitatem omnis actus est meritorius, vel demeritorius;* atqui si ad meritum requiritur influxus charitatis, poterit dari actus, qui neq; sit meritorius, neq; demeritorius, scilicet actus bonus moraliter, cui deest influxus charitatis: Ergo.

*R. N. Min: 1mò.* Quia iste actus bonus sine influxu charitatis foret meritorius alicujus præmii accidentalis. *2dò:* quia omnes actus virtutum in homine iusto sunt ex influxu virtuali charitatis, quatenus non solum in instanti justificationis, sed sæpè elicit & elicere tenetur actum charitatis, virtute



virtute cujus omnia referuntur ad DEUM, ut docet S. Thom: q. 2. de virtutibus a. 11.

*Instab:* Ex hac responsione sequitur, quod in homine justo non possit dari actus otiosus, cum juxta illam nullus careat debito fine, sed omnes referantur in finem charitatis.

*R. N. Seq;* Non enim attenditur actus otiosus ex fine ultimo, sed ex proximo, qui non sit bonus, hoc ipso enim quod non habet finem proximum bonum, non est referibilis in DEUM, ut finem ultimum, & sic remanet venialiter malus.

*Repones:* Ut opus sit satisfactorium non requiritur influxus charitatis; Ergo neq; ut sit meritorium.

*R. Omissio Ant: de quo alibi, N, Conseq;* Disp: est, quod condignitas satisfactionis attendatur secundum æqualitatem pænæ cum culpa; condignitas autem meriti attenditur secundum adæquationem valoris operis cum excellentia præmii, qui valor æqualis non habetur sine influxu charitatis.

*Oppones:* Saltem actus virtutum infusarum habent omnes conditiones requisitas ad meritum sine influxu charitatis: Ergo.

*R. N. Ant:* Nam sine influxu charitatis deest ordinatio in bonum & obsequium  
DEI. Pro

*Pro Corollario observandum*, quod cum meritum admittat latitudinem, sit majus vel minus meritum secundum quod charitas plus vel minus, proximius, vel remotius influit in opus.

## ARTICULUS V.

*De his quæ cadunt sub merito.*

**O***bservandum*: nos distinguere cum S. Thom: hic art: 6. duplex meritum de congruo; unum proprium & strictum; alterum latum & improprium. Primum reponimus in jure amicabili ad præmium, per quod distinguitur à merito de condigno, quod importat debitum justitiæ. Meritum de congruo latè reponimus in exigentia formæ per modum dispositionis aut impetrationis. Posita hac observatione sententiæ oppositæ sibi facile conciliantur. Igr:

§ unus.

*Utrum homo possit sibi mereri primam gratiam?*

**Q**uæstio est de gratia habituali, quia de actuali nullus Catholicus dubitat. Ita quippè definitum est contra Pelagianos,



nos, quam definitionem innovat Trid: Sess: 6. cap: 5. & patet ex supra dictis, nullum ex viribus naturæ ne quidem posse se disponere ad primam gratiam actualem.

*Dico:* Nemo potest sibi mereri primam gratiam habitualement, neq; de condigno, neq; de congruo proprio, sed tantum improprio.

*Prob: prima pars:* quæ videtur esse de fide: Nam Rom: 2. d. Apost: *justificati gratis per gratiam.* Trid; Sess: 6. cap: 8. exponens præfata verba ait: *Gratis justificari ideo dicimur, quia nihil eorum, quæ justificationem præcedunt, sive fides, sive opera, ipsam justificationis gratiam promeretur.* Aliundè principium meriti, non potest cadere sub merito; atqui prima gratia habitualis est principium meriti: Ergo.

*Ex his sequitur secunda pars:* per verba enim Scripturæ & Tridentini generaliter statuentis opera justificationem præcedentia, illam non mereri; hinc enim videtur excludi meritum propriè etià de congruo, nam quod propriè meremur de congruo, non dicitur propriè gratuitum, & dari absq; merito.

*Tertia pars constat:* Quia opera bona præcedentia justificationem, & orationes peccatoris humiliati exigunt gratiam per modum

modum dispositionis & impetrationis, in quo reponimus meritum de congruo latè sumptum. Et de hoc merito intelligendus S. Aug: Tract: 44. in Joan: quod confessio publicani meruit justificationem; & Epist: 15. *Quod ipsa peccatorum remissio non sine aliquo merito est, si fides hanc impetrat, nec enim nullum est meritum fidei.* Non enim Aug: aliquod tribuit, hic, meritum personæ, sed operi; ut innuat aliquam congruitatem ex parte operis, quod est meritum de congruo latè sumptum.

*Obj:* DEUS promittit gratiam justificationis iis, qui toto corde convertuntur ad ipsum; juxta illud: *Convertimini ad me, & ego convertar;* atqui bonum promissum sub conditione operis est ejus præmium, sicq; respectu illius opus est meritorium: Ergo.

*R.* Bonum promissum sub conditione operis est ejus præmium, & opus illius est meritorium, si operans sit in statu merendi *C. secùs N. Min:* Tunc enim opus non habet nisi rationem dispositionis aut impetrationis, cui bonum promissum erit reddendum ad summum ex fidelitate, non ex justitia. Porro homo ante gratiam justificantem, cum sit in statu peccati, non est in statu merendi

*Subsu-*



*Subsumes:* Atqui se convertendi ad DEUM gratia datur ex justitia, juxta illud Joan: Epist: 1. cap: 1. *Si confiteamur peccata nostra, fidelis est Deus, & justus, ut illa remittat: Ergo.*

*R. S.* Joannem sumere justitiam latiori modò, pro executione promissorum; quò sensu dicitur Psal: 50. *Ut justificeris in sermonibus tuis*, id est, ut videaris fidelis in promissis tuis. Vel intelligit justitiam respectivè ad Christum, qui nobis meruit remissionem peccatorum; unde addit: *Si quis peccaverit, Advocatum habemus Christum &c.*

*Insiſtes:* DEUS non dat gratiam nisi dignis; atqui non dicitur aliquis beneficio dignus, nisi qui ipsum meruit de condigno: Ergo

*R.* Equidem DEUM non dare gratiam nisi dignis, non ita tamen, quod prius digni fuerint, sed quia ipse per gratiam eos dignos facit, qui solus potest facere mundum de immundo semine.

*Inferes:* Ergo saltem homo per bona opera subsequentiâ poterit mereri gratiam prius sibi datam intuitû istorum bonorum operum subsequentiû; sicut videmus vg. quod milites arma sibi data à Rege intuitu meritorum subsequentiû, illa mereantur per bonum usum illorum.

*R.*

*R. N. Ilatum: Disp: est*, quod ipsa gratia tribuat bonum sui usum, sitquè ideo principium adæquatum meriti, unde cadere non potest sub merito.

*Petes.* Utrum justus possit alteri mereri primam gratiam?

*R.* Nullus præter Christum potest alteri mereri primam gratiam de condigno, benè tamen de congruo. *Ratio 1<sup>ma</sup> p.* Quia gratia puro homini collata est particularis, ipsumq; movet ad propriam perfectionem, non verò ut alios sanctificet; id namq; proprium est gratiæ Capitis, qualis fuit in Christo, quæ secundum præsentem providentiam nulli particulari justo conceditur. *Ratio 2<sup>da</sup> p.* Quia cum homo in gratia constitutus Deo gratus & amicus ejus impleat voluntatem, congruum est secundum amicitiae proportionem, ut Deus impleat voluntatem hominis in salvatione alterius, modò tamen non adsit impedimentum nimiae obstinationis, aut aliud ex parte illius, cujus justificationem desiderat Sanctus.

*Petes 2<sup>dò</sup>.* Utrum homo justus possit sibi mereri reparationem post lapsum?

*R. Negative.* Ne quidem merito congruo propriè tali. *Ratio ex illo cap: 18. Ezech: Si averterit se justus à justitia sua,*



*Et fecerit iniquitatem, omnes justitiæ ejus, quas fecerat, non recordabuntur.* Ergo nihil valent illi præcedentia merita, ut resurgat. De merito congruo propriè etiam patet: Quia justus non habet jus amicabile ad reparationem post lapsum, quia per peccatum perditur DEI amicitia, sit indignus beneficiorum.

*Petes 3tiò.* Utrum homo justus possit sibi mereri augmentum gratiæ vel charitatis?

*R. Affirm:* Et quidem de condigno, juxta illud: S. Aug: Tract: 5. in Epist: Joan: *Charitas meretur augeri, ut aucta mereatur perfici.* Ita definiuit sub Anathemate Trid: Sess: 6. can: 32. & constat ex Scriptura, quæ sæpiùs nos hortatur ad illud augmentum per opera consequendum, ut ad Ephes: 4, & alibi.

*Insuper:* Quia illud sub merito condigni cadit, ad quod motio DEI se extendit, motio autem alicujus moventis non solum se extendit ad ultimum motûs, sed ad totum progressum in motu; atqui terminus motûs gratiæ est vita æterna, progressus verò in hoc motu est augmentum gratiæ vel charitatis secundùm illud Prov: 4. *Justorum semita quasi lux splendens procedit, Et crescit usque ad perfectum diem,* qui est dies gratiæ consummata, scilicet gloriæ.

R

Obser-

*Obſerva:* Quod quamvis quomodo fiat augmentum gratiæ, non ſit ita comper-  
tum, S. Thom: tamen hic a. 8. ad 3. ab-  
ſolutè reſolvit, quod quolibet actu merito-  
riò homo mereatur augmentum gratiæ,  
ſicut & gratiæ conſummationem, quæ eſt  
vita æterna, ſed ſicut vita æterna non ſta-  
tim redditur, ſed ſuò tempore, ita nec gra-  
tia ſtatim augetur, ſed ſuò tempore, cum  
ſcilicet aliquis fuerit ſufficienter diſpoſitus  
ad gratiæ augmentum.

§ 2dus.

*Utrum homo poſſit ſibi mereri donum per-  
ſeverantiæ finalis?*

**P**ER donum perſeverantiæ finalis hic in-  
telligimus permanentiam in gratia  
uſquè ad mortem; ſeu conjunctionem ſta-  
tûs gratiæ cum morte. Undè perſeveran-  
tia finalis eſt illud ſpeciale & magnum  
donum, quò ſit, ut homo in ſtatu gratiæ  
permaneant uſquè ad mortem, & de illo  
quæritur, an cadat ſub merito?

*Dico:* Nemo poteſt mereri de condigno  
perſeverantiæ donum. Ita omnes Catho-  
lici cum S. Thoma hic a. 9.

*Colligitur ex S. Scrip:* Ad Phil.: 2 dicente:  
*Deus eſt, qui operatur in nobis velle &  
perficere pro bona voluntate.* Non dicit pro  
meritis, ſed pro bona voluntate, ita, quod  
ſicut



sicut initium, ita finalis perseverantia fit à solo DEO. Item ex Trid: Sess: 6. cap: 13. *Quod quidem (donum) aliundè haberi non potest, nisi ab eo, qui potens est eum statuere, ut perseveranter stet, & eum qui cadit restituere.* Quod autem meretur homo, etsi principaliter sit à DEO, non tamen à solo DEO, sed etiam ab homine per sua merita.

*Prob: ex principio S. Thom: ab omnibus recepto:* Principium meriti non cadit sub merito operis ab ipso principio procedentis; nihil enim potest esse sui ipsius meritum & præmium, causa & effectus; atqui si donum perseverantiæ caderet sub merito, principium meriti caderet sub merito operis, ab ipso principio procedentis: Ergo. *Prob: Min:* Donum perseverantiæ consistit in divina motione conservativa gratiæ primùm datæ; atqui motio divina ut conservativa gratiæ est principium meriti, seu se tenet ex parte principii: Ergo: *Prob: Min:* Motio divina ut conservativa gratiæ, est eadem entitativè, ac prima productio gratiæ; conservatio enim rei, est continuata ejus productio, consequenter actio conservativa rei non distinguitur entitativè à prima ejus productione, ut clarè tradit S. Doct: 1. p. q. 114. a. 1.

ad 4. Atqui prima productio gratiæ est principium meriti; seu se tenet ex parte principii. Itaq; sicut nemo potest mereri suam conservationem, quia conservatio non est actio distincta à creatione, quæ non cadit sub merito; ita nemo potest mereri perseverantiam in bono, quia nihil est aliud, quàm gratiæ conservatio, quæ non distinguitur à prima ejus productione, quæ non cadit sub merito, ut supra probatum est.

*Confirm:* Omne, quod quis meretur de condigno, illud à DEO obtinet infallibiliter, nisi impediatur per peccatum. Si ergo perseverantia caderet sub merito, cum vix ullus sit justus, qui non habeat opera meritoria, vix ullus esset, qui non haberet donum perseverantiæ, contra illud: *multi vocati pauci electi.*

*Dices:* Multos justos ideò non perseverare, quia per peccatum amittunt meritum, quò sibi donum perseverantiæ meruerunt: Ergo.

*R.* Hoc ipsum enim, quod est peccare, opponitur perseverantiæ; ita ut si aliquis perseverantiam mereretur, DEUS non permetteret illum cadere in peccatum.

*Obj:* Qui potest mereri majus, potest & minus; atqui justus potest mereri de condigno vitam æternam, & in ea permanen-



tiam; item augmentum gratiæ, quæ sunt quid majus ipsâ perseverantiâ viæ: Ergo.

*R. D. Maj:* Potest minus, cæteris paribus *C.* cæteris imparibus *N.* *Disparitas autem hic est*, quod tam vita æterna, quàm in ea permanentia ac augmentum gratiæ comparentur ad motum meritorium liberi arbitrii, (proindè ad gratiam, quæ est hujus motûs principium meritorium) ut terminus, non autem donum perseverantiæ quod, ut dictum in prob: non distingvitur ab illa prima gratia, quæ est principium meriti, ideòq; respectu illius non habet rationem termini.

*Instab:* Qui potest mereri finem, potest mereri media ad finem necessaria; atqui perseverantia est medium ad vitam æternam: Ergo.

*R. 1mò: Maj: universaliter vera non est.* Merita namquè sunt media necessaria ad vitam æternam, & tamen merita non meremur. Sufficit ergo media quomodocunque habere. *R. 2dò N. Min:* Perseverantia enim est quidem necessaria ad vitæ æternæ consecutionem, non verò ad illam merendam. Homo ergò justus per bona opera independenter à perseverantia, meretur absolutè vitam æternam, non tamen absolutè meretur ejus consecutionem, sed

*fi in gratia decesserit*, ut dicit Triden; Sess: 6. cap: 16. & can: 32.

*Repones*: Justus per bonum opus præsens potest mereri auxilium efficax ad bonum opus sequens & sic ad finem: Ergo potest mereri donum perseverantiæ.

*R. Omisso Ant: N. Conseq;* Etsi enim justus per bonum opus præsens mereatur auxilium efficax ad opus sequens, illud tamen non obtinebit infallibiliter, nisi inquantum perseverabit in gratia, quod autem perseverat in gratia, mereri non potest, quia illud donum se tenet ex parte principii meriti, ut dictum.

*Omissi Ant:* Non enim omnibus probatur auxilium efficax cadere sub merito; nullibi enim habetur, quod sit propositum ut præmium meriti, & illud, de quo dicit Aug: quod cui datur, ex misericordia datur, cui non datur, ex justitia non datur.

*Dices*: Id, quod homo obtinet petendo, potest cadere sub merito habentis gratiam; atqui perseverantiam petendo homines obtinent; alioquin frustra peteretur à DEO: Ergo.

*R, N. Maj:* Universaliter sumptam; non enim, quæ obtinemus petendo, meremur. Sic DEUS audit peccatores peccatorum veniam petentes, quam non merentur, ut d. S. Aug: Tract: 44. in Joan: Igitur per-



severantiam aliquis petendo impetrat, vel sibi, vel alteri, quamvis sub merito non cadat, ait S. Thom: hic ad 1.

*Petes:* Utrum donum perseverantiæ cadere possit sub merito saltem de congruo? *Dissentiunt etiam Thomistæ.*

At si intelligatur de merito congruo strictè & propriè tali, videtur conformius principiis & menti S. Thomæ, donum perseverantiæ non posse cadere sub illo, sed tantum sub merito congruo latè & impropriè.

*1mò.* Non minus repugnat principium meriti cadere sub merito de congruo propriè, quàm sub merito de condigno. *2dò.* Quia meritum de congruo propriè tale infallibiliter etiam obtinet mercedem; cum enim fundetur in jure amicali, DEUS non denegat homini, quæ ipsi secundum leges amicitiae sunt debita; ex quo nempe ex merito de congruo propriè sequeretur omnes fermè justos fore perseverantes.

Restat igitur justum posse mereri donum perseverantiæ ex merito de congruo latè sumpto, pro impetratione fundata in liberalitate, & benignitate DEI. Et hoc sensu intelligendus S. Aug: de dono persever: cap: 6. *Hoc Dei donum suppliciter emereri potest, ut innuit: to suppliciter.*

§ 3<sup>tius</sup>.*Utrum bona temporalia cadant sub merito?*

*Dico:* **S**I bona temporalia considerentur, prout sunt utilia ad salutem, cadunt sub merito, sicut augmentum gratiæ, & omnia illa, quibus homo adjuvatur ad vitam æternam consequendam, quia in bonis operibus comparatis ad bona temporalia sic considerata possunt reperiri omnes conditiones requisitæ ad meritum, & respectu illorum operum habent rationem termini.

Si verò bona temporalia considerentur secundum se, cum non sint bona simpliciter, sed secundum quid, ita nec cadunt sub merito simpliciter, quod respicit solam vitam æternam, & ea quæ ad illam conducunt; sed sub merito secundum quid, quatenus attenda DEI bonitate & liberalitate, congruum aliquò modò videtur, quod operibus moraliter bonis, bonum aliquod reddat ejusdem ordinis. Unde S. Aug: lib: 5. de Civ: DEI cap: 15. observat Romanis propter bonos quosdam eorum mores mercedem temporalem fuisse redditam. Et hæc sufficiunt. Sint ergo huc usquè dicta.

---

*In laudem Gloriæ Gratia DEI. Ephes: 1.*

---





# J N D E X

*Dissertationum, Articulorum, Paragraphorum, & aliorum, quæ in hoc Tractatu de gratia Christi, Justificatione impij & Merito Justij continentur.*

	pagina.
DISSERTATIO PRÆAMBULA. De variis erroribus circa gratiam.	1
Art: I. De Pelagianismo.	1
§ I. Synopsis historica Pelagianismi.	2
§ II. Varii Status hæresis Pelagianæ	5
§ III. Quid gratiæ tandem admiserit Pelagius?	7
§ IV. Confessaria præcedentium.	16
Art: II. De Semi-Pelagianismo.	21
§ I. Synopsis historica Semi Pelagianismi	21
§ II. An & qualem gratiam admiserint Semi Pelagiani ad initium fidei & salutis.	25
Art: III. De Bajanismo & Jansenismo.	34
DISSERTATIO II. De variis naturæ humanæ statibus.	38
Art: I. Explicantur quinque status naturæ humanæ	38
Status naturæ puræ.	38
Status naturæ integræ.	39
Status justitiæ originalis.	40
Status naturæ lapsæ.	41
Status naturæ reparatæ.	42
Art: II. Utrum status naturæ puræ fuerit possibilis?	44
Petes	

# I N D E X

Petes imo. In hoc statu an esset locus re- missionis peccatorum?	52
Petes 2do. Utrum homo in statu naturæ lapsæ non reparatæ habeat minores vires ad bonum morale quàm habuif- set in statu naturæ puræ?	52
Art: III. Utrum tam Adamo, quàm Ange- lis necessaria fuerit gratia per se effi- cax ad perseverandum?	54
Art: IV. Solvuntur objectiones.	60
DISSERTATIO III. De necessitate gratiæ.	68
Art: I. Quid intelligitur nomine gratiæ?	68
Art: II. Utrum homo lapsus veritates super- naturales, seu quæ sunt fidei possit abs- que speciali gratia cognoscere & am- pleri?	73
Petes: Utrum homo lapsus possit absque gratia cognoscere veritates naturales?	81
Art: III. Utrum homo lapsus possit facere aut velle aliquid absque gratia?	84
Petes: Utrum homo lapsus possit facere ali- quod bonum morale sine speciali gra- tia actuali?	92
Petes: Quomodo hæc propositio liberum ho- minis arbitrium sine gratia & adju- torio DEI nonnisi ad peccandum va- let, sit damnata in Bajo; & hæc: ne- mo habet de suo nisi peccatum & mendacium sit asserta à Concil: Arau- sic: Can: 22. cum videatur utriusque idem sensus?	94
Art: IV. Utrum homo possit diligere Deum super omnia sine gratia?	95
Art: V. Utrum homo lapsus possit sine gra- tia speciali omnia legis naturalis præ- cepta implere?	103



# I N D E X

Art: VI. <i>Utrum homo justus possit sine speciali privilegio vitare omnia peccata venialia?</i>	109
Art: VII. <i>Utrum homo se possit præparare ad gratiam sine gratia?</i>	113
Petes 1mo. <i>Quis est sensus vulgati axiomatis: Facienti, quod in se est, DEUS non denegat gratiam?</i>	121
Petes 2do. <i>Quomodo illud contra Pelagianos definitum. Gratia non datur secundum merita?</i>	123
Petes 3tio. <i>Utrum homo possit resurgere à peccato sine gratia?</i>	124
Art: VIII. <i>Utrum homo in gratia constitutus indigeat speciali auxilio gratiæ ad perseverandum finaliter?</i>	126
Petes: <i>In quo consistit illud speciale auxilium?</i>	127
Petes: <i>Utrum Angelis &amp; primo homini in statu innocentie necessarium fuerit hoc auxilium?</i>	132
Petes: <i>Utrum donum perseverantiæ finalis sit idem ac donum confirmationis in gratia?</i>	132
DISSERTATIO IV. <i>De essentia gratiæ.</i>	133
Art: I. <i>Utrum gratia sit donum animæ intrinsecum?</i>	133
Art: II. <i>Utrum gratia sanctificans sit formalis &amp; physica participatio Divinæ naturæ?</i>	140
Petes 1mo. <i>Utrum gratia sanctificans distinguatur à charitate?</i>	145
Petes 2do. <i>Utrum gratia sit in essentia tantquam in subiecto?</i>	145
DISSERTATIO V. <i>De divisione gratiæ.</i>	146
Art: I. <i>Quæ sunt divisiones gratiæ?</i>	146

# I N D E X

Art: II. <i>De variis systematibus circa gratiam sufficientem &amp; efficacem.</i>	153
§ I. <i>Systema Jansenii.</i>	153
§ II. <i>Systema S Thomæ &amp; Thomistarum?</i>	158
Necessitas duplicis gratiæ.	158
Distributio gratiæ.	160
Gratuitas seu independentia gratiæ.	161
Efficacia gratiæ.	162
Libertas perfecta sub gratia per se efficaci.	163
Varia discrimina inter systema Thomistarum, & Jansenianum.	164
§ III. <i>Systemata Theologorum, qui Congruistæ dicuntur.</i>	166
Art: III. <i>Utrum detur in hoc statu naturæ lapsæ gratia sufficiens?</i>	170
Art: IV. <i>Quo sensu admittenda est gratia sufficiens?</i>	175
Petes: <i>Quotuplex sit auxilium sufficiens?</i>	180
Art: V. <i>Unde repotenda sit efficacia gratiæ?</i>	182
Petes: <i>Quid censendum de quinque modis, quibus gratia per se efficax à variis explicatur.</i>	191
DISSERTATIO VI. <i>De causa gratiæ.</i>	193
Art: I. <i>Utrum solus Deus sit causa principalis efficiens gratiæ?</i>	193
Petes 1mo. <i>Quis est modus producendæ gratiæ?</i>	196
Petes 2do. <i>Utrum ad gratiam requiratur aliqua præparatio seu dispositio ex parte hominis?</i>	197
Art: II. <i>Utrum aliquis possit esse certus se esse in gratia?</i>	199
DISSERTATIO VII. <i>De justificatione impij seu peccatoris.</i>	205
Art:	



# I N D E X

Art: I. <i>Utrum in justificatione impii sic remittantur peccata, ut vere deleantur, &amp; auferantur, non solum tēgantur?</i>	207
Art: II. <i>Utrum ad remissionem peccati, quæ fit in justificatione impii, requiratur gratiæ infusio?</i>	212
Art: III. <i>De actibus, ad justificationem peccatoris adulti requisitis.</i>	217
§ I. <i>Quæ fides requiratur ad justificationem.</i>	217
§ II. <i>Utrum sola fides sufficiat ad justificationem?</i>	224
§ III. <i>De aliis ad justificationem adulti requisitis.</i>	231
DISSERTATIO VIII. <i>De merito iusti.</i>	234
Art: I. <i>Quid &amp; quotuplex sit meritum, quas condiciones requirat?</i>	235
<i>Sex condiciones expenduntur.</i>	236
Art: II. <i>Utrum homo possit aliquid mereri apud Deum?</i>	239
Art: III. <i>Utrum opera Iustorum, quæ fiunt ex gratia, sint meritoria de condignō vitæ æternæ?</i>	245
Art: IV. <i>Utrum ad meritum vitæ æternæ requiratur influxus saltem virtualis charitatis?</i>	248
Art: V. <i>De his quæ cadunt sub merito.</i>	252
§ I. <i>Utrum homo possit mereri primam gratiam?</i>	252
§ II. <i>Utrum homo possit sibi mereri donum perseverantiæ finalis?</i>	258
<i>An saltem de congruo?</i>	263
§ III. <i>Utrum bona temporalia cadunt sub merito?</i>	264




## *Errata*

## *Lege*

Pag: 2.	ŷ. 1.	Epist: lege	Epistola
Pag: 8.	ŷ 18.	e. aren	Suarem
Ibidem	ŷ 19.	prop	Prob:
Pag: 26.	ŷ 13.	P. Goud in	P. Goudin
Pag: 56.	ŷ 28.	Cooverterent	Converterent
Pag: 57.	ŷ 17.	coquæus	Coquæus
Pag: 68.	ŷ 3.	Differtatio II	III
Pag: 75.	ŷ 20.	Gratlam	gratiam
Pag: 117.	ŷ 14.	præpare	præparare
Pag: 120.	ŷ 7.	Cyrrllus	Cyrillus
Pag: 125.	ŷ 11.	per quam	per quem
Pag: 129.	ŷ 23.	jaxta	juxta
Pag: 142.	ŷ 1.	attibuta	attributa
Pag: 163.	ŷ 11.	effiaci	efficaci
Pag: 227.	ŷ 11.	apera	opera







Dominicus Hieronymus  
a Tavoroli

CD  
A  
E.



*Gratias Melles*

*Jacobus Towronski*

Biblioteka Jagiellońska



stdr0027171

